

تاریخ حی (3)

أحمد حسنی

تاريخ حي (3)

تاج محل.....	4
خمارويه.....	6
توران شاه.....	8
بيبرس.....	12
باب العزب.....	13
السلطان حسن.....	15
فاضل باشا.....	18
المقياس.....	27
خاير بك.....	29
حريق المسجد النبوي.....	30
فتحية.....	32
سمعان الخراز.....	38
صرغتمش.....	40
السلطان معرفش.....	41
عباس حلمي الأول.....	42
يشبك من مهدي.....	44
الولس كسر عراي.....	45
بيت الرزاز.....	54
البرديسي.....	56
قصر عابدين.....	58
مصطفى بك دالى.....	59
ماهسوري.....	61
المعزة المباركة.....	68
فتنة الصابون.....	69
بئر العظام.....	70
الصاري إبراهيم.....	77
حجاج الخضري.....	79
جواهر اللالا.....	81
على الكسيح.....	83
شاهين الخلوتي.....	85
لاوكون.....	87

الأمير مصطفى.....	94
على بك الكبير.....	96
بوابة قلاوون.....	99
الأشرف خليل.....	101
قلعة الجبل.....	106

تاج محل

على فكرة.. تاج محل عمره ما كان من عجائب الدنيا السبعة ابدأ..
القصة كلها ان سنة 1999م طلع منتج افلام كندى اسمه برنارد فيبر باقتراح بخصوص عجائب الدنيا القديمة.. حيث انها انتهت والكوكب ما زال عامر بعلامات الاستفهام.. يبقى مفيش ضرر من اقتراح اسماء جديده كعجائب لتنشيط السياحة.. زى مثلا سور الصين العظيم وتمثال المسيح الفادى فى ريو دى جانيرو والبتراف فى الاردن ومدينة ماتشو بيتشو فى بيرو.. ومن ضمن المقترحات كان تاج محل.. وطبعاً يفضل هرم خوفو عجيبة شرفية ثامنة باعتبار انه الوحيد الى باقى من العجائب القديمة.

بس هو ليه تاج محل يبقى من العجائب اصلاً؟
لو قلت علشان فخامة البناء وكَم الرخام المهول وشكله حلو وكده.. يبقى انت فعلاً محتاج تقرأ باقى الكلام..
الامبراطور المغولى شاه جهان كان من اعظم سلاطين المغول المسلمين فى الهند.. فيوم شاف واحده ست اسمها ارجمند بانوبيكم.. جمالها لحس نافوخه.. مكانش فى اى مشكلة انه يتجوزها "خصوصاً ان الهند مفيشا قايمة" الا انها كانت مخطوبة بالفعل.. يجبروت السلطان قتل خطيبها واتجوزها هو علشان تبقى مراته رقم 4 من بين 7 زوجات ما شاء الله.. سماها ممتاز محل "يعنى جوهرة القصر المحبوبة" وعاش معاها قصة حب افلاطونية انتجت 14 عيل.. بس المسكينة وهى بتولد العيل رقم 14 فطست وماتت وكان عمرها يا دوب 39 سنة.. غالباً كده اخت جوزها حسدتها اكمنهم كانوا عايشين فى بيت عيلة وكده.

شاه جهان من كتر حزنه عليها قرر انه يخلد ذكرها فى تحفه معماريه لم يشهدها الكوكب من قبل.. المغول فى المعمار كانوا مفترين.. ميزانية مفتوحة و20 الف من العمال والعبيد.. رخام من راجستان وذهب وياقوت ومرمر من كل انحاء الارض.. اعظم واجدع مهندسين معمارى فى الدنيا.. غالباً لم دفعة معمارى ومدنى بتاعة هندسة عين شمس سنة سنة 1631م. علشان الضريح ده.. بعد 20 سنة شغل اكتمل بناء ضريح تاج محل.. الضريح يحتوى على 39 قبة والسلاالم فيها 39 درجة.. رقم 39 متكرر كثير اوى.. واعتقد السبب واضح. خدتل بالك؟؟

كل الهلمة دى لا كانت قصر ولا قلعة حكم ولا معبد.. ده مجرد قبر عمله زوج محب.. علشان بس الستات بتقعد تقول الرجالة كلهم مصطفى ابو حجر.. اهو.. راجل عادى اهو لا يقارن برومانسية واخلاص الرجل المصرى..

بس معرفناش برضه هو ليه الضريح من العجائب؟
الاجابة هتلاقها عند بتوع الهندسة المعمارية فى حاجه بيسموها السيمترية.. تقدر تفسرها على انها التماثل او التناسق او التوافق.. كله يمشى.. دى علامة من علامات شطارة المهندس المعمارى على فكرة.

لو انت وقفت بره المبنى من اى زاويه ورسمت خط مستقيم بقسم المبنى كله نصين.. يبقى هتلاق كل تفصيله فى النصف الايمن مكرره بحذافيرها فى النصف الايسر.. بغض النظر انت واقف قصاده وللا جمبه وللا بزوايه او على يمينه او شماله.. من اى مكان هتقسم المبنى هيطلعلك نصين متماثلين بنسبة 100%.

لو عندك رسمة وردة فى اليمين يبقى هتلاق رسمة نفس الورده بنفس اللون والمقاس والشكل فى الشمال.. لو عندك ايه قرآنيه هنا.. هتلاقها بالضبط الناحية الثانية.. لو فى على اليمين مأذنة او قبة.. هتلاق اختها فى النصف الايسر.. حتى القبة البصلية الكبيرة فى نص الضريح.. لو قسمتها نصين.. هتلاقيهم نصين متطابقين تماماً حتى فى عدد الحجارة المبنية بهم القبة.. وطبعاً الكلام ده ينطبق على المبنى والحديقة الخارجية والنافورة وعدد الشجر ونوعه وعمره.. كل شئ فى النصف الايمن مكرر فى النصف الايسر.. لما شجرة بتدبل او وردة بتقع.. بيقوا حريصين جداً على زراعة البديل بنفس النمط.. وكل ده قبل عصر الكمبيوتر..

بس للأسف السيمترية دى انضرت.. الضريح يحتوى على تفصيلة واحدة مش مكررة.. ولو حاولت تقسمها بأى خطوط من اى اتجاه مش هينفع.. نظرية السيمترية باظت بوجود التفصيلة دى.. وقفت على شعري وانا بحاول اكتشفها علشان افوز بعزومة غداء زى ما المرشد السياحى الهندى وعدنى.. ولكن هيهات.. لما صعبت عليه من كتر التفكير خدنى على مكان الدفن.. وهناك اكتشفت السر.

شاه جهان عاش بعد ممتاز محل 35 سنه يعيط عليها فى حضن الستات الى اتجوزهم بعدها.. مش علشان اتجوز اختها ارجمند بانو بعد وفاتها باسبوع يبقى هو كده راجل طقس.. المسكين كان بيدور على اى حاجه من ريحتها.. بسبب حزنه عليها زهد فى الدنيا لحد ما ابنه القوى اورانكزيب عزله من الحكم سنة 1658م.. طلب شاه جهان انه يقيم فى القلعة الحمراء المواجهة للضريح مباشرة علشان يقضى يومه يتفرج على قبر زوجته الراحلة ويعيط وهو بيحكى لها عن النكد الى شايفه من حريمه الجديد.. يسح دموع ويقولها ولا يوم من ايامك يا ام كومار.. وحشتنى يا غالية.

لما مات شاه جهان سنة 1666م دفنه ابنه اورانكزيب - بناء على طلبه - جنب مراته ممتاز محل.. اورانكزيب مخدش باله وهو بيدفن ابوه انه كده هيبوظ سيمترية الضريح.. هو كان بتاع حروب ودم وملوش فى الفنون والهري بتاع ابوه ده.. بالتالى اصبح قبر الامبراطور شاه جهان هو التفصيلة الى افسدت المعجزة المعمارية.. اليونسكو رفضت تعترف بالغلطة دى على اساس ان الضريح اكتمل فى حياة مؤسسة واى تعدى عليه بعد كده مش هيتحسب.

جنب قبر شاه جهان مكتوب اسمه الرسمى..

"شاهنشاه السلطان الأعظم والخاقان المكرم ملك السلطانات حضرت ابو المظفر شهاب الدين محمد شاه جهان صاحب قران الثانى بادشاه غازى ظل الله فردوس آشيانا والسلطانات الهندية والمغولية".. ويبدلعوه ويقولوله يا مودى.

عياى شاه جهان "داراشكوه واورانكزيب ومراد وشجاع" قطعوا بعض علشان الحكم.. ابوهم لما كان بيفوق من غيبوبات المرض كان بيوصيهم على بعض.. بس لما حسم اورانكزيب الصراع فى معركة ساموجرا وبقي هو السلطان.. أبوه قاله جدع ياض وراح باعتله سيف مرصع بالجواهر مكتوب عليه "عالم كير".. سيد العالم يعنى.. وهو اللقب الى فضل معاه لحد ما مات .
حجارة الضريح المعجزة بقالها اكثر من 400 سنة شاهد على رومانسية الرجل بالرغم من صراخ الجماعة اياهم.
اد ايه احنا مظلومين.

خمارويه

لولا ان رينا قال "إِنَّ قَارُونَ كَانَ مِنْ قَوْمِ مُوسَى" كنت قلت ان ابن تُغرى بيتكم عن قارون مش عن خمارويه بن احمد بن طولون.. لا اعتقد ان في حد في تاريخ هذا الكوكب اسعد حظاً واقل عقلاً من خمارويه.. لما يورث من ابوه مملكة مفتخره بتخر فلوس ومنتشطه سوبر لوكس من غير حروب ولا دم ولا قلق ينغص عليه عيشته وهو عنده 21 سنة بس وفي الاخر يضيع كل ده بالسفه الزيادة.. يبقى لازم فعلا نقول انه كان مُبخت وعبيط.

أحمد بن طولون فحت في الصخر عlishان يخلع بمصر والشام من بين انياب الاسد العباسي العجوز.. كان له في الترف والحركات برضه بس بالاصول.. سيرة ابن طولون فيها الف حاجه مشرفة تتحكي.. بينما لما تبص على سيرة خمارويه.. مش هتلاق غير القصر وفرح بنته. اول استفتاح خمارويه في الحكم كان قتل اخوه العباس عlishان مرضيش يبابعه.. خمارويه متعيش عlishان يستقر على العرش.. كام شهر قلق في الشام قدر بعدها يسكت كل الاصوات ويدخل مصر سنة 271 هـ. عlishان بيدأ حالة غير مسبوقه من الترف اصابت المؤرخين بالجنون من هول الى شافوه.

قصر خمارويه كان واخذ المساحة من مسجد ابوه لحد مسجد السيدة عائشة حالياً بما فيها ارض قلعة الجبل.. بستان القصر كان فيه العجب.. اصناف غريبة ونادرة من النباتات والزعفران والرياحين والشجر المعطر الى جابه خمارويه من خراسان وتركيا والهند وافريقيا.. الاف من شجر المشمش المطعم باللوز والنخل المثمر المكسو بالنحاس المذهب المنقوش.. المسافة بين كسوة النخل وساق النخلة نفسها عمل فيها انابيب رصاص تمر فيها المية عlishان تسقى النخلة وتخرج المية الزيادة من فتحات في الكسوة عlishان تبدو كل نخلة كأنها نافورة.. تمشى المية من النخل في جداول رفيعة عlishان تسقى باقى نباتات البستان.. تتجمع المية كل كام متر في بركة صغيرة جدرانها تراب معجون بالحنة وفايح منها ريحة الورد الى طافي على سطح المية.. نباتات من كل شكل ولون مرتبة ومنسقة بعناية على شكل رسم او كلمات مقروءة.. في طبعا جنايى كان شغلته تهذيب النباتات هي عlishان يحافظ على شكلها الجمالى او الكتابة.

وسط البستان كان في بيت للطيور مبنى من خشب الساج الصلب وارضه مكسية بالرخام.. محفور فيه جداول صغيرة بتضخ فيها المية السواق الموجودة حوالين ابار المية العذبة المنتشرة في البستان.. الساقية ترفع المية من الير والمية تمشى في الجدول بصوت رقيق ميزعجش الطيور الى كانت بتشرب منها.. خمارويه كان عنده طواويس ونعام وديوك روى غير الحمام والبلابل والعندليب.. في حيطان البرج عمل تجويفات عlishان بيض الطيور يفقس فيها.. بين الحيطان عمل فروع من شجر معطر عlishان العصافير تطير وتقف عليه وتغنى وترد على بعضها.

حيطان مجلس خمارويه كانت مطلية بالذهب المنقوش بالالزورد.. على الحيطان كان في رسومات لخمارويه محاط بالجوارى والمحظيات في ليالى الانس.. في كل ركن كان في تماثيل خشب للجوارى عليها ملابس مصنوعة من افخر انواع الحرير والقصب المطرز بالذهب.. كان ملبس رؤوس التماثيل ذهب ولؤلؤ.. لما كل ده للتماثيل.. امال الجوارى الحقيقية كانت لابسه ايه!!!

ولما كل ده في الجنينة والانتريه.. امال اوضة نومه كانت عامله ازاى؟

خمارويه كان بيعانى من الارق.. نصحه طبيبة بالمساج بس خمارويه استكبر ان حد يحط ايده عليه فراح عامل قصاص مجلسه بركة مربعة ملاها زئبق طول ضلعها 60 متر.. وحط فوق الزئبق سرير من الحرير بيتحرك حركة ناعمة لما الزئبق يتحرك.. تخيل انت بقى منظر الزئبق مع السرير الحريرى الوردى تحت ضوء القمر.. انا نمت وانا بتخيل المنظر.

جذب مجلس خمارويه كان في اوضة اسمها "غرفة المكربين".. دول 12 واحد بيباتوا في الاوضة 4 كل ليلة بالتبادل.. ملهمش شغلانه الا قراءة القرآن والتكبير والذكر والتسبيح ورفع الأذان في موعده.. الغريب انك كنت تلاقى خمارويه قاعد في مجلسه بيشرب هوب هوب والذكر جمبه شغال عادى.. ولما ييجى وقت الاذان يروح سايب الكاس والمُرّة "او المُرّ" الى في ايده احتراماً.. ولما الاذان يخلص.. يرجع للتفيعيص والشرب تانى.. الاحترام حلو برضه .

في حديقة القصر كان عنده انيمال بلانيت خصوصى.. بيوت للأسود والنمور والفهود والغزلان والزراف والافيال.. كل نوع في منطقة لوحدة وكل اسد مع نسوانه في بيت لوحدهم.. خمارويه كان عنده اسد عينه زرقاء سماه "زريق".. كان ملبسه طوق مربوط بسلسلة ذهبية ضخمة حوالين رقبتة.. خمارويه كان بيعامل زريق معاملة الكلاب.. يقعد ياكل معاه ويأكله بأيده فرخه ورا الثانية.. يتمشى معاه في البستان.. ينام في بركة الزئبق بتاعته ويسهر الاسد يحميه.. اسد كان اليف خالص الا لو حد قرب من خمارويه.. اوقات كان خمارويه يطلق الحيوانات دى كلها ويقعد يتفرج عليها وهي بتصطاد بعضها.. شكله كان بيعجب ناشونال جيوغرافيك.

نص ارض الجزيرة كانت مزروعة برسيم عlishان اسطبلات خمارويه الى كان فيها كل انواع الدواب.. اسطبلات الخيل كانت قصة لوحدها.. المقريزى قال عنها "وكان عرض الخيل بمصر من عجائب الاسلام الرابع" وعجائب الاسلام الاربعة هي حلبة سباق خيل خمارويه ورمضان في مكة والعيد في طرسوس والجمعة في بغداد.

لما كان بيخرج من القصر كنت تلاقى طوائف العساكر حواليه في ترتيب معين.. في المقدمة 1000 عسكرى سود لابسين اسود وشايلين دروع سوداء.. بعدهم الحرس الخصوصى بتاعه "المختاره".. دول ثيران بشرية كان اصلهم قطاع طرق وتابوا.. كانوا ييمشوا شبه عرايا معاهم سيوف ذهبية ضخمة كأنها جذوع النخل وعضلاتهم بتلمع تحت الشمس.. في وسطهم خمارويه على فرسه بينه وبينهم 10 متر.. خمارويه كان طويل ومهيّب في طلته.. بيقول ابن تُغرى انه محدش كان يقدر يتكلم أو يعطس أو يتنحج حتى وهو معدى.. وكأن الناس على رؤوسهم الطير.

جوازة بنته اسماء "قطر الندى" محتاجة كتاب لوحدها.. جوازه أفلست الدولة وكانت سبب من اسباب سقوطها.. خلينى اقولك بسرعة ان مهرها كان مليون درهم حاول بيهم الخليفة المعتضد بالله انه يرهق ميزانية خمارويه.. خمارويه حب يعلى على الخليفة فكلف جهاز بنته 400 الف دينار "الدينار يساوى 70 درهم تقريبا" وجهزها بجهاز ملوش مثيل في التاريخ اتنقل على ظهور الف جمل شايلين كميات غريبة من الذهب والمجوهرات والحرير.

في ليلة حنة قطر الندى امر خمارويه ان كل بنت بتتجهز للجواز يتوزع عليها ملابس واغراض للجهاز وكمية حنة لها ولأهلها.. ابتهج الناس بالجوازة وبقت الناس تعنى على شط النيل وقصاد البيوت وهى بتعجن الحنة "الحنة الحنة.. يا قطر الندى".. وهى الاغنية اللى ما زالت موجودة فى افراحنا لحد النهارده واللى غنتها ليلي نظمى بصوتها المبهج ومن قبلها شادية بصوتها اللى يسبب الركب.

فى يوم خروج اسماء علشان تروح لجوزها الخليفة.. خمارويه ساب مع ابن الجصاص "الويدنج بلانر بتاع الجوازه دى" 100 الف دينار احتياطى.. فكه يعنى لزوم الطريق.. على طول الطريق من مصر الى بغداد بنى خمارويه لبنته قصور علشان ترتاح فيها.. اللى هوزى الرست بتاع الصحراوى كده.. خرج لتوديع قطر الندى فى المشوار ده عمها واتنين من عماتها.. واحده منهم كان اسمها العباسة.. العباسة بنت قصر لقطر الندى عند اخر حدود مصر علشان تقضى فيه اخر ليلة قبل الوداع.. القصر ده معادش موجود.. مكانه حاليا قرية اسمها العباسة "نسبة الى عمه قطر الندى" تابعة لمركز ابو حماد فى الشرقية.. لحد النهارده بعض القرى فى الشرقية بيسموا المية العذبة "مية عباسى".. اعتقد دلوقتى فهمنا اصل المصطلح جه منين.. الجماعة بتوع الشرقية دول مش الهم حل الله الوكيل علاوله..

مع كل الثراء الفاحش ده.. الا ان خمارويه كان استغفر الله العظيم.. بيقول ابن سبط الجوزى فى مرآة الزمان انه كان كثير الفساد مع الخدم.. فى مرة طلب واحد منهم للفاحشة فى الحمام فالخادم استحى ورفض.. فأمر خمارويه بضربه لحد ما مات.. بعدها كرهه الخدم ودبحوه وهو نايم.. فى نفس السنة اللى وصلت فيها بنته قطر الندى عند عريسها الخليفة العباسى.

شفت انت الرغى ده كله؟

انا مقلتش ريع المكتوب عن الترف والثراء الفاحش اللى كان فيهم خمارويه.. ما ذكره المقرئى وابن تُغرى والقضاعى يشيب فعلا.. كل مره ازور مسجد ابن طولون اقف منبر قصاد قبة السلطان لاجين وانا بقول "إِنَّ الْمُبْدِرِينَ كَانُوا إِخْوَانَ الشَّيَاطِينِ.." وتبكي معايا حجارة المسجد على مصر واهلها.

توران شاه

عمرک ما تزهق من الحکایة دى ابداء..
حکایة السلطان الجدد الى هذه المرض والزوجة القویة والابن العبیط الى افکر ان الكرسى هیحمیة.
قصاد القبة دى فی شارع المعزمش بیجی فی بالی الا قلب الاب..
الأب هو الصالح نجم الدین ایوب.. اخر الایوبیین المحترمین فی مصر.. الى وصفه المقریزى فی السلوک بأنه کان شجاع مهیب کثیر الحیاء عفیف اللسان.. اخره لو شتم حد یقولہ یا "متخلف.."
الصالح ایوب خلف 4 صبیان ..
المغیث فتح الدین عمر "مات فی معتقل دمشق سنة 637 هـ .. الواحد "مات بدری فی دمشق" .. خلیل "ابنه من شجر الدر ومات وهو طفل" ..
والرابع یبقی غیاث الدین توران شاه.. موضوع حکایة النهارده.
الصالح ایوب مات بعد صراع مع المرض سنة 641 هـ.. فی عز حربه مع حملة لويس التاسع على مصر.. شجر الدر كانت هی المسئولة عن کل شیء فی البلد من اول ما السلطان رقد.. کتمت خبر موته الا عن اتین "اتابک الجیش فخر الدین یوسف والطواشی جمال الدین محسن رئیس عمال القصر" .. نقلت جثمانه فی سرية تامة من المنصورة الى قلعة الروضة الى کان یربى فیها الممالیک.. المراسلات تدخل خیمة السلطان "المیت" وتخرج قرارات مختومة.. فی نفس الوقت کلفت فارس اقطاعی انه یروح یجیب توران شاه من حصن کیفا علشان یجى یشیل شيلة ابوه.. هی كانت عایزه الحکم والممالیک مکنش عندهم اى مانع والمصریین مش بیحبوا السیاسة من زمان وسایبین الخلق للخالق.. المشكلة کلها كانت فی الخلیفة الى قاعد زى عواجیز الفرخ فی بغداد یترأى على خلق الله بینما هو نفسه مخدش فی ابد المغول غلوه لما دخلوا علیه دخلة رفاعى الدسوقی ولفوه فی واحدة من سجاجید قصره الفخمه وقتلوه رکلا بالاقدام.
الصالح ایوب مکنش محبذ فكرة تولى توران شاه الحکم من بعده.. وزیر حسام الدین بن ابی علی الح على الصالح ایوب انه یجیبه جمبه علشان لما یحین الاجل یبقى الولد جاهز للحکم من غیر قلق.. حاکم بعید عنک ولاد ایوب کان بینهم ما صنع الحداد.. یمکن کانوا یرتبوا لقتل بعض اکثر ما کانوا یرتبوا للدفاع عن بلادهم ضد الصلیبیین والمغول.. السلطان رفض وقاله "اجیبه ها هنا اقتله".
قلب الاب مقیش اصدق منه لأن الى مرى قرد عارف لعبه.. الصالح ایوب قال بنفسه عن ابنه انه صبی العقل اهوج فیہ خفه ومیل الى الطیش.. توران شاه کان فعلا مثال للسلطان الاحمق الى جه بلد میعرفش فیها حد فقرر یحدی مراكز القوى لحد ما نفخوه بكل ما تحمله کلمة نفخ من هواء.
توران شاه ورث من ابوه جیش مفتخر.. الى عمله فارس اقطاعی ورجالته "بیرس وقلاوون وسنقر الاشقر" فی لويس التاسع یتهرب فرنسا من ذکره لحد النهارده.. الممالیک خرطوا الفرنسیس تخریط.. قالت بعض المصادر ان الممالیک اسروا من جیش لويس 100 الف کانوا یقتلوا منهم کل یوم 300 لحد ما خلصوا.. ده غیر 800 الف دینار ذهب فدی الحاج لويس بیهم نفسه.
مکنش مطلوب من توران شاه اکثر من انه ینفذ وعوده للأمراء الى شقیة فی الحرب.. مکنش هیکسر حاجه لو ادى الامارة لفارس اقطاعی وهو کان یستحق.. کان لازم ینفذ وصية ابوه بخصوص شجر الدر.. مکنش لازم یحط بصمته الکریمة فی الجیش الى هو میعرفش عنه حاجه.. بس نقول ایه.. الغباوه بعید عنک.. توران شاه بدأ یعزل الأمراء الکبار ویعین مکنهم صبیانه.. مقیش منطق یخلیه یعین مسرور - الخدام بتاعه - استادار القصر.. ولا مقبول انه یعین الطواشی صبیح جاندار للقصر.. صبیح ده کان نیله لوحده.. عبد حبشی مکتبش التاریخ عنه الا انه کان عنتیل.. ویا ریته اکتفی بکده.. توران شاه لما کان بیسکر کان یجیب السیف ویقعد یضرب فی الشمع ویقول "هكذا افعل بالبحریة" .. الشمعة دى بیبرس ویضرب.. والشمعة دى اقطاعی ویضرب.
کل ده وصل للممالیک البحرية الى فضلوا ساکتین کرامة لابوه.. بس الکیل طفتح لما بعث لشجر الدر یهددها ویؤمرها ترجع فلوسها ومجوهراتها لخزینة السلطان.. مقیش راجل عاقل ولا مجنون یقرب من مجوهرات ست ابداء.. الستات فی الذهب متعرفش ابوها.. وكانت نتیجة ان شجر الدر بعثت للأمراء قائلهم "ان قتلتم توران شاه فعلى رضاکم بالمال" کل مملوک هیأخذ 200 دینار وکل امیر هیأخذ الف.
الدراما فی موت توران شاه تتعمل فیلم رعب.. فی احتفالية بالنصر على الصلیبیین بعد ما اکلوا وشربوا.. بیبرس البندقدارى ضربة بالسیف.. توران خد الضربة فی صوابعه وطلع یجرى على برج خشب کان جمب الخیمة بتاعته.. بیبرس بص لقلاوون وللممالیک حوالیه وقالهم "تمموه والا ابادکم" .. طلعا یجروا وراه على البرج وهما یرموه بالأسهم المشتعلة.. النار مسکت فیہ فنت من فوق البرج ناحیه النیل وهو بیصرخ "ما ارید الملك.. دعونى ارجع للحصن.. یا مسلمین.. ما فیکم من یجیرنى؟"
لما نط من فوق البرج لقی فارس اقطاعی مستنبیه تحت.. مسک فی رجليه وقاله ابوس ایدک الحقنى.. اقطاعی معبروش وطلع سیفه علشنا یتمم الى بدأ بیبرس.. توران رمى نفسه فی المية وهو مولع علشان یهرب منهم.. اقطاعی نط وراه فی المية وضربة بالسیف ضربه من جمب رقبته نفذت لحد تحت باطه.. سحب الممالیک جتته من المية ونزلوا فیہ ضرب بالسیوف لحد ما بقى لحمه مفرومة.. مات توران شاه مطعون ومحروق وغرقان.. ساب الممالیک جتته على الشط 3 ايام لحد ما استسمحهم رسول من رسل الخلیفة انهم یدفنه.
بیحکى بدر الدین العینی فی عقد الجمان ان ان الصالح ایوب قال لجمال الدین محسن "رئیس عمال القصر" خد معاک 4 ممالیک وروح اخنق اخویا العادل فی سجنه.. جمال الدین ملقاش الا 4 ممالیک هما الى قبلوا المهمة القدرة دى ..
عارف مین الممالیک دى؟
فارس اقطاعی وبیبرس وقلاوون ومملوک رابع ..
نفس ال 4 الى قتلوا توران شاه.. ابنه.. ویکمل ابن تغرى فی النجوم الزاهرة باقى الدراما وبیقول ان بعض الناس شافوا الصالح ایوب فی المنام بیقول ابیات شعر عن موت ابنه..
قتلوه شر قتله *** صار للعالم مثله

لما يراعوا فيه الا *** لا ولا وما كان قبله
ستراهم عن قليل *** لأقل الناس أكله
لما تروح شارع المعز لازم هتقف في كسرة الشارع الى عند الكمين بعد مجموعة قلاوون..
انسى شوية ان هنا بالظبط كان في باب من ابواب قصر الحكم الفاطمي اسمه باب الذهب لأن وزنة كان 500 كيلو من الذهب الخالص وركز مع قبة
الصالح ايوب..
هتلاقي الحجارة بتقولك بصوت على الحفنى بتاع فيلم الجزيرة.. خد بالك يا ولدى.. قلب الاب عمره ما يكذب ابدا.
الحكاية الثانية

في قلب شارع المعز اكيد مش هتاخذ بالك من تفاصيل كثير اوى بسبب انبهارك بمجموعة قلاوون..

معاك حق.. ثاني افخم مقبرة في العالم واقدم مستشفى رمد في الكوكب يستاهلوا كل الانبهار..

بس استأذذك.. سيبك من مجموعة قلاوون وخليك في القبة الى قصاها..

قبة الصالح أيوب..

في المكان ده مش بفتكر دايما الا "قلب الأب.."

الصالح نجم الدين أيوب كان اخر الايوبيين المحترمين في مصر.. وصفه المقرئ في السلوك بأنه "كان شجاع مهيب كثير الحياء عفيف
اللسان".. وكان له 4 صبيان..

المغيث فتح الدين عمر.. وده مات في معتقل دمشق..

الواحد.. مات طفل في دمشق برضه..

خليل.. ابنه من شجر الدر ومات وهو طفل..

والرابع غياث الدين توران شاه.. الى هو فعليا آخر سلطان حكم مصر من بيت أيوب وصاحب اغرب موته ممكن تسمع عنها في حياتك..

المرض هزم الصالح ايوب سنة 641هـ. في عز حربه مع حملة لويس التاسع على مصر. شجر الدر كانت هي المسئولة عن كل شيء في البلد
من اول ما السلطان رقد.. كتمت خبر موته الا عن اتنين.. اتابك الجيش فخر الدين يوسف والطواشي جمال الدين محسن رئيس عمال
القصر.. نقلت جثمانه في سرية تامة من المنصورة الى قلعة الروضة الى كان يربي فيها المماليك.. كانت المراسلات تدخل خيمة السلطان
"الميت" وتخرج قرارات مختومة.. في نفس الوقت كلفت قائد الجيش فارس الدين اقطاعي انه يروح يجيب توران شاه من حصن كيفا عشان
ييجي يشيل شيلة ابوه.. هي كانت عايزه الحكم والمماليك مكانش عندهم اى مانع طالما السبوبة شغالة والمصريين مش بيحبوا السياسة..
المشكلة كلها كانت في الخليفة العباسي الى قاعد زى خالتي اللتانة في بغداد يترياً على الخلق بينما هو نفسه مخدش في ايد المغول غلوه لما
اقتحموا عليه القصر ولفوه في سجاده وقتلوه ركلا بالأقدام.

الصالح ايوب مكانش عاوز توران شاه يمسك الحكم من بعده.. الوزير حسام الدين بن ابي على الح على الصالح ايوب انه يجيبه جمبه عشان
يجهزه للحكم.. حاكم تاريخ ولاد أيوب في الصراع على العرش اسود ومهيب.. لكن السلطان رفض وقاله "اجيبه الى ها هنا اقتله."

قلب الاب مفيش اصدق منه.. احب ابني صحيح.. لكني عارف انه اهبل لا يصلح للحكم.. الصالح ايوب قال بنفسه عن ابنه انه "صبي
العقل اهوج فيه خفه وميل الى الطيش".. توران شاه كان فعلا مثال للسلطان الاحمق الى جه بلد ميعرفش فيها حد فقرر يعمل فيها أنور
السادات ويتحدى مراكز القوى.. ولأن توران شاه مكانش منوفي.. فالأمراء نفخوه..

توران شاه ورث من ابوه جيش مفتخر.. الى عمله فارس اقطاعي ورجالته "بيبرس وقلاوون وسنقر الاشقر" في لويس التاسع بتهرب فرنسا من
ذكره لحد النهاردة.. المماليك خدوا الفرنسيين فوق سطوح الواد حمادة الى ورا مصنع الكراسي وعملوا فيهم كل حاجه عيب.. قالت بعض
المصادر ان المماليك اسروا من جيش لويس 100 الف كانوا بيقتلوا منهم كل يوم 300 لحد ما خلصوا.. ده غير 800 الف دينار ذهب فدي
الحاج لويس بيهم نفسه.

مكانش مطلوب من توران شاه أكثر من انه ينفذ وعوده للأمراء الى شقيت في الحرب.. مكانش هيخسر حاجه لو ادى الامارة لفارس اقطاعى وهو كان يستحق.. وينفذ وصية ابوه بخصوص شجر الدر وهى كمان تستحق.. مكانش لازم يجود ويحط بصمته في الجيش.. مكانش مطلوب منه أكثر من انه يسبب المكنة شغالة وهى بتطلع قماش زى الفل.

بس نقول ايه في الغباوه..

توران شاه بدأ يعزل الامراء الكبار ويعين مكانهم صبيان.. مفيش منطق يخليه يعين مسرور - الخادم بتاعه - استادار القصر.. ولا مقبول انه يعين الطواشى صبيح جاندار للقصر.. صبيح ده كان نيله لوحده.. عبد حبشى مكتبش التاريخ عنه الا انه كان عنيتل.. ويا ريته اكتفى بكده.. توران شاه لما كان بيسكر كان يجيب السيف ويقعد يضرب في الشمع ويقول "هكذا افعل بالبحرية".. الشمعة دى بيبرس ويضرب.. والشمعة دى اقطاعى ويضرب.

كل ده وصل للمماليك البحرية الى فضلوا ساكتين كرامة لابوه.. بس الكيل طفح لما بعث لشجر الدر يهددها ويؤمرها ترجع فلوسها ومجوهراتها لخزينة السلطان.. بعيدا عن كونها سلطنة قوية الشخصية.. مفيش راجل عاقل ابدأ ياخذ مجوهرات واحدة ست.. الستات في الذهب متعرفش ابوها..

وكانت النتيجة ان شجر الدر بعثت للأمراء وقالتلهم "ان قتلتم توران شاه فعلى رضاكم بالمال" كل مملوك هياخد 200 دينار وكل امير هياخد الف.. ودى ارقام كبيرة على فكره.

واتجمع المماليك على توران شاه وقتلوه.. مفيش جديد في الموت وكلنا رايعين.. لكن الدراما هنا في طريقة الموت نفسها..

في احتفالية بالنصر على الصليبيين بعد ما اكلوا وشربوا.. بيبرس البندقدارى ضربة بالسيف.. توران خد الضربة في صوابعه وطلع يجرى على برج خشب كان جمب الخيمة بتاعته.. بيبرس بص لقلاوون وللمماليك حواليه وقالهم "تمموه والا ابادكم".. طلعا يجروا وراه على البرج وهما بيرموه بالأسهل المشتعلة.. النار مسكت فيه فنط من فوق البرج ناحية النيل وهو بيصرخ "ما اريد الملك.. دعوني ارجع للحصن.. يا مسلمين.. ما فيكم من يجيرنى؟"

لما نط من فوق البرج لقي فارس اقطاعى مستنيه تحت.. مسك في رجله وقاله ابوس ايدك الحقنى.. اقطاعى معبروش وطلع سيفه علشنا يتمم الى بدأه بيبرس.. توران شاه رمى نفسه في المية وهو مولع علشان يهرب منهم.. اقطاعى نط وراه في المية وضربة بالسيف ضربه من جمب رقبته نفذت لحد تحت باطه.. سحب المماليك جتته من المية ونزلوا فيه ضرب بالسيف لحد ما بقى لحمة مفرومة.. علشان يموت توران شاه مطعون ومحروق وغرقان.. بعدها ساب المماليك جتته على الشط 3 ايام لحد ما استسمحهم رسول من رسل الخليفة انهم يدفونه.

لسه الدراما لها بقية..

بيحكى بدر الدين العيني في عقد الجمان ان ان الصالح ايوب طلب من جمال الدين محسن "رئيس عمال القصر" انه ياخذ 4 ممالك ويروح يخنق اخوه العادل في سجنه.. جمال الدين محسن ملقاش الا 4 ممالك هما الى قبلوا المهمة القذرة دى..

فارس اقطاعى وبيبرس البندقدارى وسيف قلاوون وسنقر الأشقر..

سبحان الله.. نفس ال 4 الى قتلوا توران شاه.. ابنه..

وبيكمل ابن تغرى في النجوم الزاهرة باقى الدراما ويقول ان بعض الناس شافوا الصالح ايوب في المنام بيقول ابيات شعر عن موت ابنه..

قتلوه شر قتله *** صار للعالم مثله

لما يراعوا فيه الا *** لا ولا وما كان قبله

ستراهم عن قليل *** لأقل الناس أكله

وكأن الحكمة الخالدة تفرض نفسها..

"من عاش بالسيف مات به"

(*) سؤال يتطلب بحث..

ما هو الاسم الحقيقي للسلطنة شجر الدر؟؟



بيبرس

فاكرين احمد سعيد عبد الغنى كان اسمه ايه فى مسلسل عباس الابيض؟
طيب فاكرين البرنامج الاذاعى "لو كنت مكانى" بتاع خبرنى يا بابا ضياء.. ماذا تفعل لو كنت مكانى..
المذيع بتاعه كان اسمه ايه؟

السؤال بقى ..

ليه الناس لسه بتسمى بيبرس رغم ان الراسخ فى اذهان الناس ان قطز هو صاحب انتصار عين جالوت "وده تفصيلاً مش صح"؟
اقولك يا سيدى..

فى ايام حكم السلطان بيبرس حصلت فى مصر مجاعة مرعبة.. اوعوا تصدقوا كلام نبيل الحلفاوى فى مسلسل القاهرة-كعبول لما قال ان مصر معداش عليها مجاعات ولا اوبئة.. ده اسمه المادة الخام للبهيد.. مصر اتفرمت من المجاعات وانطحنت من الفيضانات واتفرتكت من الاوبئة اكثر من مره..

بس خلىنا فى مجاعة شهر ربيع الثانى من سنة 662 هـ.. الى حصلت فى ايام السلطان بيبرس..

بيحكى المقرئى فى السلوك ان الاسعار ولعت.. اردب القمح وصل 105 درهم واردب الشعير وصل 70 درهم.. 3 ارطال العيش كانوا بدرهم ورطل اللحمة كان بدرهم وثلت.. والاسعار فى اسكندرية كانت اغلى من القاهرة كمان "طول عمرها كده".. منعرفش هل كده الاسعار غاليه ولا لا.. بس السطر الى جاى من كتاب المقرئى يقول انها فعلا كانت اسعار فوق طاقة الناس..

"ثم اشتد الحال بالناس حتى اكلوا ورق اللفت والكرب ونحوه وخرجوا الى الريف فأكلوا عروق الفول الأخضر."

حاول بيبرس يتصرف ويفرض تسعيره اجباريه على التجار تراعى الفقراء.. بس محدش بيغلب التجار ابدًا.. الاسعار غليت زياده وعدد الفقراء تضاعف لدرجة ان السلطان الغى التسعيره وقرر ياخذ اجراء تانى فورى يتابعه بنفسه علشان يواجه المجاعة دى.

السلطان جمع الامراء اصحاب الاراضى والزهم ببيعوا كل يوم 500 اردب قمح بسعر مخفض لصالح الفقراء بحيث ان كل واحد يشتري الى يكفيه وبس علشان الناس اياها الى بتحب تخزين ..

بس برضه الامور متحسنتش كتير وفضل عدد الفقراء فى الطالع.

قام السلطان بغير الاستراتيجية تانى وامر بجمع اسماء الفقراء وفتح خزنته الشخصية علشان يتكفل بالاف منهم وقال "والله لو كانت عندى غله تكفى هذا العالم لفرقتها".. وخد الاف تانية حطهم فى عهدة ابنه بركة خان "الى كان عمره وقتها 3 سنين".. ولما فضل لسه فى فقره فى البلد امر المسئول عن ديوان الجيش انه يخصص لكل امير من امراء الجيش مجموعة من الفقراء يتكفل بيهم.. كل امير على حسب قدرته.

باقى الفقراء جمعهم السلطان على ابواب القلعة وجمع التجار الكبار واغنياء البلد وقسم الفقراء عليهم كل واحد بحسب قدرته.. والى القاهرة صارم الدين المسعودى مثلاً بيبرس حط فى عهده 100 فقير.. الوالى قاله انه فعلا متكفل ب 100 فقير من قبل ما السلطان يقول.. السلطان قاله "ذلك فعلته ابتداء من نفسك.. وهذه المائه خذها لأجلى."

بعد كده وقف السلطان يخطب فى الامراء والاغنياء وقالهم "هؤلاء المساكين قد جمعناهم اليوم وانقضى نصف النهار.. فادفعوا لكل منهم نصف درهم يتقوت به خبزاً.. ومن غد يتقرر الحال."

عارف الناس عملت ايه لما لقت السلطان بيعمل كده؟؟

الكلام لسه للمقرئى.. بيقول ان الناس فتحت المخازن وفرت الصدقات.. فانحط السعر 20 درهم وقلت الفقراء.. واستمر الحال الى شهر رمضان حتى انحل "قل" السعر فى يوم واحد 40 درهم للاردب.. وانتهت الازمة على خير.

واخذ بالك من سرعة رد فعل السلطان؟

المفروض ان السلطان ملوش حاجه عند الاغنياء طالما بيأدوا الزكاة "او بيدفعوا الضرائب".. ده القانون.. لكن روح القانون بتقول انه مسئول مسئولية مباشرة عن احوال الناس الى بيحكمهم للدرجة الى تخليه يخاف لاحسن بغله تتكعبل وتتأذى فى حدود مملكته.

اللقب الرسمى للسلطان بيبرس كان "الظاهر".. بس الناس لقبوه بأبو الفقراء والمساكين.. اعتقد دلوقتى عرفنا ليه.. الناس كانت بتحب السلطان بيبرس مش علشان كان المؤسس الحقيقى للسلطنة المملوكية العظيمة ولا علشان السلطنة وصلت فى عصره الى اقصى اتساع ممكن.. مش علشان انقذ الاسلام فى عين جالوت ولا علشان كان مربى الرعب لبوهيموند السادس امير انطاكيا.. الفرسان كتير والحروب اكثر وعمر الجيوش ما خليت من محاربين شجعان تندق سيرتهم على الرماية ..

بيبرس عاش فى ذاكرة الناس لأنه كان رحيم بالفقراء..

رغم ان بيبرس هو قاتل قطز بالمشاركة مع باقى الامراء بعد عين جالوت زى ما قال بيبرس الدوادار فى التحفة المملوكية فى الدولة التركية.. مش مهم.. ماهو قطز نفسه كان مشارك فى قتل فارس الدين اقطاى استاذ بيبرس قبل كده زى ما قال ابن ايبك فى كنز الدرر وجامع الغرر.. دى كانت سمة العصر ده وقتها.. الحكم لمن غلب.. المهم لما قتل ومسك الحكم.. عمل ايه مع الفقراء؟؟

السيرة الشعبية للسلطان بيبرس فيها كلام كتير مش حقيقى.. بس ده اسمه التاريخ الاجتماعى الى الناس دايمًا بتكتبه بالقلوب مش بالعقول.. الناس دايمًا بتوصف الحاكم بوصف حالتها.. مش زى ما هو يرسم نفسه.

وانت خارج من متحف الشرطة فى قلعة الجبل.. بص تحت على اليمين. فى مستوى ركبك او اقل شوية هتشوف رأس الاسد دى.

دى اسمها "رنك" او شارة السلطان بيبرس..

ركز معاها شوية هتلاقيها اتكلمت وبتقولك اقرأ الفاتحة للسلطان..

اصله يستاهل.

باب العزب

عمرك شفت مكان وقف بيه الزمن عند توقيت معين؟

اهو الباب ده اكبر مثال على كده ..

ده اسمه باب العزب .. اهم ابواب القلعة على الاطلاق .. زمان كان اسمه باب الاسطبل علشان وراه كان اسطبل الخيل السلطاني .. وبعدين ركبوله سلسلة تحميه بعد ايام القلق بتاعة السلطان فرج بن برفوق فبقى اسمه باب السلسلة .. في ايام العثمانيين جدده الأمير رضوان كتحدا الجلفى "اغا اوجاق عزبان" سنة 1754م وبقي المقر الرسمي بتاعهم فبقى اسمه باب العزب.

مش هتشوف المنظر ده الا من جوه القلعة .. بعد ما تخرج من المتحف الحرى هتلاقى على يمينك باب حديد ممنوع المرور منه .. ده اسمه باب وسطانى .. استأذن من المسئول هناك وهيخليك تدخل .. لما تعدى من باب وسطانى امشى في حدود 20 متر وبعدين اكسر شمال مع بداية الممر الترابى المتعرج المنحدر الى اخره الباب الكبير ده .. المبنى الكبير الى على شمالك يبقى برج السباع الى فيه متحف الشرطة .. مستغربش لو حسيت ان قلبك مقبوض .. الممر الى انت داخله ده وقف فيه الزمن عند يوم الجمعة 1 مارس 1811م.

ده اسمه الممر الصخرى ..

في الممر ده ادرك المماليك -بعد فوات الاوان- ان محمد على مش بيهزر .. مكانوش متصورين ان دعوته ليهم للاحتفال بتنصيب ابنه طوسون صارى عسكر حملة الحجاز هي في حقيقتها تذكرة ذهاب للآخره بلا عودة .. مكانوش فاهمين انه جاب اخره من مشاكلهم فقرر ينزل بكلمة النهاية فوق ادمغتهم .. مخدوش بالهم يومها ان باب العزب الى مفروض يخرجوا منه غير الباب الى دخلوا منه وسابوا عنده سلاحهم احتراماً للبasha .. ملفتش نظرهم ان باب وسطانى ده جديد ومكانش موجود قبل كده .. كل الى كان في بالهم وقتها ان البasha انكسر بعد طول صراع مع عثمان بك البرديسى ومحمد بك الالفي وعمر مكرم والانجليز والباب العالي فقرر اخيرا يمدلهم ايده بالسلام علشان عرف قيمتهم.

كانوا فاكرين حاجات كثير اوى .. كلها طلعت غلط لما انضربت طلقة الاشارة في الهواء ..

محمد على رسم خطة متخرش المية .. الفكرة كانت من دراعه اليمين كتحدا القاهرة المفترى .. محمد باشا لاذ اوغلى .. محدش عرف بالتخطيط ولا ساعة الصفر الا 4 افراد هما محور الاحداث .. محمد باشا لاذ اوغلى المخرج العام لليوم كله .. صالح قوچ "رئيس كتاب حرس الشرف" .. حسن باشا "قائد عسكر الارناؤوط الى هتتفد" .. وابراهيم اغا "حارس باب العزب" ..

السيناريو كالات ..

طوسون باشا هيمشى في اول التشريفه الى خارجه من باب العزب وجمبه صالح قوچ .. حرس الشرف على الصفيين بيحيوا المماليك الى ماشية تتمختر بخيولهم المزينة وملابسهم الفخمة وعلى اكتافهم فرو الثعالب النادر .. على البطون احزمة ذهبية مفهياش الاخاخر للزينة .. الممر الضيق الى مش بيساع اكثر من 3 افراد متجاورين على الخيل حسس المماليك ان التحية لكل واحد فيهم على حده .. في ميدان الرميلى خارج الباب وقفت الجموع تحتفل بالحملة .. الفقراء والمساكين زايطين في الهيصبة والديبايح .. المماليك شايفين كل ده من جوا الممر وبيضحكوا لبعض فرحانين بانتصارهم على محمد على .. في اللحظة الى عدت كتيبة حرس الشرف باب العزب .. قفل ابراهيم اغا الباب فجأة وانضربت رصاصة في الهواء .. ثوانى من الصمت الكثيب المترقب لم ينقطع بعدها صوت الرصاص والصراخ والعويل في الممر لمدة 6 ساعات كاملة .. 469 روح صعدت تشكو للسماء غدر البasha وقسوته.

امين بك حظه كان حلو انه كان في اخر الركب لانه اصغرههم سنأ .. قدر يتشعبط بحصانه على سور القلعة وينط بيه من ارتفاع اكثر من 20 متر علشان تندق رقية الحصان مع ارتطامه بالارض ويطلع امين بك يجرى مرعوب لحد ما وصل سوريا وهو متخفى في هدموم عبيط القرية . الجبرتي لم يبرىء ساحة البasha من الحادث رغم ان محمد على قتل من المماليك في حروبه معاهم اكثر بكثير من 470 بنى ادم .. القاسى في المذبحة دى هو الغدر .. هي كانت ضرورة سياسية استفاد منها محمد على فوق ما اى حد يتصور واتغير حال مصر بعدها تماما "للافضل" حسب ما سرد عبد الرحمن الرافعى في تاريخه لعصر محمد على .. بس الى خسره محمد على ومصر من وراه بسبب المذبحة دى ميعوضوش اى نجاح من اى نوع . بيقول الجبرتي ان اول ضحايا المذبحة دى كان شاهين بك الالفي .. كبير المماليك الالفية .. خد رصاصة في رقبته جابته الارض .. بعدها عسكر الارناؤوط قطعوا رقبته وحطوها في شوال خيش علشان يقدموها للبasha وباخدوا قصاها بقشيش .

الارناؤوط اصابهم جنون القتل في اليوم ده .. لم يرحموا اعزل او يستجيبوا الى طلب رحمة .. كثير من المماليك كان بيتعلق برجليهم ويوعدهم بفلوس وهدايا اكثر من الى البasha هيدفعه .. بس الغل كان راكهم لدرجة الجنون .. القتل بالشكل ده ينم عن كراهية قديمة مدفونة تحت طبقة ضعيفة من حسن الجوار او الشراكة التجارية .. حكى الجبرتي ان المملوكية مثلا كانت بترفض اى شخص تركى يطلبها للزواج مهما بلغ منصبه .. بينما تقبل بصعلوك مملوك محبلىوش اللضا وهما المشهورين بتكاليف جوازاتهم العالية .. في اليوم ده سحق الارناؤوط غرور المماليك الى الابد وبلا رجعه . سليمان بك البواب كان واحد من الناس الى حلاوة الروح خلته يهرب على جناح الحريم والرصاص مخرم جنته .. اترى تحت رجلين امينة هانم مرات محمد على الاثيرة وهو ببصرخ "انا في جوار الحريم" .. عار كبير في حقه انه يطلب النجدة من حرمة .. امينه هانم اجارته بس محمد على ولا كأنه سمع حاجه .. بص للعساكر بصره من اياهم .. جت العساكر وجرجرت جسم سليمان بك زى الخروف وقطعوا رقبته قصا الست الى طلب منها النجدة .. ومن يومها امينة هانم قفلت من جوزها وحرمت نفسها عليه .. وهو الموقف الى هز محمد على وخلاه يتفادى اى كلام عن الموضوع ده لحد ما مات .

كان في ممالك في الحفلة مش تبع خناقة السلطة الى بين محمد على وشاهين بك الالفي زى احمد بك الكيلارجى ويوسف بك أبو دياب وحسن بك الصغير وسليم بك الدمرجي ورستم بك الشرقاوي .. دول اصابهم الرعب من الى حصل واترموا تحت رجلين طوسون طالبين الرحمة .. طوسون من هول الموقف فقد القدرة على الكلام .. وقبل ما يسترد وعيه ويقول اى كلمة كان الارناؤوط ساحبين رؤوسهم في الاكياس الخيش علشان البقشيش .

الى حصل من بعدها في القلعة وفي الاسواق وفي بيت الشيخ الشرقاوى وفي ربوع مصر كلها يلزمه مجلدات.. مصر من بعد اليوم ده انكسرت وعرفت
الخوف تانى بعد ما كانت بدأت تشم نفسها بسبب عمر مكرم.. ندم الباشا كتير على اليوم ده وحاول يصلح في البلد على اد ما قدر علشان يفتكره
الناس بحاجه غير الدم والغدر.. سخر المؤرخين يكتبوا الى على هواه وخاض حروب عظيمه ضد العثمانيين انتصر فيها كلها.. سجل التاريخ فعلا
ان محمد على بنى دولة حديثة فضلت شغاله على حسه بعد موته بالقصور الذاقى لمدة 140 سنة رغم خيبته في عياله.. الاف الكتب اتكلمت عن
محمد على وانجازاته وعظمته.. بس ولا كتاب فيهم قدر يسقط يوم الجمعة الحزين ده ابدأ.
لعنة الدم الحرام.. لحد النهارده جدران الممر شايله في قلبها صرخات المماليك وهما بيتقتلوا.. لحد النهارده وانت ماشى في الممر الصخرى هتتلفت
يمين وشمال في رعب احسن تجيلك رصاصة كده وللا كده من عسكر الارناؤوط الى قصاص الفلوس نسيوا الدين والاخلاق.. نجحت الصفقة
الثلاثية بين محمد على ولاظ اوغلى وابليس وانفرد محمد على بحكم مصر وكتب التاريخ زى ما حب.
لكن الزمن توقف في باب العزب عند يوم الجمعة.. 1 مارس.. سنة 1811م.. الساعة 10 صباحاً.
بئس الصفقة الخاسرة.

السلطان حسن

هذا مسجد تقع في هواه دون سبب..

هو مش فخم زى الرفاعي ولا له تاريخ الازهر.. لا هو اقدم من مسجد عمرو ولا حتى حواليه اساطير زى ابن طولون.

وَمَعَ ذَلِكَ.. وَاحِدَ زِيَاوِيَا وَقَفَ قَصَادَهُ مَتْنَح..

فی سرائیکد فی المسجد ده ..

يُمكن علشان ضخم؟

طب ما القلعة أكبر واضخم ومع ذلك عمرك أبدا ما تحس ان قلبك مخطوف وانت واقف قصاد مسجد افندينا زي ما هتحس وانت واقف جمب فواره الوضوء البسيطة في مسجد السلطان حسن.

لو قرأت اللوحة على شمالك وانت داخل المسجد هتلاقي مكتوب "مسجد ومدرسة السلطان حسن".. الى انت شايفه ده كله اساسا مدرسة مش مسجد.. بناها السلطان الناصر بدر الدين ابو المعالي الحسن.. المولود باسم "قمارى".. الابن الثامن لسلطان مصر الاقوى.. الناصر محمد بن قلاوون.

حياة الناصر حسن كانت قصيرة وحظه ذكر.. خطوه على العرش وهو عنده 11 سنة وبعد 3 سنين شالوه رموه وسط الحريم لمدة 4 سنين بعدها خطوه تاي، علم العرش.. وهو مش فاهم جه له اولاي، ولا جه له تاي.

المسجد نفسه ميساعش 5000 مصلی.. الحجم المہول الی انت شایفہ من برہ وانت واقف فی المیدان دہ عبارہ عن مدرستہ کان عایش فیہا 500 طالب باقامۃ کاملہ.. واکلین شاریین نایمین بیآخدوا مصروف معتبر.. الطلبة کانت بتتلقی کل انواع العلوم المتاحۃ وقتہا بشكل یومی.. وانت واقف عند فوارۃ الوضوء ہتلاق 4 ایوانات کان بیقعد فیہا طلبۃ العلم الشرعی حوالین الشیخ یعلمہم اصول المذہب الشافعی او الحنفی او المالکی او الحنبلی.. ورا حیطان المسجد الی انت شایفہا دی باقی المدرستہ.. کانت الفصول - لو جازت التسمیۃ - مفتوحۃ لطلاب الطب والفلك والہندستہ.. ہی مقفولۃ للزوار حالیا.. بس تقدر تشوفہا بسہولۃ وتتحیل خلیۃ النحل الی کانت شغالۃ فی المسجد ما بین الطلبة و 340 موظف میری قایمین علی خدمتہم.. بالاضافۃ الی 120 مقرئ وظیفتمہم قراءۃ القرآن بشكل مستمر لیل ونہار فی قبۃ الدفن الی بناہا السلطان لنفسہ.. دہ غیر 200 طفل یتیم مقیمین فی نفس المکان.. کل الی انت شایفہ دہ کان بیصرف علیہ السلطان من مالہ الخاص.. السلطان بنی جامعۃ عین شمس بتاعۃ.. بس من غیر تنسیق ولا دکاترۃ ینجحوا الی علی کیفہم وسقطوا الی شکلہ وحش..

لما تاخذك عظمة المكان ممكن ييجي في بالك ان السلطان حسن كان فارس قوى مغوار طول بعرض والناس بتخاف منه.. بس الحقيقة انه كان طيب وتنازع رينا خالص.. وصفه ان تغري بأنه اصهب ووشه فيه نمش.. شبه حزلقوم يعني.

كان مقرر للمسجد 4 مآذن مش مآذنتين زى ما هو موجود دلوقتى.. المسجد اتكلف كتير في وقت البلد كانت بتنطحن فيه من الطاعون الأسود الى حصد ارواح ربع سكان الكوكب.. السلطان عامل حجر صحى في سرياقوس بينما العمال شغالين في القاهرة.. والموت كل يوم بيحصد مئات الارواح ولا يبالى.

صحن المسجد اتكلف 100 الف درهم.. لما السلطان زهق من كثر المصاريف فضفض مرة للطواشي مقبل الشامي وقاله "لولا ان يقال ملك مصر عجز عن إتمام بناء بناه.. لترك بناء هذا الجامع من كثرة ما صُرف عليه".. بس أهو.. السلطان صمم يكمل البناء علشان يمتص البطالة وينسى الناس هم البوء الملعون.

يوم السبت 16 ربيع الثاني سنة 762 هـ. قامت عاصفة شديدة غطت القاهرة بالتراب ووقعت المأذنة الثالثة الى كانت فوق باب الدخول على مكتب السبيل علشان يموت تحتها 300 طفل من الطلبة الى السلطان كان بيصرف عليهم.. مفلتش من الكارثة دى الا 6 أطفال زى ما ذكر المقريري في الخطط.. بعد الكارثة دى كان طبيعى ان السلطان يكتفى بالمأذنتين الى اتعملوا.. ويمكن ده سر المدرسة الكبير لحد النهارده .. انها بناء لم يكتمل..

الشيخ بهاء الدين ابو حامد السبكي حب يواسي السلطان فكتب قصيدة قال فيها:

إن المنارة لم تسقط لمنقصة *** لكن لسر خفي قد تبين لي

من تحتها قرئ القرآن فاستمعت *** فالوجد في الحال أداها إلى الميل

لو أنزل الله قرآنا على جبل *** تصدعت رأسه من شدة الوجع

تلك الحجارة لم تنقُضْ بل هبطت *** من خشية الله لا للضعف والخلل

و غاب سلطانها فاستوحشت *** و رمت بنفسها لجوى فى القلب مشتعل

يا دين النبی ..

بقي الحجاره لما غاب سلطانها في سراقوس.. استوحشت وراحت راميده نفسها علم العيال!!

الحجارة انتحرت من كثر شوقها للسلطان يعني!!!

انتو بتجيبوا المهارات دي منين يا ولاد ال****

الناس اكتأبت من سقوط المأذنة واعتبروه نذير شؤم بزوال ملك السلطان الى قال عنه المقريزي "ولم يكن قبله ولا بعده ولا في الدولة التركية مثله".¹ وسبحان الله.. بعد 33 يوم بالظبط تصاعد التوتر بين السلطان وبين الأمير بلُغا العمرى.. السلطان كان عاوز يعقله.. لكن بلُغا كان مستعد وعمل فخ للسلطان علشان يموت السلطان متخبط بسيف ممالك يلُغا وهو عنده 26 سنة ويفضل مكان دفنه مجهول.. المسكين حتى منفدش في القبة التي كان يقفاله المشايخ فيها القرآن ليل ونهار.

عارف انا لو مكان بلنغا العمرى ده كنت عملت ايه فى الشيخ بهاء الدين السيدي بتاع الحجارة استوحشت ده؟

انا كنت احبه من رقبته و انا

اه وربنا..
الحكاية الثانية

في رحاب السلطان حسن..

مش عارف قدرت يومها اقنع امي ازاى انها تيجي معايا علشان افسحها في مساجد القاهرة الكبيرة.. مجهود بدني شاق على ست في أواخر الستينات حركتها بطيئة ومفاصلها انتحلت وصحتها راحت في تربية العيال الى كانوا زى النسمة الله الوكيل 🤔🤔🤔 .

أخيرا وافقت بعد الحاح وإصرار رغم انها مقتنعه ان في حرامية منتظرين اننا نخرج من البيت علشان ينطوا عليه ويسرقوه.. رغم ان جيرانا كلهم بيسيبوا بيوتهم ويسافروا والبشر في الكوكب بتسافر من اى مكان لأى مكان ومش بيحصل حاجه.. بس احنا بالذات لو سيبنا البيت.. هيتسرق.

بدأنا اليوم بزيارة قلعة صلاح الدين ومسجد الناصر قلاوون ومسجد محمد على.. بعد كده نزلنا على ميدان القلعة علشان مسجد الرفاعي ثم هرم مصر الرابع.. مسجد السلطان حسن.

المسجد ده مش هتقدر تحس بجماله الا لما تزوره.. ولما تزوره لازم حد متخصص يكون معاك يشرحلك تفاصيله وقصصه الكثير اوى.. ولما هتعرف هتقع اسير هواه ومش هتبقى عاوز تمشى.. الرئيس الأمريكي باراك أوباما مثلا وقف في المسجد ده سنة 2009 متنح ومش مصدق ان مصر فيها حاجه زى كده.

المسجد ده أساسا مدرسه بناها السلطان الملك الناصر بدر الدين أبو المحاسن الحسن بن الناصر محمد بن المنصور سيف الدين قلاوون الألفي العلائي الصالحي.. سيرته كملك وانسان لن تثير في نفسك الا الشفقة والحزن عليه.. هبقى احكيها كلها بالتفصيل لو حد مهتم.. بس المعلومات الأساسية عنه انه كان شخص خير جدا ومحبوب من كل الناس ما عدا الأمير الى قتله "كان اسمه يلغا العمري".. حصل في أيام الناصر حسن أسوأ طاعون ضرب كوكب الأرض في تاريخها كله.. الطاعون الأسود الى قتل ربع سكان الكوكب وقتها وبسببه قرر السلطان يبنى المسجد ده علشان يرفه عن الناس ويرفع معنوياتهم وعلشان كمان يلاقى مصرف لكم الأموال الهائل الى تجمع في خزينة الدولة بسبب كثرة الوفيات.. أجيال كاملة من أسر كبيرة كانت بتموت في نفس اليوم.. بالتالي مفيش ورثة شرعيين والفلوس كانت بتروح لخزينة البلد.

السلطان حسن كان وسيم وحليوة. طويل القامة ابيض البشرة.. عنده نمش في وشه وشعره برتقالي مموج..

حاول تتخيل معايا الوصف كده..

شبه حزلقوم.. صح؟؟

بالظبط.. ده الوصف الى ذكره المؤرخ أبو المحاسن جمال الدين يوسف بن الأمير سيف الدين تغري بردي في كتابه "النجوم الزاهرة في ملوك مصر والقاهرة".


هتسأل أيه السر في تعلق الناس بالمكان ده.. ليه الناس بتقع أسيرة هواة ومحبه.. ليه الحكومة قررت تحطه على ورقة ال 100 جنيه..

اقولك ان عندي الإجابات كلها.. لو لقيت حد مهتم.. هحكي الحكاية كلها بالتفصيل.

بعد ما خلصت اليوم وراح صوتي من كتر الشرح.. سألت امي.. ها يا ست الكل.. ايه رأيك.. عجبك اليوم والمكان؟

قالتلى شفت بقى.. لو كنت دخلت الجمعية ام 300 جنيه مع طنط افتخار الى قتلتك عليها.. كان زمانك قدرت تعمل مسجد زى ده بدل ما انت مضيع فلوسك على الكتب.. كل العيال فلحت يا ربي وبقت سلاطين الا انا الى ابني خايب 🤔🤔🤔 .

وسط انشغالك بأمور الدنيا اوعى تنسى اهلك.. هما الثروة الحقيقية.. وللأسف مش فاضل كثير.



فاضل باشا

زمان قالوا مركب الضراير ولعت ..
تفتكروا عندهم حق وللا المثل في تجنى على الستات ؟
نشوف ..

خلينا نسرح مع ذكريات أمير من الأسرة العلوية أخذ صابونة من أخوه بكل ما تحمله كلمة الصابون من رغاوى.. أمير اسمه مصطفى بهجت فاضل.
مصطفى بهجت فاضل إسم مش معروف شعبيا.. مش كثير يعرفوا انه يبقى أخ غير شقيق الخديو إسماعيل.. وانه كان من الجيل الأول الى اتعلم في فرنسا ولما رجع مسك وزارة المعارف وبعدين المالية وبعدين العدل.. مش كثير كمان يعرفوا ان منطقة مصطفى كامل في اسكندرية كان اسمها منطقة مصطفى فاضل.. بس بعد 52 بقت مصطفى كامل.. يعنى.. مش عاوزين حاجه تفكرنا بالاسرة دى.. ومن مصطفى لمصطفى مفترش كثير حيث ان واحد فاضل والثاني كامل.. كلها صفات حلوه يعنى.

ابو السباع عمل حركة لثيمة بالاتفاق مع السلطان عبد العزيز بتاع اسطنبول علشان يستصدر فرمان يخلي ولاية العهد لأكبر ابنائه هو مش اكبر الذكور في الأسرة العلوية.. سمعه دفع فلوس كثير علشان فرمان ده ومصر كلها دفعت الثمن غالى بعد كده لما لبست في توفيق.. الأمير مصطفى فاضل كمان دفع الثمن لانه بالفرمان ده اتألف من ولاية العهد لصالح توفيق.

ابو السباع بنى قصر اخر ابهة في منطقة الحصوة "العباسية حاليا" علشان امه الست خوشيار هانم صدرها كان بينقح عليها والحكام نصحوها بالجو الجاف.. في نفس الوقت علشان هو راجل بيحب الأبهة.. بنالها قصر تانى على الكورنيش في جاردن سیتی.. المنطقة الى زمان كان اسمها تل العقارب.. إسماعيل كان ابن بار بأمه مغيث كلام.. سمى قصر جاردن سیتی قصر الوالدة باشا.. خوشيار هانم سابت قصر الزعفران "جامعة عين شمس دلوقتي" وراحت سكنت في جاردن سیتی..

مين سكن طيب في قصر الزعفران مكان خوشيار هانم ؟

ضرتها.. الست الفت قادين.. ام الامير مصطفى بهجت فاضل.. دخلت عين شمس اهو وهى مكنتش جايبه مجموع..
الفت هانم راسها والف سيف متدخلش القصر على عفش خوشيار ابادا.. صرفت 15 ألف جنيه بحالهم على عفش جديد.. ومش بعيد تكون كتبت ابو السباع قايمة بيه كمان.. ستات مفترية.

الحركة دى مفلتت من تحت ضرس خوشيار هانم.. الولاية استنت بعد ما الفت قادين فرشت القصر كله.. وهوب راحت متبرعه بيه للجيش.. واعترضى بقى يا الفت علشان تبقى عدوة الوطن.

سابت الفت القصر وهى بتعيط على التحف والكنب الإيطالى المذهب.. الموضوع ده معداش على البرنس مصطفى كده.. الراجل جاب مهندسين فرنسيين وحل كيسه وراح باني قصر آخر عظمه في درب الجماميز.. حاجه كده يحكوا ويتحاكوا عليها لعشرات السنين قدام.. بالعند في اسماعيل واهم.. مكنتش مضايق الفت هانم في القصر الجديد الا انها لاحظت وجود مسجد قديم متهدم لازق في القصر علطول.. مسجد بناه زمان أمير اسمه بشتك الناصري.. بشتك ده كان راجل ديله نجس وفلاقي.. قال ابن تغرى عنه "كان لا يعف عن مليحه او قبيحة".

الفت هانم عملت ايه بقي ؟؟

أمرت بتجديد المسجد وتوسيعه علشان يليق بجوار قصر البرنس مصطفى.. الولاية مش بس برشطت على المسجد.. دى كمان راحت مسمياه على اسم ابنها.. مسجد الأمير مصطفى فاضل.. مصطفى فاضل كان راجل خير وايده في بق الجعان.. علشان كده الناس حبته.. الى حصل ان الجامع ده بقى زحمة باستمرار.. حب الناس المسجد من حبههم لباني المسجد وبدأ اسم الامير مصطفى بهجت يتردد بين الناس.
تسكت خوشيار وتتهد على كده ؟؟

ابدا..

الولاية قررت انها تبني مسجد أكبر وأفخم من مسجد ابن ضرتها.. في افخم مكان في مصر.. ميدان الرميلة.. قصاد مسجد السلطان حسن علطول.. مش بس كده.. دى هتخصص جواه جزء تندفن فيه هى وسلالتها.. وطظ فيها الولاية المعرقة الفت دى.. بس يشاء ربك ان خوشيار تموت قبل اكتمال بناء المسجد الى اصبح حاليا واحد من تحف مصر المعمارية يخليك دايمًا تسأل.. ايه الداعي لبناء مسجد بالفخامة دى قصاد مسجد اخر بالفخامة دى ؟

والاجابة ببساطة.. نفسنة الضراير.

حكاوى مسجد الرفاعي ملهاش نهاية.. من اول مقام الشيخ على ابو شباك مرورا بالصليب الكبير على واجهة المسجد وحتى نموذج الكنيسة المصغر جواه.

تمر الأيام وتسقط الملكية.. قصر الأمير مصطفى فاضل تحول الى المدرسة الخديوية الثانوية العسكرية "الموجودة حاليا في درب الجماميز في السيدة زينب" الناس نسيت خالص ان مسجد الأمير مصطفى فاضل كان زمان مسجد الأمير بشتك الناصري أبو ديل نجس.. كام سنه كمان وبيجي السلطان حسين كامل يقعد على العرش ويظهر في مسجد الأمير مصطفى مقرئ شاب صوته كأنه الف قيثاره بتعزف لحن مهيب.. إذا سمعته بيقراً القرآن فكأنك تغترف من ثمار الجنة.. قارئ فضل يقرأ هناك 30 سنه كاملة.. لحد ما مات بسرطان الحنجرة من غير ما يسجل اغلب قراءاته على أسطوانات لاعتقاده ان التسجيل حرام.

من كتر شهرة القارئ الشاب المسجد اتسمى بأسمه.. لو رحت النهارده السيدة زينب وسألت عن مسجد مصطفى فاضل يمكن مش كثير يعرفوا يدلوك.. بس لو سألت عن مسجد الشيخ رفعت.. الف مين يقولك رحمة الله على الراجل الطيب.. ومش بعيد ياخذك من ايدك يوصلك للمسجد

ويعزمك على الغداء بعد كده عند حبابيب السيدة.. اكراما لسيرة الراجل الى ارتبط في اذهاب المصريين بقرب انطلاق مدفع الافطار.. او كما قال عنه عمر طاهر.. صوته هو بل الريق.
مش كل الحجارة صماء.. كل مكان ويموت صاحبه ويسيب فيه اثر من روحة تحكيه حجارة المكان للأجيال الجديدة..
اثر اسمه التاريخ.

الحكاية الثانية

رحت ميدان القلعة قبل كده؟؟

زمان كان اسمه ميدان الرميلة.. قلب القاهرة النابض لما كانت قلعة الجبل هي مقر الحكم..

في ميدان القلعة هتشوف 4 مساجد كبيرة في نفس المكان..

مسجد الأمير قانيبای الرماح..

مسجد المحمودية..

مسجد الرفاعي..

مسجد السلطان حسن..

حط قانيبای الرماح والمحمودية على جمب دلوقتي.. خلينا في قطعتين الجواهر الى اسمهم مسجد الرفاعي ومسجد السلطان حسن..

مسجد السلطان حسن اقدم.. بناه السلطان الناصر حسن بن الناصر محمد بن المنصور قلاوون سنة 1363م. ورغم انه بناء لم يكتمل الا ان الجميع اتفقوا على انه هرم مصر الرابع بلا منافس.

اما مسجد الرفاعي فأمرت ببناء سنة 1880م. الوالدة باشا "خوشيار هانم". زوجة إبراهيم باشا بن محمد على وام الخديو إسماعيل..

السؤال بقي..

ايه الى يخلى خوشيار هانم تبني مسجد بالفخامة دى في المكان ده تحديدًا.. وقصاد هرم غير قابل للمنافسة زى مسجد السلطان حسن؟

من قلة الأماكن يعني!!!

انا شامم ريحة كيد ستات..

الحكم في سلالة محمد على كان لأكبر أبناء الأسرة من الذكور.. علشان كده بعد وفاة إبراهيم باشا تولى الحكم عباس حلمي الأول "حفيد محمد على" قبل محمد سعيد باشا "ابن محمد على".

بعد محمد سعيد باشا تولى الحكم الخديو إسماعيل وولى عهده كان الأمير مصطفى بهجت فاضل.. مش كتير يعرفوا انه أخ غير شقيق للخديو إسماعيل.. وانه كان من ضمن بعثة الأنجال الى اتعلمت في فرنسا.. ولما رجع مسك نظارة المعارف وبعدين المالية وبعدين العدل.. إبراهيم باشا كان عنده 6 حريم.. اتنين منهم كانوا ناقر ونقير.. خوشيار هانم "ام إسماعيل" والفت هانم "ام مصطفى بهجت فاضل".

والحكاية بتبدأ من نفسنة الضراير..

إسماعيل باشا بنى لأمه قصر فخم على كورنيش النيل في منطقة تل العقارب "جاردن سيتي حاليا".. القصر ده اتعرف باسم قصر الوالدة باشا.. عاشت فيه خوشيار هانم بعد ما سابت قصر الزعفران "جامعة عين شمس حاليا".

مين سكن في قصر الزعفران بعد خوشيار هانم؟؟

ضرتها.. الست الفت هانم..

وعلشان نفسنه الضراير.. رفضت الفت هانم أنها تنام على عفش خوشيار هانم.. فجددت عفش القصر كله.. صرفت 15 الف جنيه على إعادة تأثيث القصر بأفخم قطع الأثاث والتحف.. وده مبلغ يساوى أكثر من 150 مليون جنيه دلوقتي.. قصر الزعفران بقى أفخم قصور مصر وحديث المنتديات بمحتوياته وثراء ساكنيه الفاحش..

هتعدى الحركة دى من خوشيار هانم؟

لا طبعا..

هي لسه صاحبة القصر.. وعلشان ترزع الفت هانم كف.. راحت متبرعة بالقصر كله للميرى.. الجيش يعنى.. وسابت الست الفت هانم تتحسر على الأثاث الإيطالي والتحف الفرنسية اللى كانت ماليه القصر.

طيب.. تسكت الفت هانم على كده؟؟

لا طبعا..

قررت انها تبني قصر احسن من قصر الزعفران وقصر الوالدة باشا مع بعض.. فوقع اختيارها على قصر الأمير بشتك الناصري في السيدة زينب وقررت انها تخليه تحفه معمارية.. جابت مهندسين ايطاليين وفرنسيين وابنها حل كيسه على الآخر - وهو كان شديد الثراء - لحد ما عملوا منه تحفة يشيب من جمالها الولدان.. مش كده وبس.. الفت هانم لاحظت ان في مسجد قديم متهدم لازق في القصر بناه الأمير بشتك برضه.. فقررت انها ترممه وتوسعه وتطلق اسم ابنها عليه.. منه يبقى المسجد لائق لجوار القصر الجديد.. ومنه الناس تصلي فيه ويتردد بينهم اسم الأمير مصطفى بهجت فاضل.. ولى العهد وخديو مصر المقبل.

سبحان الله..

الأمير بشتك ده كان دبله نجس وبتاع نسوان.. قال عنه ابن تغرى في النجوم الزاهرة "انه كان لا يعف عن مليحة ولا قبيحة".. ولما بنى المسجد محدش عبره.. قوم الأيام تلف والمسجد بتاعه يتجدد ويبقى أكبر مسجد في مصر!!!

الحركة دى هتعدى مت تحت ضرس خوشيار هانم وابنها؟؟

أكيد لا..

أبو السباع ادرك الخطر الكامن في وجود واحد متعلم غنى زى الأمير مصطفى في ولاية العهد. فدفع رشوة مهولة للسلطان العثماني عبد العزيز علشان تتغير قوانين وراثه العرش في مصر وتبقى ولاية العهد لأكبر الذكور من اسرة إسماعيل مش اسرة محمد على..

يعنى ولى العهد يبقى توفيق بدل مصطفى بهجت فاضل.

اوباء.. ده جون في المقص من أبو السباع وامه..

مصطفى فاضل كان هيطق من الغيظ.. فخد أمه وسابوا مصر لإسماعيل يشبع بيها وراحوا عاشوا في فرنسا.. بس اسماعيل مسكتش.. فضل يضغط على مصطفى فاضل ويضيق الخناق عليه.. ومع كل خناقه يطلع واخد منه حته من اطيانه.. ومصطفى فاضل قاعد في فرنسا بيمول أي معارضه تنكد على السلطان عبد العزيز واسماعيل انتقاما منهم على نذالتهم معاه في ولاية العهد.

طيب خوشيار هانم تسكت على كده؟

لا برضه..

قررت انها تبني مسجد اكبر وافخم من مسجد مصطفى بهجت فاضل.. ويكون في اهم أماكن القاهرة.. منه يبقى مسجد الناس تتردد عليه ومنه يبقى مدفن لها ولعيالها.. وبكده تبقى قضت تماما على ضرته الفت هانم..

تبني المسجد فين يا خوشيار؟

تبني المسجد فين يا خشاخشو؟

مفيش غير ميدان الرميلة..

لكن مشكلة المكان الى اختارته ان فيه مقام سيدي على أبو شباك الرفاعي "شيخ الطريقة الرفاعية" .. وانت عارف المصريين والمقامات..
عض قلبهم ورغيفهم وعيونهم.. لكن المقام لأ.

بس خوشيار هانم مكانتش سهله برضه..

علشان تمتص غضب الناس قالتهم ان المكان ده لا يليق بواحد زى سيدي على أبو شباك.. وانها هتبني مكانه حاجه تليق بيه وتليق بمصر..
الى كانت الموضة بتنزل فيها قبل ما تنزل باريس..

وكان لها ما ارادت..

صحيح ان المسجد اكتمل بعد ما هي ماتت.. الا انه اتبنى واصبح زى ما هي خططت بالظبط.. بناء شديد الفخامة على طراز النيو مملوك
يحمل بصمات أسماء تخض في عالم المعمار زى حسين فهمي باشا واحمد باشا خيرى والمجري ماكس هيرتز باشا.. رئيس لجنة حفظ الاثار
العربية.

طيب حصل ايه للأمير مصطفى بهجت فاضل ومسجده بتاع السيدة زينب؟؟

توفي الأمير مصطفى سنة 1875م. قبل 4 سنوات من عزل إسماعيل عن الحكم.. وتم دفنه في مسجده الى بناه في السيدة زينب.. مسكين
الراجل.. ملحقش يشمت في إسماعيل..

طيب ليه محدش يعرف مصطفى بهجت فاضل رغم ان له مسجد بأسمه في واحد من اهم وازحم احياء القاهرة؟؟

اقولك..

المسجد فضل معروف باسم مسجد فاضل باشا لحد سنة 1918م.

في السنة دى الأوقاف عينت في مسجد فاضل باشا مقرئ قرآن شاب صوته كان قيثارة من الجنة.. فضل يقرأ القرآن في المسجد ده اكر من
30 سنة لحد ما مات بسرطان الحنجرة سنة 1950م. ورغم انه مات من اكر من 70 سنة.. الا انه لم يفارق وجدان المصريين ابدا.. صوته
ارتبط في الازهان بمدفع إفطار رمضان.. صوته بقى هو شربة المية الى بتكسر الصيام..

بله الريق..

المرحوم الشيخ محمد رفعت..

الناس نسيت اسم فاضل باشا والمسجد بقى اسمه جامع الشيخ رفعت.. رغم ان مصطفى بهجت فاضل ما زال مدفون فيه..

طيب القصر الفخم بتاع الأمير.. راح فين؟

تمر الأيام وتسقط الملكية وتيجي الجمهورية.. والقصر الفخم تحول الى المدرسة الخديوية الثانوية العسكرية "الموجودة حاليا في درب
الجماميز في السيدة" .. جار الزمن والعسكر على القصر زى ما جاروا على كل حاجه كانت حلوة في البلد علشان نتعلم درس مهم اوى من
الحكاية دى..

دوام الحال من المحال وسبحان من له الدوام.





ميدان الرميّة 1857 - مجموعة كريسويل



الوالدة باشا "خوشيار هانم"



الأمير مصطفى بهجت فاضل



مدفن الأمير مصطفى بهجت فاضل

المقياس

نهر عظيم جاى من الجنوب يحمل في ميته الحمراء كل الخير لمصر ..
الأجداد كانوا بيسموا الفيضان عيد الدمع.. كانوا فاكرين انه دموع ايزيس من الحزن على اوزوريس.. ينتهى الفيضان في اغسطس وتفتح السدود والقنوات علشان تغمر مياه الحياه ارض كيميت.. وتعم الاحتفالات ربوع مصر كلها ..
أصل النيل وقى..

الأجداد اعتقدوا ان اللعنة والفقر هتحل عليهم لو طنشوا الاحتفال بوفاء النيل.. علشان كده كهنة كوم امبو كانوا بيحيبوا قراطيس بردي ويكتبوا فيه صلوات وادعية وتضرعات الى "حابي" ويرموها في النيل مع احتفالات مهيبه حضرها الملك رمسيس الثالث شخصياً ومعاها تمثال فتاة جميلة..
هدية لحابي على كرمه وفيضانه.. وتطلق الناس البخور وترقص وتغنى وتقول ..
فاض حابي فاض حابي.. اهتفوا يا زراعين.

والامور مختلفتش كثير لما دخل المسلمين مصر..
المقريري في خططه بيقول ان اسامه بن زيد التنوفي مسئول الخراج في دولة الوليد بن عبد الملك بنى مقياس في الروضة.. المقياس ده ملوش أثر حالياً.. او يمكن المهندس العراقي احمد بن كثير الفرغاني بنى المقياس الحالي فوق انقاضه في أيام الخليفة المأمون.. بيحكى المقريري ان اسم الخليفة المتوكل على الله كان محفور على حجارة النص التأسيسى للمقياس وان المتوكل كلف واحد اسمه عبد الله بن عبد السلام بن عبد الله بأعمال الصيانة.. وفضلت الشغلانه في اسرته يورثها أولاده من بعده.. حاجه كده زى شرف العمودية مثلاً.. بس للأسف ضاع الحجر بتاع المتوكل والمقياس كله اتشلفط لما ابن طولون حاول يصلحه.

كلام كثير عن بناء المقياس واصله وفصله.. هل هو أموي ولا عباسى ولا طولوني ولا عثمانى.. مين بناء الأول ومين عرف طقوس قياس النيل قبل مين.. هل كان صفينات فعنيح "النبي يوسف" ولا المصريين القدماء ولا العرب ولا المماليك؟
كل ده مش مهم..

المهم هو طقوس القياس والاحتفال..
مصر الفاطمية كان فيها راجل كباره اسمه شيخ المقياس.. الراجل ده وظيفته هي قياس منسوب مية النيل يوميا ايام الفيضان.. كل يوم ينزل بئر المقياس يسجل النيل وصل لارتفاع كام النهارده ويقارن الرقم بقراءة اليوم السابق وبعدين يطلع يبلغ الخليفة.. وفي وقت معين يطلع شيخ المقياس ويبلغ بالقراءة النهائية.. مبروك يا مولانا الخليفة.. ارتفاع منسوب مية النيل السنة دى بلغ 16 ذراع "8.5 متر."

ويلف المنادي في أرض مصر..
يا اهالي مصر المحروسة.. طم ططم طم طم
النيل وقى.. طم ططم طم طم
النيل بلغ 16 ذراع.. طم ططم طم طم
الحاضر يعلم الغايب.. طم ططم طم طم
النيل وقى.. طم ططم طم طم
وتقام الاحتفالات وتمتد الولايم للأكابر والاعيان والفقراء والأمراء على حد السواء.. سفرة كبيرة فيها 100 صينية.. على كل صينية 100 ذبيحة مختلفة في 40 مكان من أماكن البلد.. قوافل "الشطار" مالين الميادين بملاعبهم السحرية والعابهم الخطرة.. رقص وطبل وزمر وبخور وحلقات ذكر..
أصل النيل وقى..

الخليفة كان بيحيب طشت ويحط فيه مية ورد وحنه وزعفران ويعمل منهم عجينة عطرة يديها لشيخ المقياس الى كان بيلبس لبس التشريفه كامل بعمته المميزة وينط يتشعبط في العمود برجلة اليمين وايدة الشمال ويبدأ يعطر العمود بالعجينة السلطاني ام ريحة حلوة..
الحكاية ان ال 16 ذراع دول معناهم ان الميه الموجودة هتكفى الزراعة والري.. يعنى مفيش أسعار هتغلى ولا جفاف هيحصل ولا طاعون يحصد الاف الارواح.. هنزرع ونقلع ونبيع ونشتري بكرامتنا من غير ذل ولا امتهان ولا ضرائب نتأخذ من لحمانا الحي.. ما هو أصل من غير فيضان الخليفة هيحيب فلوس منين غير من الضرائب؟

في الوقت الى شيخ المقياس بيشكر فيه النيل.. كان بيطلع السلطان على سد الخليج ومعاها نائب السلطنة وكبار رجالة الدولة وفي ايده فأس من الذهب الخالص.. يضرب السد 3 ضربات كأشارة للفلاحين ان كل واحد فيهم يشيل فأسه ويضربوا السد هما كمان علشان تجرى الميه في الخليج ويبدأ في مصر عام زراعي جديد.

ابن اياس الحنفى وصف كل ده في كتاب اسمه نزهة الأُمم في العجائب والحكم ..
الموضوع أشبه بالمولد.. وزى ما كل مولد له ليله كبيرة وحلقات ذكر وانشاد واحتفالات.. ميخلش المصريين على النيل بنفس المعاملة.. المصريين شعب له تركيبة خاصة في الشكر والاحتفال.. لسه موجودة لحد النهارده رغم تغير الحال.

عندك مثلاً شهاب الدين بن الشاب التائب قال..
أرى نيل مصر قد إذا يوم كسر إذا *** رأم جريا في الخليج تقنطرا
ولكن بهذا الكسر زاد تجيرا *** وافرط هجما في القرى وتجسرا
وعلى بن بردك قال..

ان بحر النيل قد وفي لنا *** ما عليه من قديم قررا
وقضانا الدين الا انه *** حين وفاها عليه انكسرا

لو فاکر ان ده کان زمان.. یبقى اسمحلى اشغل الساوند تراك ده واحنا بنتکلم.. ده محمد عبد الوهاب على فكرة بیغنى شعر شوقی:
النیل نجاهی حلیوة اسمر..
عجب للونه ذهب و مرمر..
ارغوله فی ایده یسبح لسیده..
حیة بلدنا یا رب زیده..
حجارة المقیاس بتحکی ازاى کان المصرین بيشکروا الله على سنة جدیدة من الحیة بکرامة.. هتقدر تشم ریحة العمود رغم انها راحت.. المقیاس
موجود علشان یفکرنا ان النیل ده هو حیة بلدنا.
یا رب زیده.. ونفضل دایما نقول..
أصل النیل وقى..

خاير بك

الراقد تحت هذا القبر أخذ من الدنيا كل حاجة ..
بس لما نهايته قربت.. ادرك ان الدنيا بكل ما فيها لا تساوى كوباية مية ..
بعد ما كان اقل حكم عنده هو الاعدام.. اصبح يتسول من الناس دعوة.. لعلها المنجية.

خاير بك متولدش مملوك ابدأ.. ده اتولد حر من بيت شركسى ومعروف مين ابوه.. علشان كده هتلاقى اسمه خاير بن ملبان الجركسى.. مش زى باقى اسامى المماليك يحمل صفة "زى الرماح او الاشقر" او منسوب الى سلطان "زى الناصري او الأشرفى" او يحمل اسم البلد الى جه منها زى "الخليلي".. المماليك مجهولى النسب كانوا بيتسموا بصفات ظاهره فيهم او ينسبوا الى التاجر الى باعهم او السلطان الى خدموا معاها او البلد الى جم منها.. لما تقرأ اسم مملوك زى يشبك من مهدى مثلا.. هتعرف ان اسمه هو "يشبك".. ومهدى ده بيقى تاجر العبيد الى باعه فى مصر.. او لما تشوف مملوك تانى اسمه جان بردى الغزالى.. بيقى تعرف علطول ان اسمه جان بردى وجه من بلد اسمها "منية غزال".

ملبان الجركسى خد خاير ابنه من ايده هو واخواته الثلاثة واهداهم كمماليك الى السلطان قايتباى على أمل ان واحد فيهم يفلح فى الفروسية ويبقى سلطان على مصر فى يوم من الايام.. مصر ايامهم كانت بزرميط.. ييجى المملوك من دول فقران وكحيان.. كام سنة كده وتلاقىه ما شاء الله استحمى واتنجر وبقي سلطان.

صلاح عيسى عمل عظمه فى كتابه "رجال مرج دابق" وهو بيحكى الحكاية دى..

قبل خيانتة للبلد الى لحم كتافه من خيرها.. خاير بك كان نائب للسلطان الغورى فى حلب.. ولما لقي الى ممكن يذفعله اكر لم يتردد فى انه بيقى خرم فى جيش المماليك المدافعين عن سلطانهم فى مصر ضد جحافل سليم الأول.. خاير بك تسبب فى سقوط السلطان الغورى ميت بعد ما جاله شلل نصفى وهو شايف ممالিকে بيخونوه عيني عينك كده.

مكافأة الخيانة كان ولايته على مصر لحد موته.. مكانش والى بكبرى (*) زى الى مسكوا مصر بعده.. مكانش ذو حظوة او مهابة بين الناس.. لم يكن شجاع او صاحب بطولات حربية.. كل مقوماته انه خاين ساعد جيش عدوه علشان يحقق انتصار كان بعيد عن شنبه.

لقبوه بملك الأمراء.. حكم مصر 5 سنين و3 شهور بالظبط.. فى آخرهم ابتلاه الله بمجموعة أمراض كسرت نفسه وعرفته ان فى آخره هيسأل فيها عن افعاله فى الدنيا.. بقى يعطف على الفقراء ويوزع فلوس ويذبح للغلبة.. بنى مسجد فخم فى شارع باب الوزير.. طلب المغفرة من الناس.. بس الناس المجروحة منه رفضت تصلى فى مسجده علشان تحرمه الثواب وبقت تعدى على المسجد وتنف عليه.. تنف على الراقد فى قبة الدفن طبعاً مش المسجد.

من امتى قسوة المصريين دى؟ ده حتى الميت متجوزش عليه الا الرحمة.

صحيح.. علشان كده تعالى نترجم على مؤذن بسيط ضاقت بيه سبل العيش فى ايام خاير بك فدخل متلصص الى غيط مزروع خيار شمير فى البحيرة.. قطف من الشجر كام واحد بيعهم لعل تمنهم يسد جوع عياله.. طبطه خولى الغيط ورقعه علقه محترمه.. الراجل كرامته وجعته فمسك فى الخولى وبقت عاركة.. الخولى - رجل النظام - سحب الراجل من قفاه على نائب البلد.. النائب شاف خيار الشمير مع الراجل فسحبهم الاثنين وطلع على خاير بك فى المحروسة.. وقفوا الاثنين بين ايدين والى والراجل الغلبان بيصرخ من الفقر والجوع.. اتارى والى الظالم كان محتكر تجارة خيار الشمير فى البلد لحسابه.. محدش يزعه ولا يبيعه الا هو.. كده ببقى الراجل الفقير ده سرق والى شخصياً.

خاير بك حكم على الراجل الغلبان بالتجريس والشنق.. الحرس ركبوه على حمار وعلقوا فى رقبته قفة خيار الشمير الى سرقه من غيط والى ولفوا بيه القاهرة لحد ما وصلوا عند زقاق الكحل الى جمب باب الفتوح.. علقوه فى المشنقة وشدوا الحبل.. خرجت روح الرجل الى بارئها تصرخ من الجبروت.. بعدها سابوه متعلق 3 أيام بدون دفن لحد ما صعب على اهل الناحية فخدوه ودفنوه بمعرفتهم من غير ما يعرفوا ان له عيال أصبحوا يتامى والمسكينة مراته لا تعرف حصل له ايه ولا راح فين.

ابن اياس المؤرخ المعاصر قال عن خاير بك "كان يبات يسكر بطول الليل ويصبح فى خبال السكر يحكم بين الناس بما يقتضيه عقله.. ولم يظهر العدل فى محاكماته قط منذ ان ولى على مصر".

كان طبيعى ان حاكم سكران زى ده تظهر فى ايامه احكام غريبة زى شك البتنجان مثلا.. الى نعرفه عن الصلب ان المحكوم عليه بيتعلق على الصلب ويكسروا رجله من عند القصبة لحد ما يموت بالاختناق نتيجة ثقل الجسم على الرئة.. خاير بك افتكس طريقة جديدة للصلب.. كان بيحجب المصلوب ويحط الرمح فى صدره بالعرض.. كأنك بتشك بتنجانه بخلة سنان.

مسجد خاير بك موجود فى شارع باب الوزير.. مسجد فخم وانيق ومعومل بمزاج رغم صغر حجمه.. لكن هتحس بشعور غريب من الانقباض وانت جواه.. هتحس انك كاره المكان وعازب تمشى بسرعه.. حتى لو متعرفش حكايته.

كل مكان بياخد من روح صاحبه.. الحجارة بتتشكل يا اما بابتسامة الرحيم العادل يا اما بتكشيرة الظالم المفترى..

زى ما حببت مسجد السلطان حسن وانت متعرفش حكايته.. برضه هتكسر مسجد خاير بك وانت متعرفش حكايته..

كل مره اروح مسجد خاير بك احس ان الحجارة بتصرخ وتقول "الظلم دين عمره ما بيتنسى.."

لأن الديان لا يموت.

حريق المسجد النبوي

تعرفوا ايه الى حصل في المسجد النبوي يوم 13 رمضان سنة 886 هـ؟
سما المدينة كانت رمادى من كثر الغيوم.. فى أول الليل حصل رعد شديد وبرق صحيت الناس على صوته ولمعات صواعقه.. مكانش فى مطر.. رعد وبرق وبس.

رئيس المؤذنين فى المسجد - شمس الدين محمد بن الخطيب - طلع مأذنة المسجد الرئيسية علشان يهلل ويقول دعاء سماع صوت الرعد حسب سنة نبينا عليه الصلاة والسلام.. باقى المؤذنين قلدوه وطلعوا بقية المنابر.. الى مصحيش من اهل المدينة على صوت الرعد.. صحن على اصوات المؤذنين بتبتهل الى الله خوفا من ظاهره طبيعية ابثت للأنسان اكثر من مره انه لا شىء.
فجأة ضريت صاعقة المأذنة الرئيسية فلققتها نصين.. مات شمس الدين بن الخطيب فى اقل من ثانية.. معرفش بالظبط الصاعقة بيبقى فيها كهرباء اد ايه لكنها كانت كفاية علشان تنشق المأذنة وتقع مشتعلة على سقف المسجد وقبة الحجرة النبوية الى بناها المنصور قلاوون.. حجارة المأذنة المشتعلة عملت خروم فى سقف المسجد ووقعت فى داخله فمسكت النار فى السقف والعمدان من الداخل.. مع حركة الهواء ومحاولات الناس الفاشلة لاحتواء الحريق النار ولعت زيادة وبدأت تمسك فى الحيطان.. حاول الناس يهدموا باقى السقف وجزء من حيطان المسجد علشان يقطعوا السكة على النار.. بس النار كانت اسرع منهم.. فى اقل من ساعة انتشر الدخان الاسود فى المسجد وخرجت الناس تجرى فى فوضى مربعة.. بسبب التدافع والخوف مات بعض الناس دهساً تحت الاقدام بينما فضل البعض الآخر فى المسجد لحماية القبر الشريف.. وللأسف ماتوا مخنوقين بالدخان زى صدر المدرسين محمد بن المسكين وبعض خدام المسجد وامناء خزائن دار الحرم.. بيقول السهمودى عن الحريق فى كتابه "وفاء الوفا فى اخبار دار المصطفى" النار عظمت حتى صارت كبحر لحنى من نار ولها شهيق وزفير والسن تصعد فى الجو.. وصار لفحها يؤثر من البعد حتى اثرت فى النخلات التى يصحن المسجد"

وصلت اخبار الحريق الى الشريف زين الدين فيصل الجمازى أمير المدينة.. الراجل قام من مكانه مخضوض لأن قبلها بيوم واحد كان زاره واحد من الاعراب وحكاه عن حلم غريب شاف فيه ان السماء فوق المسجد النبوي مليانه جراد ظهر بعده نار عظيمة.. فأخذ النبى عليه الصلاة والسلام النار وقال: أمسكها عن امتى.

من شدة النار الى كانت ماسكة فى السقف الى فوق الحجرة الشريفة.. ذاب رصاص القبة وسقطت على القبة السفلية علشان النار تمسك فى عمدان المسجد الى كانت معموله من حجر ابيض قابل للاشتعال.. القبة السفلية سقطت بدون اشتعال وحمت الحجرة النبوية من النار.. العمدان تفتت من شدة النار.. ستر ربنا ان النار مشيت فى عكس اتجاه الحجرة النبوية الشريفة.. 120 عمود من عمدان المسجد وقعوا يومها محروقين ومتفتتين بسبب قوة الحريق لكن الحجرة النبوية الشريفة لم تتأذى.

حاصر الناس النار فى 8 اماكن وبدأوا محاولة ازالة الرمد الناتج عن الحريق بس مقدروش.. فضل الرمد واثار الحريق موجودة لحد ما شافها زوار المسجد فى موسم الحج.. الخبر وصل الى جزيرة رودس واهلها من غير المسلمين فأظهروا فرح عظيم وعلقت الزينات ودقت نواقيس الكنائس ابتهاجا بالمصيبة.. لكن فى اليوم التالى اصاب الجزيرة زلزال عظيم هدم الكنيسة الكبيرة ودمر البيوت وكان الموتى بالالاف تحت الانقاض.. كان كل الى جاى على اسكندرية من رودس ملوش حكاية الا الخراب الى حل عليهم بسبب الزلزال.. وهو شىء اعتبره السهمودى فى وفاء الوفا من الايات الربانية.

مكانش فى وقتها سلطان للمسلمين يقدر يقف للحادث ده الا قايتباى.. لما وصله الخبر اصابه غم عظيم وأمر بوقف كل اعمال البناء والعمارة فى مصر وتحويل كل موارد الدولة لاعادة اعمار المسجد النبوي.. ادرك ان المهمة تكليف وتشريف واختبار من الله عزوجل.. كرامة ما بعدها كرامة كان هو اهل لها.. امر السلطان فوراً برحلة الى المدينة تحت رئاسة امير الحج الامير سنقر الجمالى السيفى مع 20 الف دينار واكثر من 100 صنايعى من خيرة صنايعية مصر النجارين والدهانين والنحارين والمرحمين والحدادين وعدد كبير من الجمال والحمير شايلين المواد الخام المطلوبة.. بعد كده عين السلطان قايتباى الخواجة شمس الدين بن الزمن كمتولى لعمارة المسجد النبوي وبعتله اكثر من 200 جمل و100 حمار و300 عامل من اهل الصنعة.. كل دول خدوا اجرتهم عن الشغل مقدم.. بيحكى السهمودى ان قوافل المؤن واحمال الدواب لم تنقطع ابدا من مصر طول فترة التجديد.

لما بدأوا اعمال الترميم لاحظوا ان جدار الحجرة النبوية الداخلى مشقوق ومائل.. امر السلطان قايتباى باعادة بناؤه بشكله الحالى وكسا الحجرة كلها بالرخام الصلب من الداخل والشبابيك النحاسية من الخارج.. بلغ اجمالى ما انفقه قايتباى فى تجديد وترميم المسجد 120 الف دينار ذهب فى سنتين.. فى سنة 891 هـ انهم اكتشفوا تشققات فى القبة الى فوق الحجرة الشريفة وميل فى المأذنة الرئيسية بسبب استخدام البنايين مواد غير صالحة للبناء والاساس الغير متين.. عزل السلطان قايتباى الخواجة شمس الدين وعين مكانه الشجاعى شاهين الجمالى فى وظيفة شاد عمارة المسجد النبوي.. اهل الخبرة قالوا ان ميل المأذنة حصل بسبب ضعف الاساس.. فهدموا القبة والمأذنة وحفروا اساس اعظم لحد ما وصلوا للمية.. بعدها تفننوا فى بناء المأذنة الجديدة من الحجر الاسود الصلب حتى اصبحت بشكلها الحالى.. قال عنها السهمودى "لم يُرى قبلها فى المدينة الشريفة مثلاً".. اما القبة فعملوها من الحجر والجبس الابيض وكانت قبل كده خشب.. وبني السلطان فوق القبة الصغيرة قبة اكبر من الحجر كساها باللون الازرق.. وبني قبة أصغر فوق محراب سيدنا عثمان كساها باللون الفضى.. فضلت قبة المسجد النبوي الرئيسية زرقاء لحد زمن السلطان عبد الحميد الثانى الى جدد القبة الخارجية وكساها بالاخضر.. ومن يومها لحد النهارده وهى خضراء.

اقصر طريق علشان توصل للروضة الشريفة هو انك تدخل من باب السلام وتمشى مع الناس فى الرواق الطويل.. على يمينك هتلاق نقوش نباتية جميلة وكتابات بالخط الديوانى فيها اسامى السلاطين العثمانيين الى جددوا المسجد.. بعد شوية هتلاق على شمالك.. قبل الحجرة الشريفة ب 10 متر.. لوحة النص التأسيسى الى عملها السلطان قايتباى بمناسبة تجديد المسجد بعد الحريق.. لو خرجت من المسجد من باب جبريل او باب البقيع هتلاقك فى اقرب مكان لأجمل مأذن المسجد النبوي الشريف واكثرهم متانة وهيبة.. افق شوية علشان تحس بالفخر وانت بتتفرج على المأذنة الى عملها سلطان مصر..

الأشرف سيف الدين قايتباى ..
لما كانت مصر هى اللى بتوزع الرز على العالم.

فتحية

في رابط مجهول بين الاماكن وبعضها عبر الزمن ..
رابط انت مش شايفه رغم انه موجود حواليك طول الوقت.. رابط هتكشفه بالصدفة هيخليك تندهش وتضرب كف على كف وانت بتقول ياااه..
معقول الدنيا صغيرة اوى كده!!!!

عندك مثلا الرابط بين فتحية "في تركيا" وقبر السلطان صلاح الدين "في دمشق".
فتحية بلد ساحلية قريبة من أنطاليا بتطل على بحر ايجيه.. بينها وبين إسطنبول ساعة بالطيارة و8 ساعات ونص بالأوتوبيس ..
بلد جميلة صاخبة وملبانه العايب شواطئ..

وانا متشعلق بالباراشوت في فتحية على ارتفاع 2000 متر بينما مراتي تحت على الشط بتحسب نصيبها في الميراث لما اقع وتندق رقبتى ..بدأت
اهرب من رعب فكرة السقوط باسترجاع ما قرأت عن فتحية..

فتحية اتبنت على أنقاض مدينة قديمه اسمها تيليموس.. فيها معبد الملك امينتاس المقدوني ومسرح ومقابر رومانية منحوتة في الجبل بالإضافة
الى قلعة حربية - من آثار مملكة ليكيا الأرمنية- ومتحف لوحات ومشغولات خزف وفسيفساء.. الكلام ده كله يقول انها مدينة خضعت لحكم
اليونان ثم الرومان في الازمان الغايرة.. شواطئها رملية ممتدة على خليج البحر الميت "ده غير بتاع الأردن" .. سموه البحر الميت بسبب غرق شاب
فيه اثناء السباحة فقررت حبيبته انها تموت نفسها وراه في نفس المكان.. مش داخله دماغى الحدودة دى.. متهيألى ان هى الى غرقته علشان تورثه.
في أيام حكم السلطان محمد الخامس "محمد رشاد" فتحت الدولة العثمانية خط جوى بين إسطنبول والقاهرة مروراً بحلب ثم دمشق.. الدولة
كانت منهارة وخسرت حروب البلقان وعلى اعتاب حرب عالمية هتقضى عليها تماما في وجود سلطان ضعيف.. حاول العثمانيون استعادة الهيبة
عن طريق طيارة الماني سموها معاونت ملية "نصيرة الدين يعنى" .. طولها 7 متر وهيركبها 2 مغامرير "اليوزباشى فتحي بك والملازم اول صادق
بك" ويطلعوا في رحلة تبدأ من إسطنبول وتنتهى في القاهرة.

وقف الجمع المهيب مع السلطان في وداع الطيارة.. الناس بتكبر وتهلل من منظر غريب عليهم في العصر ده.. الناس في حلب منتظره ومجهزة
المهبط.. كل ما يشوفوا حاجه طاييره في السماء يهللوا.. لحد ما ظهر النسر الحديدي العثماني وحط على أرض حلب بأمان في 14 فبراير سنة 1914م.
بعد أذان المغرب بشوية.

الكلام ده بيحكى واحد من المعاصرين اسمه خالد العظم "أصبح رئيس سوريا سنة 1941م" .. قال في مذكراته ان الناس كبرت لمرآي الطيارة بينما
العالم اياها اعتبروا ان ده كغفر.. الوالى وكبارات رجال الحكومة استقبلوا الطيارين بحفله رسمية.. قبل ما يطير المغامرير على المحطة التالية..
دمشق..

في دمشق كان في انتظارهم 100 ألف بنى آدم.. الأطفال كل ما تشوف نسر طايير تقول الطيارة وصلت.. وبعدين يقعدوا يضحكوا لما يلاقوها مش
هى.. لحد ما ظهر النسر الحديدي ابو دخان وصوت مزعج وهبط بعنف على المدرج الأخضر الغير ممهد.. الستات بقت تزغرط والمشايخ سجدوا
لله رهبة وشكر على سلامة وصول الطيارين.. الناس شالوا الطيارين على الأكتاف لحد صبيان الوالى.. الطيارين نزلوا ضيوف لمدة يومين على أسرة
"ساروجة" الشامية العريقة.. اعتقد ان من كتر الأكل الى أكلوه وكرم الضيافة الشامى المشهور معروفش يركبوا الطيارة تانى.

في اليوم الثالث اجتمع نفس العدد في وداع الطيارين في الجزء الأخير من الرحلة.. الى القاهرة.. طلعت الطيارة وسط هتافات الناس وتمنياتهم
بسلامة الوصول.. لكن للأسف الحلم الجميل لم يكتمل.. قرب بحيرة طبريا وقعت الطيارة يوم 27 فبراير واتحرق ومقدروش يميزوا جثث أبطالها
الا من أوراقهم الرسمية.. السبب العلمى لسقوط الطيارة هو رياح عنيفة كانت اقوى من محركات الطيارة البخارية ام 200 حصان.. السبب الشعبى
هو الحسد وعين الانجليز والفرنسيين الوحشة.. وتكريما لسيرة البطل فتحي بك.. قررت الدولة اطلاق اسمه على مسقط رأسه.. فتحية من فتحي.
الناس عاشت في هم وحزن على الشجعان الى راحوا في غمضة عين وعلى الحلم العثماني الى انتهي قبل ما يبدأ.. شحنوا جثث الطيارين لدمشق
بالقطر في جنازة رسمية مهيبه.. صوت ولولة النساء غطى على صوت المؤذنين الباكي.. اتفتحت بيوت دمشق للعزاء.. كل شارع وحاره من حوارى
الشام القديمة كان فيها بكاء حار.. السلطان صمم على رحلة ثانية بعد أيام قليلة بنفس المواصفات لرد الاعتبار بقيادة الملازم أول نوري بك لعلها
تحقق الى مقدرتش تحققه الطيارة الأولى.. نزلت الطيارة في بساتين المزه في دمشق ولكن محدش كان منتظرها بسبب حالة الحزن على الطيارة
الأولى.. ومنها انطلقت الى القاهرة علشان تسقط قرب سواحل يافا.. للأسف حظها لم يكن أفضل من سابقتها.

لما زرت مدفن السلطان صلاح الدين في دمشق لقبت على اليمين وقبل الدخول للزريح شاهد رخامى فخم عليه العلم الأحمر ابو هلال ونجمة
بيض.. قربت اقرا الاسامى واشوف مين يستحقوا شرف الدفن جنب السلطان الناصر.. لقبت انهم اليوزباشى فتحي بك والملازم أول صادق بك
والملازم أول نوري بك.. ابطال اول محاولة طيران بين اسطنبول والقاهرة.

سبحان الله.. "وَمَا تَدْرِي نَفْسٌ بِأَيِّ أَرْضٍ تَمُوتُ"

ياااه.. معقول الدنيا صغيرة اوى كده!!!!

الحكاية الثانية

جربت تربط الأماكن والاحداث مع بعضها عبر الزمن كأنك بتغزل خيوط الحكاية بقتلة من العصور الوسطى وفتلة من العصر الحديث؟

تعالوا نشوف..

سنة 2007 زرت قبر السلطان الناصر صلاح الدين في دمشق الحبيبة.. في مدخل القبر على اليمين شفت شواهد قبور رخامية فخمة مكتوب عليها بالتركي أسماء ساكنيها.. فتحي بك ونوري بك وصادق بك.. مين الناس دى.. انا معرفهاش.. قلت في بالي اكيد دى ناس عملت حاجه كويسه علشان كده نالوا شرف الدفن جوار السلطان.. مركزتش اوى في فحصهم.. ركزت اكثر على قبر السلطان نفسه.. لفت نظري تركيبتي رخاميتين داخل قبر السلطان.. واحدة فاضية أهداها ملك المانيا فيلهلم الثاني للسلطان عبد الحميد الثاني لما زار دمشق سنة 1898م.. والثانية يرقد تحتها السلطان العظيم نفسه رحمة الله عليه.

قعدت في سوريا 6 شهور كاملة.. خلصت الشغل المطلوب ورجعت بعدها على مصر ونسيت تماما حكاية قبر السلطان.. بس عمرى ما قدرت انسى سوريا وأهلها.

سنة 2018 زرت بلد ساحلية في تركيا اسمها فتحية.. بلد صغيرة قريبة من أنطاليا بتطل على بحر ايجيه.. بينها وبين إسطنبول ساعة بالطيارة و8 ساعات ونص بالأوتوبيس.. بلد جميلة صاخبة ومليانة العاب شواطئ.. اجمل ما فيها هو الباراشوت.. ده لو قلبك جامد ووزنك مناسب.

وانا متشعلق بالباراشوت في فتحية على ارتفاع 2000 متر بتفرج على الكوكب اللى شكله مختلف تماما من فوق.. بينما مرآتي تحت على الشط بتحسب نصيبها في الميراث لما اقع وتندق رقبتي.. بدأت اهرب من رعب فكرة السقوط باسترجاع ما قرأت عن مدينة فتحية..

فتحية اتبنت على أنقاض مدينة قديمه اسمها تيليمبوس.. فيها معبد الملك امينتاس المقدوني ومسرح ومقابر رومانية منحوتة في الجبل بالإضافة الى قلعة حربية من أثار مملكة ليكيا الأرمنية.. وفيها كمان متحف لوحات ومشغولات خزف وفسيفساء.. الكلام ده كله يقول انها مدينة خضعت لحكم اليونان ثم الرومان في الازمان الغابرة.. شواطئها رملية ممتدة على خليج البحر الميت "ده غير بتاع الأردن".. سموه البحر الميت بسبب غرق شاب فيه اثناء السباحة فقررت حبيبته انها تموت نفسها وراه في نفس المكان.. مش داخله دماغي الحدودة دى.. متهيألى ان البت اللى غرقته علشان تورثه.

في أيام حكم السلطان محمد الخامس "محمد رشاد" فتحت الدولة العثمانية خط جوى بين إسطنبول والقاهرة مروراً بحلب ثم دمشق.. السلطنة كانت منهارة وخسرت حروب البلقان وعلى اعتاب حرب عالمية هتقضى عليها تماما في وجود سلطان ضعيف.. ومع ذلك حاول العثمانيون استعادة الهيبة المفقودة عن طريق طيارة الماني سموها معاونت مليه "نصيرة الدين".. طولها 7 متر يركبها 2 مغامر هما اليوزباشي فتحي بك والملازم اول صادق بك.. يطلعوا في رحلة تبدأ من إسطنبول وتنتهى في القاهرة كأعلان عن دخول السلطنة العثمانية الى نادي أصحاب القوات الجوية.

وقف الجمع المهيب مع السلطان في وداع الطيارة.. الناس بتكبر وتهلل من منظر غريب عليهم في العصر ده.. الناس في حلب منتظره ومجهزة المهبط.. كل ما يشوفوا حاجه طايه في السماء يهللوا.. لحد ما ظهر النسر الحديدي العثماني وحط على أرض حلب بأمان في 14 فبراير سنة 1914م. بعد آذان المغرب بشوية.

الكلام ده حكاية واحد من المعاصرين اسمه خالد العظم "أصبح رئيس سوريا سنة 1941م".. قال في مذكراته ان الناس كثر لمرآي الطيارة بينما العالم اياها اعتبروا ان ده كف.. الوالي وكبارات رجال الحكومة استقبلوا الطيارين بحفله رسمية.. قبل ما يطير المغامر على المحطة التالية..

دمشق..

في دمشق كان في انتظارهم 100 ألف بنى آدم.. الأطفال كل ما تشوف نسر طائر تقول الطيارة وصلت.. وبعدين يقعدوا يضحكوا لما يلاقوها مش هي.. لحد ما ظهر النسر الحديدي ابو دخان وصوت مزعج وهبط بعنف على المدرج الأخضر الغير ممهد.. الستات بقت تزغرط والمشايخ سجدوا لله رهبة وشكر على سلامة وصول الطيارين.. الناس شالوا الطيارين على الأكتاف لحد صيوان الوالي.. الطيارين نزلوا ضيوف لمدة يومين على أسرة "ساروجة" الشامية العريقة.. اعتقد ان من كتر الأكل اللى أكلوه وكرم الضيافة الشامي المشهور معروفش يركبوا الطيارة تانى.

في اليوم الثالث اجتمع نفس العدد في وداع الطيارين في الجزء الأخير من الرحلة.. الى القاهرة.. طلعت الطيارة وسط هتافات الناس وتمنياتهم بسلامة الوصول.. لكن للأسف الحلم الجميل لم يكتمل.. قرب بحيرة طبريا وقعت الطيارة يوم 27 فبراير واتحرق ومقدروش يميزوا جثث أبطالها الا من أوراقيهم الرسمية.. السبب العلمي لسقوط الطيارة هو رياح عنيفة كانت اقوى من محركات الطيارة البخارية ذات ال 200

حصان.. السبب الشعبي هو الحسد وعين الانجليز والفرنسيين الوحشة.. وتكريما لسيرة البطل فتحي بك.. قررت الدولة اطلاق اسمه على مسقط رأسه.. فتحية من فتحي.

الناس عاشت في هم وحزن على الشجعان الى راحوا في غمضة عين وعلى الحلم العثماني الى انتهي قبل ما يبدأ.. شحنوا جثث الطيارين لدمشق بالقطر في جنازة رسمية مهيبة.. صوت ولولة النساء غطي على صوت المؤذنين الباكي.. اتفتحت بيوت دمشق للعزاء.. كل شارع وحارة من حواري الشام القديمة كان فيها بكاء حار.. السلطان صمم على رحلة ثانية بعد أيام قليلة بنفس المواصفات لرد الاعتبار بقيادة الملازم أول نوري بك لعلها تحقق الى مقدرتش تحققة الطيارة الأولى.. نزلت الطيارة في بساتين المزة في دمشق، ولكن محدش كان منتظرها بسبب حالة الحزن على الطيارة الأولى.. ومنها انطلقت الى القاهرة علشان تسقط هي كمان قرب سواحل يافا.. للأسف حظها لم يكن أفضل من سابقتها.

الطيارين الثلاثة.. فتحي بك وصادق بك ونوري بك دفنوا في دمشق.. في نفس مدفن السلطان الناصر صلاح الدين.. تكريما لشجاعتهم وبطولتهم.. ده نفس المدفن الى شفته سنة 2007 ولم اهتتم..

يااااه.. معقول الدنيا صغيرة اوى كده!!!

سبحان الله..

"وَمَا تَدْرِي نَفْسٌ بِأَيِّ أَرْضٍ تَمُوتُ"





Türk havacılığının ilk şehitleri

Osmanlı Devleti'nin bilim ve teknolojinin en son imkânlarını havacılıkta kullanarak göstermesi için yapılan tarihi uçuşta bazı teknik anahtar noktaları meydana gelen kuzularda hayatını kaybeden kahraman havacıların özünü Türk halkını derinden etkiledi.

İSTANBUL-İSKENDERİYE HAVA SEYAHATI

Osmanlı Devleti'nin batıda emsalleri gibi bilim ve teknolojinin insanlığına sunduğu en son imkânları bütün ile kullanabildiğinin göstergesi amacıyla uçak seferine karar verildi.

Devletin idareni atandıkları topraklara ulaşabilecek güçte olduklarını göstermeleri amacıyla İstanbul'dan Hırs'a düzenlenecek bir hava seyahati belirlendi.



Yüzbaşı FETHİ BEY
Osmanlı İsmail HAKKI BEY
'MUAVENET-İ MİLLİYE' isimli Blériot uçağı



Yüzbaşı İSMAIL HAKKI BEY
Osmanlı NURİ BEY
'PRENS CELALETTİN' isimli Deperdussin uçağı



1914

- 8 Şubat
İstanbul'dan 2 uçak hareketlendi.
- 19 Şubat
Fethi ve Sadık beylerin yer aldığı Muavenet-i Milliye uçağı, Sam'a başarıyla indi.
- 27 Şubat
Muavenet-i Milliye, Sam'dan Konya'ya uçarken teknik nedenlerle Tabariye gölü yakınına düştü ve kaptanımız Ali Hakkı, şehit oldu.
- 9 Mart
Pilot Osmanlı Nuri ile kaptan Yüzbaşı İsmail Hakkı, 'Prens Celalettin' uçağıyla sefere devam etti ve Yafa'ya ulaştı.
- 11 Mart
Pilot Yüzbaşı Nuri Yafa'dan kalkıp seferinde uçarken denize düştü. sonucu şehit oldu. Yüzbaşı İsmail Hakkı ise kuzuları kaçı kurtuldu.

ERİBE KARTAL HÜRKÜS

İlk hava şehidi Türk Kaptan Eribe Kartal Hürkuş, henüz 16 yaşındayken pilotluğunu öğrendi. Parasütle atlatma konusunda egilimler aldı.



- 24 Ekim 1896
görsel Cumhuriyet Bayramı törenleri sırasında ilk denemesine başarıyla tamamladı.
- 29 Ekim 1896'da Ankara'daki son denemesi sırasında 'Caudron 59' uçağıyla hareketlendi.
- Uçaktan yapılan denemesi sırasında parasütle açılmadı ve 18 yaşında hayatını kaybetti.



Yüzbaşı FETHİ BEY

Türk tarihindeki ilk pilot hava şehidi Yüzbaşı Fethi, 1897'de İstanbul'da doğmuş, gence, 'İsmail' 1907'de İngiltere'ye hareket okulluna girmişti. Bakan Savasında cephede gösterdiği başarılarından dolayı Ocak 1914'te Gömme Lüksat Madalyası ile ödüllendirildi. Kasım 1913'te dönemin devlet adamı Cemal ve Talat Paşa'ya uçurarak, Türk havacılığın tarihinde ilk VIP uçağı pilotu oldu.



**TAYYARECİ ÜSTEĞMEN
SADIK BEY**

**RASİT İSMAIL
HAKKI BEY**

**TAYYARECİ ÜSTEĞMEN
NURİ BEY**

**TAYYARECİ YÜZBAŞI
FETHİ BEY**

سمعان الخراز

جبل المقطم - حسب الروايات المسيحية - كان موجود بين شارع المعز والفسطاط.. مش هتلاقى القصة دى فى كتابات المؤرخين المعاصرين زى ابن زولاق والقضاى.. ولا هتلاقىها عند المؤرخين اللاحقين زى ابن تيمرى والقلقشندى وابن دقماق.. ولا حتى هتلاقىها فى كتب المقرئى الى ارخ تاريخ كل زلطة فى مصر فى الخطط.. مش هتلاقىها الا فى كتابين.. تاريخ البطاركة "ساويرس ابن المقفع" والخريدة النفيسة فى تاريخ الكنيسة "الانبا ايسيدورس".

لما جوهر الصقلي دخل مصر اعلن الامان لكل اهلها.. بيحكى المقرئى فى الخطط ان ممثل المسيحيين قاله "اننا ننتظر وجودكم فى مصر بلهفة المضطهد حتى ننعم بالحريه فى حياتنا اليومية واموالنا وممارسة ديانتنا".. المشكله بدأت لما ظهر الوزير الالعبان يعقوب بن كلس. يعقوب ده راجل من بتوع السياسة المعمرين.. حاجه كده زى الزينى بركات او كمال الشاذلى او محروس برجاس بتاع فيلم تراب الماس.. رجل كل العصور.. اتولد لأسرة يهو*ديه فى بغداد وبعدين هاجر مع اهله الى مصر.. انتقل فى كذا وظيفة فى ديوان كافور الاخشيدى.. ولما لقي كافور بيعحب المتدينين اعلن اسلامه فاتبسط منه كافور وعينه امين على خزينة المال.. بس علشان كان راجل مش سالك استقصده الوزير القوي ابن حنزابه وقبض عليه وصادر فلوسه فهرب يعقوب من مصر على المغرب.. وهناك خدم فى بلاط المعز.. ولما لقي موضوع الاسلام السنى ده مش واكل فى المغرب.. قلب شيعى عادى جدا فاتبسط بيه المعز وجابه معاه وهو جاى على مصر علشان يبقى وزيره الاول والمسئول عن خراج البلد الى فلوسها بالهبل بس مش لأهلها.

فى ايام بطريكية البابا ابراهام بن زرع "967م-970م" يعقوب كان قارش ملحمة المسيحيين وبيتعهد يستفزههم ويسخر من ديانتهم ودائم التحريض على مناظرتهم لاثبات بطلان العقيدة المسيحية.. فى احد المرات رتب مناظرة جدلية من اياهم تحدى فيها البطريك والانبا ساويرس.. الاتنين وقفوا ساكتين قصاد الخليفة.. الخليفة سألهم مالكو ساكتين ليه؟ قالوه ازاى نجادل فى وجودك واحد الثور اعقل منه؟ يعقوب مقدرش يتكلم لأن الصاروخ ده كان مقصود بيه الاية 3 فى الاصحاح الاول من سفر اشعيا فى العهد القديم ..

"الْتَّوْرُ يَغْرِفُ قَانِيَهُ وَالْحِمَارُ يَغْلَفُ صَاحِبِيهِ، أَمَّا إِسْرَائِيلُ فَلَا يَغْرِفُ، شَغِي لَا يَفْهَمُ"

دى كانت شهادة النبى اشعيا عن اليه*ود الى يعقوب كان منهم.. قصف جبهات على.. يعقوب مسكتش.. غطس شويه ورجع بفكرة شيطانية بخها فى وذن المعز على انفراد.. وقاله يا مولاي فى الاصحاح السابع عشر من انجيل متى يقول المسيح لتلاميذه..

"فَالْحَقُّ أَقُولُ لَكُمْ: لَوْ كَانَ لَكُمْ إِيمَانٌ مِثْلُ حَبَّةِ خَرْدَلٍ لَكُنْتُمْ تَقُولُونَ لِهَذَا الْجَبَلِ: ائْتَقِلْ مِنْ هُنَا إِلَى هُنَاكَ فَيَنْتَقِلُ، وَلَا يَكُونُ شَيْءٌ غَيْرٌ مُمَكِّنٍ لَدَيْكُمْ" احنا بقى نجربهم بالاية دى فى جبل المقطم.. ان صحت وعرفوا ينقلوا الجبل.. يبقى خير.. هنخلص من الجبل الى خانق القاهرة ويبقى هواها اجمل ومناخها احلى.. وان فشلوا بيقوا كذابين وبيوتهم حلال للمسلمين ومفيش علينا ذنب لو طردناهم .

الفكرة عجبت المعز فبعث جاب البطريك وقاله شوف يا حاج.. يا اما تحركولى الجبل ده زى ما الانجيل بيقول.. يا اما تسيبوا البلد وتمشوا. ارتبك البطريك وطلب من الخليفة مهلة 3 ايام اعلن فيهم الصيام ووزع منشور على كهنة القاهرة يطلب منهم يقيموا القداس لأن الكنيسة بتمر بأقصى اعتبار لها من ساعة ما بدأت.. الخبر انتشر واصاب المسيحيين بالخوف.. انتشر البكاء والعويل وفقد الكثيرون الرغبة فى الحياة حتى ان المرضعات كانت بترى الاطفال الصغيرة قصاد الكنائس من غير رضاعة.. البطريك نفسه اعتكف فى الكنيسة المعلقة لا اكل ولا شرب لحد ما وقع نايم غصب عنه فى اليوم الثالث.. وفى منامه شاف العدرا مريم وهى بتقوله اخرج من باب الكنيسة للسوق الكبير هتلاقى راجل شايلى قربة مية.. هو عنده الحل.

صحى البطريك من النوم ونفذ الامر.. فتح باب الكنيسة ولقى فعلا شخص اعور شايلى قربة مية وبيسقى الناس.. دعاه البطريك للدخل وحكاه الحكاية كلها.. الراجل اتخض من هول الموقف وحاول يتملص من المسئولية.. البطريك ضغط عليه وحلفه انه ميكذبش عليه ويقول حكايته كلها.. الراجل بدأ يتكلم وحكى حكاية عينة العوراء.. كان اسمه سمعان وبيشتغل سروجى ودباغ جلود.. فى يوم زارته زبونه طلبت منه يصلحها جزمته.. وهى بتقلع الجزمة رجليها انكشفت قصاد سمعان فاتحركت الشهوة فى نفسه ناحيتها.. ولأنه كان راجل طيب وصالح لام نفسه كثير على الفعل الشيطانى ده.. وعلشان يكفر عن ذنبه راح قالع عينه اليمين بالمخراز الى كان بيشتغل بيه تنفيذاً لوصية المسيح فى الاصحاح 5 من انجيل متى.. الاية 29..

"فَإِنْ كَانَتْ عَيْنُكَ الْيُمْنَى تُغْثِرُكَ فَاقْلَعْهَا وَالْيَهَى عَنكَ، لِأَنَّهُ خَيْرٌ لَكَ أَنْ يَهْلِكَ أَحَدُ أَعْضَائِكَ وَلَا يُلْقَى جَسَدُكَ كُلُّهُ فِي جَهَنَّمَ"

بعدها راح للكنيسة واعترف بغفروله رغم سطحية فهمه للوصية.. ومن يومها بقى اسمه سمعان الخراز.

لما سمع البطريك القصة دى تأكد ان هو ده الراجل المطلوب.. فى اليوم الموعد وقف البطريك ومعاه الكهنة والمسيحيين وسمعان الخراز ناحية الجبل ومعاهم الانجيل والصلبان والشمع الكبير وقصادهم الناحية الثانية الخليفة المعز وعساكره ويعقوب واقف بيحسب نصيبه فى اموال وبيوت المسيحيين الى هينهبها بعد الليلة دى.

سجد البطريك وبعدين قام قال بصوت عالى كيريا ليسون "يا رب ارحم باليونانى" ومن وراه الناس بتردد نفس الكلمة وبعدين رسم الصليب على الجبل فارتجت الارض بزلزال ارتفع بعده الجبل لحد ما بانَت الشمس من تحته.. سجد البطريك تانى فهبط الجبل على الارض.. قام البطريك وكرر نفس الفعل فارتفع الجبل تانى.. 3 مرات على كده لحد ما خاف المعز وصاح الحضور الله اكبر لا اله غيرك.. وطلب المعز من البطريك يوقف لحد كده قبل ما تهد المدينة.

بعد المعجزة دى قال المعز للبطريك طلباتك اوامر.. فطلب البطريك بعد الحاج من المعز انه يرملمهم الكنيسة المعلقة وكنيسة ابو سيفين "فى مصر القديمة" وشكرا على كده.. بيقول الانبا ايسيدورس فى الخريدة النفيسة "قبل ان المعز بعد حادثة المقطم تخلى عن كرسى الخلافة الى ابنه العزيز وتنصر ولبس زى الرهبان وقبره الى الان فى كنيسة ابى السيوفين" بس ده كلام غير صحيح فنده الدكتور محمد عبد الله عنان ب 7 ادلة قوية اقلمهم ان ساويرس ابن المقفع نفسه الى كان حاضر الموقف ده لم يذكر اى شىء عن تنصر المعز.. كمان الانبا ايسيدورس كاتب "قيل" .. يعنى مجرد اشاعة.

انكارى للقصة كمسلم لا يمنعنى من احترام اصحابها ولا يمنعنى من زيارة الدير كمكان تاريخى على الأقل.. بعين اخرى اخدت عظام من القصة دى اقلها ان الفهم السطحى للنصوص الدينية ممكن يخسرك عينك.. وان ابليس برىء من الفتى الى عاشها اولاد ادم لأن بتوع السياسة قايمين بالواجب وزيادة.

أخذتني الجلالة وأنا بحكي الحكاية دى فى دير سمعان الخراز فى المقطم.. كان معايا 2 اصحابي.. لما خلصت لقيت حواليا مجموعة فيها مش اقل من 50 نفر من زوار الدير واقفين يسمعونو وسألوا اسئلة كتير قدرت ارد عليها كلها.. كان فيهم كاهن كُباره وشه مبتسم والناس بتبوس ايده.. بصلى وقالى يا سم الصليب عليك.. ربنا يحفظك.. لسه هشكره وارदله التحية.. لقيت واحد من صحابى بيناديني من بعيد بصوت حيانى سمعه كل الكوكب "ياللا يا احما!!!!" عاوزين نلحق المسرح ورفات القديس سمعان" وشى جاب الوان وتوقعت قلق.. بس الحمد لله ظنى خاب وطلعوا ناس طيبين. حسيت ان حجارة الدير بتضحك عليا وانا شبه انعام سالوسة فى فيلم ثقافى.. بعد ما عصرت العيال المجاهدين فى سبيل الشريط اسئلة عن الراحل ادوارد وايقون مرات انطون وبشارة ابن تريب وغبريال.. طلعت فى الاخرام مصطفى

صرغتمش

هو أكيد كان في ميزة في المملوك "صَرغَتْمَش" بخلاف انه مليح الصورة علشان الناصر محمد يدفع فيه 80 الف درهم فضه .. المبلغ ده مربع جدا بأسعار سنة 731هـ. احنا بنتكلم في 4000 دينار ذهب.. في حدود ما قرأت.. مفيش مملوك وصل ابدا للسعر ده.. قلاوون الكبير بجلالة قدرة دفع فيه الامير علاء الدين آق سنقر 1000 دينار ذهب.. وبسبب ضخامة المبلغ بقى اسمه قلاوون الألفى "ابو الف دينار يعنى".. قوم ابنه الناصر محمد يدفع في مملوك.. عمره قرب من 50 سنة.. كل الفلوس دى!!

ليه.. هو كان ساحر!!!

ويا ريته اظهر كرامة على كده.. صرغتمش فضل حامل الذكر تماما ايام الناصر محمد.. اخره كان مملوك ضمن جمدارية السلطان.. الى هما اللبيسة يعنى.. يشيل للسلطان مراية.. يسرحله شعره.. يناوله فوطة بعد الحمام.. وصلى الله وبارك.

صرغتمش مبدأش يظهر الا في عصر المظفر زين الدين حاجى.. بعد موت الناصر محمد مصر دخلت مرجيحة خناقة أولاد الناصر الثمانية "العيال" على العرش.. الفترة من 741هـ الى 746هـ قعد فيها 5 من أولاد السلطان على العرش لفترات تضحك.. الى قعد شهرين والى قعد ثلاثة.. التخين فيهم قعد في الحكم 3 سنين.. بس بعدهم مات بتأنيب الضمير لأن رأس اخوه -الى هو قطعها- كانت بتجيله كل يوم في كوابيس حرمته النوم لحد ما اعتلت صحته ومات.

اول مهمة نجح فيها صرغتمش كانت تثبيت الامير فخر الدين اياز السلحدار كنائب للسلطان في حلب.. يا دوب راح ورجع لقي الامراء طيروا رقبة زين الدين حاجى علشان كان عيل طايش بينزل يلعب مع الصبي في الشارع بالكسون ومضيع فلوس البلد على تربية الحمام والجارية اتفاق ومراهنات ماتشات البولو.

لما الامراء طيروا السلطان حسن اول مرة وحطوا مكانه اخوه الصالح صلاح الدين صالح -الى كان عمره 14 سنة- نجم صرغتمش ارتفع لما قدر يحجم طموحات النائب يلْبُغاروس في دمشق.. وثق فيه الصالح صلاح ومبقاش بيتحرك الا بمشورته.. صرغتمش طاح في البلد يمين وشمال ياخذ اراضى ويبنى بيوت ويعين ناس ويعزل ناس بمزاج مزاجه من غير حتى ما يرجع للسلطان.. زى ما عمل في القضاة الثلاثة بتوع دمشق ومع الوزير عبد الله بن زنبور في مصر مثلاً.. والى كان يتعزل كانت فلوسة بتروح على خزنة صرغتمش الى تضخمت بشكل ملفت.. لكن مين يقدر يقول ربع كلمه على الامير "شرس الاخلاق" الى كلامه بيمشئ على السلطان شخصيا؟

لما رجع الناصر حسن للحكم كان صرغتمش واحد من ست امراء كبار في ايديهم الحل والعقد.. 4 منهم كانوا تحت سيطرة صرغتمش.. مكانش منغص عليه حياته الا الاتابك شيخو العمرى.. يبتسم الحظ لصرغتمش سنة 758هـ لما اتقتل شيخو بضرية سيف من مجهول وهو قاعد في دار العدل.. علشان بعد كده بقى هو صاحب الامر والنهي الوحيد في السلطنة خصوصاً ان الناصر حسن كان لسه اخضر.

كثرت فلوس صرغتمش وكثرت ممالিকে لحد ما زاغت عينه على للكرسى الكبير.. السلطان حسن كان شايف كل ده وعامل عبيط.. الفترة الى قعدها مخلوع وسط الحريم علمته الصياغة.. قرر السلطان حسن ان صرغتمش لازم يطير.. بس الى زى ده مينفعش يطير كده مرة واحدة.. الاول نجيبه على حجر السلطان وبعدين ننقل عليه الخية ونطير رقبتة.

فضل السلطان مرقّد لصرغتمش شهر بحاله.. هدايا بالكوم وافخم لبس وحرابر متفصله مخصوص علشان في اسكندرية.. وهوب يوم 20 رمضان سنة 759هـ. يقبض عليه السلطان هو ودراعه اليمين الامير طَشْتُمُر القاسمى حاجب الحجاب.. بره القلعة حس ممالك صرغتمش ان في حاجه مش تمام فاتجمعوا في وضع الحرب.. السلطان بعثلهم الامير تَنْكُزُغا.. فضلت العاركة شغاله لحد العصر.. لما اتهزم ممالك صرغتمش جرى وراهم الناس يحدفونهم بالطوب وبعدين اتدوروا على بيت صرغتمش ومحلاته نهبوا كلها.

السلطان شحن صرغتمش على اسكندرية.. اسكندرية ايامها كانت وان واى.. الى بيروحها ميريغيش.. صرغتمش حس انها النهاية فقرر يصالح السلطان حسن بطريقة رومانسيكية حبتين.. بعثله بيت شعر لعمر بن الفارض بيقول فيه:

قلبي يحدثنى بأنك متلفي *** روجي فداك عرفت ام لم تعرفي

وصلت الرسالة للسلطان حسن وقراها بعدم اهتمام.. تحسه بعد ما خلصها ولع بيها سيجار وهو بيقول بصوت عادل ادهم.. فسحوه. صرغتمش مات في سجنه بعد 72 يوم وهو على مشارف ال 80 سنة.. ناس بيقولوا ممالك السلطان خنقوه.. وناس بيقولوا مات لوحده.. الله اعلم.. هو كان هيعيش اكثر من كده ايه يعنى!!!

انا شخصيا اشك انه زود في الاكل من عند الفلاح فالكبدة طبقت على نفسه فطسته..

مش بس حجارة مدرسة صرغتمش في السيدة زينب هي الى بتحكى سيرة انسان طار وارتفع ثم كما طار وقع على جدور رقبتة.. انت لو طلعت من جيبيك خمسة جنيه دلوقتي هتلاقى قبة صرغتمش بابنه من ورا مأذنة ابن طولون على استحياء.. وكأنها مكسوفة من وجودها على ورقة اخرها سندوتشين فول.

السلطان معرفش

يا ترى ايه العلاقة بين مسلسل لعبة العروش وبين قبة الغفر؟
لو سألت حجر القبة عنها.. هيقولك انه بعد موت السلطان قايتباى مكانش في ولى عهد قوى يقدر يحافظ على السلطنة قوية زى ما كانت في ايامه.. مصر كانت بتعاني من مراكز قوى زى الامير ازبك والامير طومان باى والامير جان بلاط.. الامراء دول كانوا مقطعين بعض الا انهم كانوا ييجوا لحد قايتباى وستوب.. ولا نفس.

مين هيمسك الحكم في وجود القنابل دى؟

اتفق الامراء على تولية محمد بن قايتباى ابو 17 سنة اكراما لذكرى ابوه.. ده السبب المعلن.. السبب الحقيقي ان كل واحد فيهم شايف نفسه احق بالعرش.. بس اى واحد فيهم لو خد خطوة واحدة ناحية العرش فالبلد هتولع حرقا.

بالرغم من تربية ابوه القاسية الا ان محمد بن قايتباى كان عيل خايب ملوش الا في الهنكره والحشيش.. وبسبب طيشه اتخلع من العرش مرتين.. أول مره "خاله" وقف جمبه ورجعه للحكم.. بس تاني مره الموجه كانت عالية.. الأمراء جابت جاز من افعاله وقرروا وتولية "خاله" مكانه.. الخال ده يبقى أبو سعيد قنصوه الأشرفي.. داوادر السلطان قايتباى الكبير.. الخال اتفق مع الامراء على قتل ابن اخته علشان يقعد مكانه سنة 1498م.. الخال والد صحيح.

يوم تسلطن الخال كان يوم سينمائي ساخر..

الامراء في القلعة بيبوسوا الارض قصاد السلطان ويحلفوله يمين الولاء بينما كل واحد فيهم مرتب خطة قتل السلطان الجديد علشان هو يمسك مكانه.. تتوالى القبلات على الارض ويخرج امير ويدخل امير وفي الانهات تختمر خطة الخلاص من السلطان الى عمال يوزع القاب ومناصب على الامراء علشان يأمن شهم.. الخال ابو سعيد كان ضعيف جدا حتى ان المؤرخ المعاصر ابن اياس قال عنه انه "كان مسلوب الاختيار مع الأمراء." ابن اياس مكذبش.. الخال رغم انه كان لسه شباب الا انه كان عايش في ملكوت تاني.. لما كانوا يسألوه عن حاجه كان يرد ويقول "يخشى.. يخشى" يعنى معرفش.. الكلام ده معداش على المصريين والسنتهم اللطيفة فسموه السلطان معرفش.

الخال قعد في الحكم 27 شهر لحد ما قرر الامراء ان كرسى السلطنة يلزمه شوية تنجيد الا يكتمكم.. وكانت البداية من عند طومان باى. طومان باى اتفق مع نائب السلطان في الشام "الأمير قصره" انه يعلن التمرد على السلطان في مصر.. لما وصلت اخبار التمرد للسلطان رد كالعادة وقال "يخشى.. اسألوا الاتابك جان بلاط".. الاتابك جان بلاط كان مرتب كل حاجه مع الامير طومان باى.. نشروا في البلد شائعة بتقول ان السلطان قبض على طومان باى وهيقته.. شائعة زى دى كانت كفيلة انها توحد الامراء كلهم ضده لأن الكلام ده معناه انه هيبدا يتسلى عليهم واحد واحد.. طالما بدأ بالدوادر يبقى اكيد هيبعدى على الجمदार والبنقدار ويختم بالاستادار والخاندار.. ماهو خلاص طلعله سنان.

الامراء حاصروا السلطان في القلعة.. السلطان جرى استخفى في جناح الحريم وانتكر في زى الجوارى وبعدين خد ديله في سنانه وقال يا فكيك.. ومن يومها لحد النهارده محدش عارف هو راح فين.. الخال الندل بني القبة الكبيرة دى علشان يندفن فيها.. والله اعلم مات فين واندفن ازاى بعد ما هرب.

طومان باى اللثيم تنازل عن العرش للامير جان بلاط بكل ممنونية.. قعد جان بلاط على الكرسى واتسمى الأشرف أبو النصر جان بلاط.. بس صاحبنا بتاع الشام قاله مع نفسك يا نجم.. انا قصره سلطان الشام.. طبعنا بالاتفاق مع طومان باى.

طومان باى فضل يسخن جان بلاط علشان بيعت تجريده تأدب المتمرد بتاع الشام.. جان بلاط صدق ان طومان باى مخلص وخرج بنفسه على رأس حملة لقمع تمرد قصره.. قوم طومان باى بيعت فرق من ممالিকে علشان تساند الأمير قصره ضد السلطان جان بلاط.. نفس الى عملوه مع ابو سعيد قنصوه.. عملوه مع جان بلاط.

لما وصل جان بلاط للشام القضاة في مصر خلعه من الحكم وقبض عليه قصره وحبسه في سجن قلعة دمشق.. وفي ليله قمريه لطيفة بعتله ممالك من الى مقضيين حياتهم في جولدز جيم علشان يخنقوه بعد ما قعد فوق خوازيق العرش 18 شهر بالظبط.

طومان باى استقر على العرش واتسمى العادل طومان باى.. ابن اياس كتب عنه انه كان راجل حسين فهمى في نفسه كده.. لما كان بيمشى في الشارع كانت الحريم تزغرط في المشرييات وترى عليه ورد.. تعبنا والله من الاندر ايدج دول.. طومان باى كان لثيم.. علشان يضمن ان محدش ينازعه في العرش بدأ رحلته في التخلص من سلم الصعود بالغدر برفيق مؤامراته الامير قصره بتاع الشام.. دعاه لزيارة مصر وبعدين حبسه في القلعة وخنقه بنفس الطريقة الى خنق بيها قصره السلطان جان بلاط في دمشق.

قعد اد ايه طومان باى في الحكم؟؟

100 يوم بحالهم يا مؤمن.. لحد ما قرر ذئب عجوز اسمه قنصوه الغورى انه ينجذ كرسى السلطنة تاني.. طومان باى لما لقي نفسه متحاصر هرب على جناح الحريم وانتكر في لبس الجوارى زى ما عمل الخال ابو سعيد قنصوه قبل كده.. بس المرة دى الامراء قفشوه وقطعوا راسه ومكانش وصل 40 سنة.. طومان باى اندفن في القبة الى بناها لنفسه.. حاليا هي موجودة في مقر قيادة المنطقة المركزية العسكرية في العباسية.

لو سألت حجر القبة عن الحكاية دى هيقولك "يا ابن آدم.. افعل ما شئت.. كما تدين تدان".. الحجر مش ساكت ابدأ.. الحجر شايف ويراقد وبيسجل علشان يحكي للناس بعد كده..

على الله حد يتعظ.

عباس حلمي الأول

الراجل ده لغز كبير في تاريخ مصر الحديث..

زيه زى اى انسان في الدنيا.. في ناس بتمجد فيه وناس بتلعن ايامه.. ناس قالت انه كان ضد النفوذ الاجنبى في مصر وناس قالت انه كان حاتم رشيد.. بين دول ودول لازم تسقط الاراء الشخصية تماما وتركز في الاحداث الى محدش ينكرها.

مفيش خلاف ان عباس حلمي الاول كان شاب معدوم المواهب فقير الامكانيات.. جده يبقى محمد على وعمه ابراهيم باشا.. اخد رتبة الميرمران ومسك مديرية الغربية وبعدين اترقى الى قائمقام جناب خديو ومسك منصب كتحدا مصر.. وبعدين بقى قائد فيلق كامل في جيش عمه.. ومع كل ده لا اتعلم سياسة من جده ولا انجز حاجه في الحرب زى عمه ولا خد شهادة من المدارس ولا حتى عرف اى لغة غير التركي والعربي.. خيبة قوية فعلا.. ومع ذلك قانون وراثة العرش كان في صفة لأنه كان اكبر الذكور سنًا في الأسرة العلوية.. هو كان اكبر من سعيد باشا ابن محمد على ب 9 سنين. بتحكي النبيلة نيفين يسرى في كتابها "قسمة" ان موت الامير احمد طوسون - ابو عباس حلمي الأول - كان صدمة للأسرة لأنه مات صغير وهو الى كان على الحجر.. قوم لما مات حزنت عليه امينة هانم - زوجة محمد على الاولى - حزن رهيب وفي المقابل اسرفت في تدليل ابنه عباس حلمي وهى بتربيته.. طلباته اوامر ومفيش حد يعصاله كلمه.. علشان كده كبر عباس حلمي انانى عدواني شرس الطباع.. بمعنى ادق.. الواد ملقاش حد يربيه زى عمه ابراهيم باشا كده.

ابراهيم باشا كان راجل عسكري معجوبش الحال المايل بتاع ابن اخوه.. كل شوية كان يهزأه على افعاله الغلط.. عباس حلمي سابه له البلد كلها وطفش على جده ومرجعش الا علشان يستلم العرش سنة 1848م لما عمه مات في حياة جده الى الزهايمر بهدله اخر بهدله.

عباس حلمي مشى على انجازات جده باستيكة.. بعث جاب الطلبة الى كانوا في البعثات التعليمية قبل ما يكملوا دراستهم.. لف على المدارس الى عملها جده خد منها الطلبة الاوائل ولمهم كلهم في مدرسة واحدة سماها "المفروزة" وقفل باقي المدارس وشكرا للتعليم على كده.

وخد عندك بقى البلاوى دى في كل المجالات.. الجيش الى سليمان باشا الفرنساوى ضيع فيه عمره فيه خفضه الى 9000 عسكري.. البحرية الى شقى فيها حسن باشا الاسكندراني صاحب البطولات في نافرين جابها الارض.. الغى نظام الاحتكار في التجارة والزراعة علشان يبقى التجار الاجانب منهم للفلاح غلطول.. الكلام ده كان كويس للفلاحين والاجانب.. بس مصيبة على خزينة الدولة.

عباس حلمي كان مصاب بجنون الشك.. عقله صورله ان امراء الاسرة بيخططوا لقتله علشان كده خنق عليهم كثير لحد ما طفش اغلبهم على اوروبا واسطنبول.. من ضمن الى طفشوا من افعاله كان ولى العهد محمد سعيد باشا الى فضل عايش بعيد عنه في اسكندرية لحد ما مات وعمته نازلى هانم الى هربت على اسطنبول.

ونتيجة لعقدة الشك دى انتشرت في ايامه الوشاية والتجسس بشكل مرعب.. كان افراد البيت الواحد بيتجسسوا على بعض ويبلغوا عن بعض عادى جدا.. وهو في المقابل كان يتعامل مع الموضوع ده بمنتهى القسوة.. يكفى مجرد الشك علشان يصدر حكم بالنفى الى بلد اسمها طوكو في اقصى جنوب السودان.. في ايامه ظهر المثل الشهير "هنروح في طوكو" كناية عن النفى الى مكان بعيد.. والمعاملة دى مكنتش للاغراب بس.. بيحكي نوبار باشا انه امر بخياطة بقى واحدة من حريمه لأنه سمع انها دخنت سجاير.. راجل جدد.. الشدة مع الحريم مطلوبة برضه.

وزى ما عاش غريب الاطوار.. مات من غير ما حد يعرف القصة الحقيقية.. وان كانت في روايتين للموضوع ده..

الرواية الاولى "الاقوى" حكاه اسماعيل سرهنك في كتابه حقائق الأخبار عن دول البحار.. سرهنك كان فريق في البحرية ايام الخديو اسماعيل واتولد قبل موت عباس بسنتين.. هو محضرش الواقعة انما نقل الى كان بيتقال.

بيقول اسماعيل سرهنك ان عباس حلمي كان له حاشية مماليك من اهل الثقة كان بيفرق عليهم فلوس والقاب زى الرز.. اقربهم ليه كان اسمه خليل درويش.. صحبوا الناس في يوم لقوا خليل درويش بقى قائمقام "مقدم يعنى" وخد لقب بك.. خليل اتنفخ باللقب فبدأ يسىء معاملة باقي الحاشية والباشا في ضهره.. المماليك بدأوا ينبطوا عليه بالكلام ويتهموه انه عجب الباشا خصوصا انه كان حليوه واجرودى.. خليل اشتكى للباشا.. الباشا أمر بجلد العيال بالكرباج ولبسهم طرايطر ورماهم في اسطبل الخيل.. لجأت العيال الى خشداشهم "صديقهم" مصطفى باشا أمين خزينة الوالى.. مصطفى باشا اتوسط لهم فعفا عنهم الباشا ورجعهم لوظايفهم.. بس العيال كانوا مربطين مع جوز مماليك من خدم الباشا اسمهم عمر وصفى وشاكر ساعته الباشا كان في قصره في بنها "الى هو بقى جامعة بنها حاليا".. العيال كانوا مربطين مع جوز مماليك من خدم الباشا اسمهم عمر وصفى وشاكر حسين كانوا قرفانين منه هما كمان وكان الدور عليهم يومها في حراسة الباشا وهو نايم زى عوايده.. الاربعه هجموا عليه وقتلوه هو نايم.

الرواية الثانية "الاضعف" ذكرت اولمب ادوارد في كتابها كشف الستار عن أسرار مصر.. بتقول مدام اولمب ان عمته نازلى هانم كانت عارفه انه بتاع عيال فراحت باعته اثنين مماليك من عندها متتقين بعناية على سوق العبيد في مصر.. العيال لفتت نظر وكيل عباس حلمي في السوق فراح مشترتهم غلطول لمزاج الباشا.. دخلوا القصر ولما جه الدور عليهم في حراسته وهو نايم قتلوه ونزلوا جرى على اسطبلات الخيل خدوا حصانين هربوا بيهم على القاهرة ومنها الى اسطنبول.. عرف الموضوع ده ابنه الامير ابراهيم الهامى فقرر ينتقم لمقتل ابوه.. خد بعضه على اسطنبول وهناك شاف واحد من العيال دى راح قاتله بالرصاص بينما الثانى غطس ومحدش عرفله طريق جره.

اتفقت الروايتين على مكان وطريقة وسبب القتل.. واختلوا في مين الى قتل ..

وفي حدوده تانية بقى بعيد عن كل ده بتقول انه بسبب عداؤه للطريقة البكتاشية "أحد الطرق الصوفية الأقرب للتشيع" واللى كان يتبعها اكثر افراد الأسرة العلوية حصل ضده كل هذا التحزب والتشويه.. بس دى حكاية كبيرة اوى هنبقى نحكيها مع حكاية العلاقة بين جبل المقطم والباينا والعفاريات.

وانا ماشى في حوش الباشا في الامام الشافعي علشان اروح اقعد عند قبر ابراهيم باشا زى عوايدى.. لازم اعدى على قبر عباس حلمي الاول.. مش قادر افتكر للراجل ده الا انه بنى قصر فخم في صحراء قاحلة هواها جاف زى ما الدكتاتره نصحوه علشان صدره التعبان.. القصر كان فيه 2000 اوضه حسب حكاية دليسبس لما زاره هناك علشان يقنعه بحفر القناه.. قصر من ضخامته سموه الخمس سرايات وكان السبب ان المنطقة تتعمر وتسمى على اسمه.

العباسية.. أجدع ناس.

يشبك من مهدي

الامير يشبك كان الصورة المثالية لمملوك من المماليك الجلبان في عصر الشركس.. محدش يعرف اسمه الاصلى ولا مين ابوه.. سموه يشبك لأنه وصل مصر صغير.. سنة كان 11 سنة على غير عادة الجلبان.. يشبك بالتركي معناها الصغير.. نسبوه للنحاس مهدي الى باعه للظاهر سيف الدين جقمق.. فبقى اسمه يشبك من مهدي..
تميز في الفروسية وارتقى من منصب الى منصب اعلى في ايام الظاهر جقمق والاشرف اينال من بعده.. على نجمه في ايام الظاهر حُشقدم لما بقى امير عشرة واتعين كاشف للبهنسا في الصعيد.. وهناك عرف دواخل الصعيد لما قرب من الهوارة.. ودى الفترة الى نفعتة بعد كده ايام السلطان قايتباى.

الهوارة كانوا ملوك الصعيد.. حياتهم مع المماليك كانت شد وجذب بين تحالفات ايام الرخاء وحروب يسميها السلاطين حملات تأديب العربان في موسم جمع الضرائب.. المماليك كانوا حريصين دايما على تفتيت الهوارة.. فضل الحال على كده لحد ما استلم الصعيد الامير يشبك في ايام السلطان قايتباى.. يشبك قعد هناك 7 شهور عمل فيهم كل حاجه ممكن تتخيلها.. كان يبولع في بعضهم او يدفن بعضهم احياء.. وساعات لما كان يحب يخوف السايين.. كان ببسلخ المربوط حى.. كده من غير دبح.. يجيب الاسير من دول ويسقطه في حلة مية بتغلى ويعمل عليه شورية.. رجع يشبك من الصعيد ومعه صناديق فيها 200 الف دينار حصيلة الضرائب.. مبلغ زى ده كان كفيل ان قايتباى يعمل حفلة استقبال محصلش وبعينه دوا دار السلطنة.. بالرغم من الدموية دى كلها تلاقى المقريزى بيتكلم عنه كويس.. وتلاقى ابن اياس ببستفيض في وصف أعمال البر والتقوى الى كان بيعملها ومجالس العلم الى كان ببصرف عليها.. وده يوضحلنا حاجتين.. اولهم ان يشبك كان زى اى مملوك جمع بين كل المتناقضات.. وثانهم ان الناس مكاتوش بيعتبروا الصعيد جزء من مصر.. والدليل اهو.. المؤرخين اشادوا بأعمال البر بتاعة يشبك في القاهرة.. بينما اعتبروا وحشيته مع اهل الصعيد مجرد تأديب لاعداء الوطن.

يشبك حضر الصراع المملوكي العثماني من اوله.. صراع المماليك والعثمانيين مبدأش مرة واحده كده بين سليم الاول والغورى.. الاول كانت مناوشات بنظام الحرب بالوكالة في منطقة الاناضول الى تفككت الى 16 اماره بعد سقوط سلطنة سلاجقة الروم.. كان اقواهم اماره بنى عثمان الى اصبحت بعد كده الدولة العثمانية.. بعض الامارات كان يخضع لسلطنة المماليك في مصر وبعضها خضع للعثمانيين.. مرة العثمانيين يطلبوا ود السلطان برفوق ومرة يهاجموا الاملاك المصرية في الاناضول في ايام بايزيد يلدريم.. مرة السلطان اينال يقيم الافراح والاحتفالات في مصر ابتهاجا بفتح القسطنطينية والسلطان الفاتح يبعثله هدية 2 اسرى من كبار رجال الدولة البيزنطية ومرة بايزيد الثانى يقلب على قايتباى بسبب استضافته لأخوه الامير جم.. خناقة طويلة عمرها اكثر من 150 سنة لا تدل الا على الحول السياسى.. الخناقة دى دفع تمنها المسلمين في الاندلس ومصر والشام غالى اوى.. لو كان المتصارعين توحدا ضد العدو الاصلى – الى اكلمهم واحد واحد بعد كده – كان زمانك واخذ شقة اوضتين في النمسا لخطيبتك الى من بولاق.. او كنت بتقضى جيشك في نورماندى بعد ما اتخرجت من هندسة قرطبة او بتشتغل HR في روما وبتبعت لابوك فلوس في الزقازيق علشان يكمل فلوس فرح اختك على عريسها الالمانى.. او كنا سهرنا كلنا نتفرج على نهائى كأس خليفة المسلمين بين الزمالك وما نشستر يونايته بعد ما الاهلى خد درع دورى الخليفة بعد ما كسب البايرن 3-1 بالحكام كالعاده.

بالرغم من قدرته انه ينقلب عليه في اى وقت الا ان يشبك كان شديد الاخلاص لقايتباى.. علشان كده السلطان كان بيحبه.. يشبك كان مشغول بعرش تانى بعيد عن قلعة القلق والمؤامرات في مصر وقريب للأرض الى هو جه منها.. عرش اماره الخرفان البيضاء.. اماره الخرفان البيضاء "آق قوينلو" كانت من الامارات التركمانية الى حكمها شاه سوار في الاناضول.. مصر بعثت علشانها 3 حملات قبل يشبك.. الاولى ايام السلطان حُشقدم بقيادة نائب الشام الأمير بردبك البشمقدار والثانية ايام قايتباى بقيادة قلقسيز الأتابكي والثالثة في ايام قايتباى برضه بقيادة الامير ازيك من ططخ.. الثلاث حملات اتوكسوا ومقدروش يعملوا حاجه لحد ما قايتباى قرر بيعتلهم رجل المهام الصعبة.. يشبك من مهدي.. قاهر الهوارة.

كعادته تألق يشبك وابدع.. هزم الجميع وخد شاه سوار وعيلته كلها اسرى علشان قايتباى يشنقهم في مصر.. المفروض ان الدنيا حلوة ويشبك قرب من تحقيق حلمه.. ايه الى حصل بقى علشان يشبك يخسر الحرب قصاد آل الفضل في الرها.. محدش عارف.. كل الى كتبه ابن اجا في كتابه "العراك بين المماليك والعثمانيين الاتراك مع رحلة الامير يشبك من مهدي الدوادار" انهم قطعوا راسه وحشوها قطن وبعوتوا جثته مصر زى ما هي كده.. من غير راس.

يشبك وهو خارج من مصر كان بيقف يرتاح في صحراء المطرية.. عجبتة المنطقة وهوها النظيف فقرر يبني هناك قبة فخمة.. كثير كان السلطان قايتباى ينزل من القلعة ويروح ليشبك القبة بتاعة علشان الهى والمىء والحاجات الى مبصحش الامراء يشوفوها في القلعة.. لما الغورى مسك الحكم عجبتة القبة وعمل حوالها جناين ونوافير مية وبير للشرب.. واحده واحده زحف العمران على قبة الغورى.. تلف الايام وتيجى الايام وييجى ابراهيم باشا بن محمد على يبني هناك قصر كبير على مساحة 70 فدان يسميه قصر القبة.. يورث الخديو اسماعيل القصر من ابوه ويجدده بلمسة اوروبية ويزود مساحات الجنائن الخضراء علشان ينافس بيه قصر عابدين.. الناس سمت المنطقة حدائق قصر القبة نسبة الى القبة الى بناها الامير يشبك في ايام مجده واخدها الغورى في ايام وكسته.

لما كنت بركب المترو من محطة منشية الصدر سألتنى واحدة من زميلات الدراسة.. هو انت ساكن في شارع الدويدار؟ قتلها اسمه الدوادار مش الدويدار.. هنا عاش الامير يشبك من مهدي دوا دار السلطان قايتباى مع مراته بنت السلطان المجنون المؤيد شيخ الى قتل ابنه.. يشبك هو صاحب القبة الفخمة الى قصاد القصر.. القبة الى سموا على اسمها اجمل احياء مصر قاطبة.. حدائق القبة..

الولس كسر عراي

هو صحيح الولس كسر عراي؟؟

الولس يعنى الخيانة.. قرأت مره مقال للدكتور أسامة الغزالي حرب في الأهرام بعنوان "داستور يا عراي" أتكلم فيه عن مثل شعبي بنفس الصيغة.. داستور مش دستور.. ودى كلمة الناس كانت بتقولها زمان على سبيل الاستعاذة من العفاريث.. زى ما بتسمع في الافلام القديمة مارى منيب وهى بتقول داستور يا اسياى.. داستور يا مباركين.. دكتور اسامة كان بيدور على الأصل التاريخي للمثل.. بعد بحث طويل في معجم الأمثال الشعبية لأحمد تيمور باشا ومصادر اخرى عرف يحدد بالظبط امتى ظهر المثل ده..

سبتمبر سنة 1882م. صباحية دخول الانكليز مصر..

مش هنخوض في قصة عراي الممزوجة بخيانة رئيس مجلس الاعيان محمد باشا سلطان "ابو هدى شعراوى" وخيانة العربان علشان جنيهاات صفيح مطلية ذهب وخيانة قائد فرقة السواري القائمقام عبد الرحمن حسن.. الناس دى خانت مصر قبل ما يخونوا عراي.. مش هنقول ان الاميرالاي على يوسف "خنفس باشا" سرب خطة الجيش للانجليز قبل الهجوم وقام بليل في العتمة نورلهم الطريق من الشط لحد معسكر عراي علشان يدخل الانكليز في عز الضلمه وتصحى العساكر من النوم مفزوعة تحارب الانكليز بسلاحهم الميرى القديم وهما لابسين ولا مؤاخذه الكسون ابو دكة.. بلاش نفتكر ان في عز الحرب تراجع خنفس باشا قائد قلب الجيش ب 18000 عسكرى في مواجهة 2500 عسكرى انجليزى.. ده لو كانوا قام عليهم بالطوب كان خلص الليلة بدرى بدرى ولا كنا شفنا احتلال ولا نيله.. سيبنا من كل ده.. خلينا في عراي نفسه.

في قصة مشهورة عن عراي انه قضى ليلة 13 سبتمبر مع عساكره في حلقة ذكر.. الاميرالاي عراي.. الراحل الثورى الازهرى.. ال ايه جاب مشايخ ودرأويش قعدوا طول الليل يقولوا الله حى علشان ربنا ينصرهم على الانكليز.. الكلام ده انكره محمود الخفيف في كتابه "أحمد عراي الزعيم المفترى عليه" وأكد أكثر من مرة ان القصة دى مدسوسة على عراي من خصومة حسب شهادة المعاصرين الانكليز.. المستشرق ولفور بلنت والكسندر برودلى محامى عراي.

بس عارف.. انا قلبي اميل الى تصديق القصة دى.. وهقولك ليه..

في كتابه "في موكب الدعوة" رجع الشيخ الفيلسوف محمد الغزالي رحمة الله عليه اسباب هزيمة عراي ل 3 اسباب رئيسية:

اولا: عراي وثق في ناس مكانش يثق فيهم..

ثانيا: عراي كان خصم ضعيف في مواجهة قوى كثير امتلكته ضده لأنه فلاح مصرى..

ثالثا: عراي كان ساذج اساء فهم التدين والدليل.. حلقة الذكر.

طيب ما هو الشيخ الغزالي ناقل من ناس برضه.. يعنى يجوز انه نقل قصة هي اساسا مدسوسة على عراي زى ما قال محمود الخفيف.

مش كده؟؟

زرت بيت عراي في قرية هزية رزنة.. الساعة كانت 11 صباحا.. البيت مفتوح وفي موظفين تبع وزارة الآثار.. بيت مهمل لا يليق ابا بسيرة رجل زى عراي.. وانا خارج من البيت بصيت على الهدف الى انا جاى علشانه مخصص بناء على نصيحة صديقي واستاذي في هواية التراث.. دكتور حامد محمد حامد.

باب البيت..

ركزوا في الصورة واعملوا زووم..

ايه الى على الباب ده؟؟؟

شوية رموز.. نجمه وخطوط وحروف وهاشتاج!!

هو عراي كان عنده حساب على تويتر وعمل هاشتاج سماه [#اطردوا الانكليز](#) مثلا؟

محدث في الموظفين يعرف.. بس مع شوية دعبسه عرفت ان ده حجاب حماية.. طلسم يعنى.. حجاب من "العهود السلিমانيّة السبعة".

ايه جو الفيل الأزرق ده؟؟

حجاب وطلاسم وشعوذه!!! سحرا!! معقول عراي كان له في الهري ده!!!

تطلع ايه العهود السليمانية دى؟

في كتاب سحر منسوب للأمام جلال الدين السيوطي اسمه الرحمة في الطب والحكمة.. كتاب افتت دور الافتاء في مختلف الدول الإسلامية انه كتاب من كتب الكفر الصريحة المحرم قراءتها.. زيه زى كتاب شمس المعارف لأحمد بن على البوني.. واساسا أنكر اهل العلم نسب كتاب الخيل ده لعالم جليل زى السيوطي.

الكتاب بيحكى عن حوار دار بين جنیه شریه اسمها "التابعة ام الصبيان" وبين نبي الله سليمان عليه السلام.. وفي نهاية الحوار عرف منها النبي سليمان 7 اذكار تحفظ حاملها من الشرور.. الى هى سموها بعد كده العهود السليمانية السبعة.. والى واحد منهم منقوش على باب بيت عراي.

مفيهاش بقى.. الزعيم عراي - زى ما هو واضح اهو - نشأ وتربى في بيت يؤمن الدجل والخرافات والاي كلام.. هسيبلوكوا صورة العهود السليمانية في اول تعليق.. انا بس حبيت نفتكر سوا ان الولس مش هو بس الى كسر عراي..

الخرافات والسذاجة والدروشة هما الى خلوا الولس يكسر عراي.

رينا يرحمنا منهم.

مش بس الحجر هو الى بيتكمم.. الخشب كمان ممكن يحكيك.. بشرط انك تسمع كويس.

الحكاية الثانية

الولس كسر عراي

=====

هو لازم السياحة كلها تكون بره مصر!!

اكيد لا.. مصر فيها كتير برضه.. بس للأسف.. مهمل.

في طريقي من بيت ابويا في طنطا الى بيت حماتي في الشرقية.. لازم اعدى على بلد صغيرة اسمها هرية رزته.. دى قرية على بعد 6 كيلو من الرقازيق.. في مدخلها تمثال مربع للزعيم الراحل المناضل المفترى عليه.. أحمد عراي.

يا صدمتي في قلبي!!!

بقي هو ده مدخل بلد عراي.. جرى ايه يا جدعان.. هو كان عاصي ومغضوب عليه بجد وللا ايه؟

هو ده خير ما جادت بيه قريحة النحاتين في مصر لتكريم الراحل الى وقف للخدو توفيق رجل الإنكليز في مصر!!

اخص عليكى يا دنيا..

أولاً.. التمثال نفسه غلط.. جرى العرف ان تماثيل القادة المحاربين على الأحصنة بتبقى كالاتي:

الحصان رافع رجله الاتنين الأمامية.. بما معناه ان القائد ده مات في ميدان المعركة.

الحصان رافع رجل واحد أماميه. معناه ان القائد ده مات جريح او متأثر بجراحه، ولكن مش في الميدان

الحصان واقف عادى. معناها ان القائد ده مات بعد ما تقاعد او مات في بيته زى اى حد.

كلنا عارفين أن عراي مات في بيته بعد ما رجع من المنفى.. يبقى الحصان رافع رجل واحد ليه؟

ما علينا.. مش دى الحاجه الوحيدة الى توجع في سيرة عراي عموما.

نخلينا في الموضوع الأساسي..

في يوم ما قررت ازور بيت عراي بدل ما انا بعدى عليه كل مره من بعيد كده.. المره دى نزلت وركبت توك توك لمدة 10 دقائق بعدها لقيت نفسي في شارع أفقر من الفقر الفقير.. السواق قالي اتفضل يا باشا.. البيت على الشمال اهو.

المفروض ان البيت بقى متحف.. تبع وزارة الاثار يعني..

الساعة 11 صباحا.. البيت مفتوح وفي موظفين حكومة تبع الآثار.. طبعاً التصوير ممنوع لسبب ما نجهله ويلزم تصريح من جهة ما منعهاش هناخده في يوم مجهول بعد ما ندفع المعلوم.. العادي ان 20 او 30 جنيه ادفنهم في جيوب الموظفين ومش بس هيسمحولى بالتصوير.. لا.. دول ممكن يخلوني ادفن صورته قديمه ليا في وسط مقتنيات بيت عراي على أساس انى أبقي اخوه الأصغر من امه وكده.. وادخل التاريخ وأبقى الأميرالاي حسنى عراي انا كمان.. مش بعيد يعملولي تمثال أكبر من تمثال عراي نفسه.

شيء ما في هيئتهم او طريقة كلامهم.. اهمالهم وجهلهم الواضح بالمكان الى قايمين على حراسته وصيانتته قفلوني منهم حتى انى استخسرت اقولهم صباح الخير.. دخلت اتفرج على البيت المهمل بشده وبعدين ركزت على الهدف الى انا جاى علشانه مخصوص.

باب البيت..

ركزوا كده في الصور..

باب البيت عليه شوية رموز كده.. نجمه وخطوط وحروف وهاشاج..

هو عراي كان عنده حساب على تويتر وللا عمل هاشاج سماه اطرودوا الانكليز!!

سألت الموظفين.. ايه الرسم ده يا جماعه لو سمحتم؟ وكما هو المتوقع.. محدش عرف.

مع شوية قراءه ودعبسه عرفت ان النقوش على باب بيت عراي دى تبقى حجاب حماية.. طلسم يعني..

حجاب من "العهد السلیماني السبعة".

حجاب وطلاسم وسحر.. شعوده يعني.. على باب بيت عراي!!!

ايه جو الفيل الأزرق ده!!!

على كده بقى عراي لما الخديو قاله انت عايز ايه يا عراي.. عراي قاله يا افندينا لا تخافوا.. ولكن احذروا.

يا نهار!! معقول عراي كان له في الهرى ده!!!

من بين صفحات كتاب محمود الخفيف "عراي الزعيم المفترى عليه" وحسب توثيق المؤرخ عبد الرحمن الرافعي لأحداث الثورة العرابية.. عراي كان بيقضى الليل وسط عساكره في حلقات ذكر.. ويوم ما دخل عليهم الإنكليز بخيانة البدو والطحاوي ومحمد باشا سلطان (أبو هدى شعراوي).. العساكر خرجت من الخيام مذعورة بملابسها الداخلية.

يعنى عراي كان راجل هليلي خالص وعلى الله حكايته.. زى ما باب بيتهم اهو بيقول.. والى يأكّد المعلومة دى.. انه صدق الكذاب دليسبس لما افتكر انه ممكن يبقى محايد بينه وبين الإنكليز.

طيب حكايته الحجاب ده؟

شوف يا سيدي.. في كتاب سحر منسوب للأمام العلامة جلال الدين السيوطي رحمة الله عليه.. اسمه الرحمة في الطب والحكمة.. حسب فتوى دار الافتاء في مصر.. الكتاب ده من كتب الكفر الصريحة المحرم قراءتها.. شأنه في كده شأن كتاب شمس المعارف لأحمد بن على البوني.. وأنكر اهل العلم من الأساس نسب الكتاب ده للعالم الجليل.

جاء في الكتاب ده ما دار من حوار اذكره باختصار بين جنيه اسمها التابعة ام الصبيان "عفريته يعني" وبين نبي الله سليمان عليه السلام:


ورد أن جنية عجوز شمطاء تدعي "التابعة" كانت تهدم الدور والقصور وتقلل الرزق بالليل والنهار وتخلف الربا والشور.. ما أن علم بها نبي الله سليمان حتى أمر بجرها بالسلاسل والأغلال وعذبها عذاباً شديداً.. فلما طلبت الرحمة قال لها: كيف نخفف عنك العذاب والشر كله منك؟

قالت: يا نبي الله.. أنا التابعة التي أخلي الديار.. وأنا معمرة الهناشير والقبور.. وأنا التي مني كل داء ومضرة.. نومي على الصغير فيكون كأن لم يكن.. وعلى الكبير بالأوجاع والأمراض، والعلل، والبلاء العظيم، والفقر.. وأسلط عليه ما لا يقدر عليه.. ونومي على المرأة عند الحيض أو عند الولادة فتعقر ولا يعمر حجرها.. ونومي على التاجر في تجارته بعد الفرح بالربح فيها فيخيب ويخسر..

وأخذت التابعة تعدد ألوانا وأصنافا من العذاب والبلاء التي تمتحن بها عباد الله.. فأمرها نبي الله سليمان بأن تعطيه العهود والمواثيق التي تبطل أفاعيلها الشريرة.. فأعطته سبعة عهود من علقها فإنها لا تقربه في نفسه أو أهله أو ماله.. بعد كل عهد منها يقول لها نبي الله سليمان عليه السلام أعطني عهدا وميثاقا فحلفت له على ذلك.

شخصيا.. انا لا اؤمن بكل هذا الكلام.. ولكني ذكرت ما ذكر عن العهود السلিমانيّة.. نصوص العهود نفسها هسيبها في التعليقات علشان مطولش عليكم.

لو حد له في سكة الاعمال والعفاريه دى يا ريت يتواصل معايا على الخاص.. عايز اعمل عمل للمرتب علشان يفضل لحد اخر الشهر.. وعمل تانى للعيال علشان تنسى ال. PS5











+2

بيت الرزاز

هو صحيح العرق يمد لسابع جد؟؟

خلينا نشوف..

السلطة في مصر العثمانية – وقت حكائنا - كانت موزعة بين 3 قوى حرص السلاطين انها تفضل متصارعة علشان محدش يفكر ينقلب على اسطنبول ابدا..

اولا: الوالى.. ده مندوب السلطان.. بيقيم في الحكم سنتين ثلاثة بالكثير.. "الا في بعض الحالات زى مسيح باشا الخادم مثلا" ثانيا: المماليك.. حكموا مصر قبل العثمانيين.. مشهورين بالفروسية ومعاهم سلاح.. فضل العثمانيين انهم يسيبوهم يبرطعوا في البلد بشرط ان صوتهم ميعلاش على صوت الوالى.

ثالثا: الحاميات او فرق العسكر.. دول كان اسمهم "أوجاقات".. جمع كلمة أوجاق.. الكلمة بالتركي معناها الموقد "البوتاجاز يعنى".. بس مع الوقت اصبحت تستخدم للأشارة الى البيت الكبير او بيت العائلة.

كل أوجاق كان فيه من 10 الى 20 ألف عسكري وله قائد ودواودار وخازندار وروزنامجي ودفتدار كأنه دولة داخل الدولة.. سليمان القانوني عمل افتكاسة اسمها الديوان الأكبر علشان يراقب بيها الوالى.. أعضاء الديوان الأكبر كانوا علماء ورجال دين وظباط كبار.. وممثل عن كل أوجاق.. مصر كان فيها 7 أوجاقات "المتفرقة والجاويشية وجمليان وتفكجيان والانكشاريه والشركس وعزبان".. قائد كل أوجاق كان اسمه "اغا".. علشان كده الجبرتي سماه "عصر الأغوات".

من كتر محصول الرز في ايام الوالى محمد باشا الصوفي سنة 1612م اتعمل له مؤسسه مخصوص اسمها "مقاطعة كياي الأرز المبيض".. دى حاجه كده زى نقابة وظيفتها التحكم في أى نشاط يخص الرز من اول الزراعة لحد الضريبة.. كان مركزها شونة الرز في دمياط ورشيد والإسكندرية وبولاق وطنطا.

مماليك مصر في الوقت ده مصر كانوا مقسومين الى معسكرين..

• الفقارية.. مماليك الأمير لاجين بك الفقاري "مسئول الزراعة"

• القاسمية.. مماليك شيخ البلد.. قاسم عيواظ بك.

لاجين بك الفقاري كان عنده مملوك كحيان بيشتغل في الخردة اسمه خليل بن عثمان الخردجي.. لما جسر شرمساح "في دمياط حاليا" انهار والمية غرقت الارض.. بعث لاجين بك مملوكه خليل علشان يلحق المصبية.. خليل لم اهل البلد وقدروا يسدوا الجسر بأقل الخسائر.. لاجين بك خد باله من ذكاء مملوكه خليل فكلفه بمهمة ثانية اصعب وهى جمع الضرائب.

خليل كان حظه حلو.. لم الضرائب من هنا.. واسعار الرز ولعت من هنا.. قوم شوية الرز الى كان بياخذهم من كل فلاح بتراب الفلوس.. بقوا كنز على بابا.. وبدل ما يدخل على سيده بكام كيس فلوس حصيلة الضرائب.. دخل عليه وهو شاييل صناديق مليانه فلوس.. الغريبة ان الناس كانت مبسوطه - زى ما قال الجبرتي - علشان مفيش انهار الدم ولا القلق بتاع موسم جمع الضرائب السنوى.. مساكين.. فرحوا علشان مفيش دم رغم ان فلوسهم بتتسرق.

ما علينا..

من فرحة لاجين بك بخليل.. مسكه منصب "اغا أوجاق عزبان" سنة 1672م.. في الأصل الأوجاق ده كان عسكري وتحول بعد كده الى شركة كبيره شغاله في لم الفلوس من التجارة والزراعة وتحصيل الضرائب.. كل حاجه الا العسكرية.. ومن ضمن التجارة الى كان اوجاق عزبان مسئول عنها كانت تجارة الرز.. اغا وياج عزبان كان هو المسئول عن "مقاطعة كياي الرز المبيض".. يعنى خليل اصبح المسئول عن كل ما يتعلق بالرز وتجارته وزراعته وضرائب.. واتغير لقبه من خليل الخردجي الى خليل الرزاز.. ومنه بدأ سلسل اسرة الرزاز في مصر.

منصب الأغا اتورث من خليل الى ابنه مصطفى كتخدا.. ومن مصطفى الى ابنه أحمد كتخدا.. الاوجاقات بقت بزمريط والبزرميط زاد وغطى لحد ما طفح الكيل بالمصريين الى شقوا الهدوم من الفقر.. مكسرش دايرة الفساد دى الا نابليون لما دخل أخذ مصر في كرشه بدل الهلبية بتوع اوجاق عزبان دول.

مصطفى بن خليل الرزاز خلف ولد اسمه احمد كتخدا الرزاز.. أحمد كان بيتمشي في شارع باب الوزير -الزمالك بتاعة مصر ايامها - راح متكعبل في بيت كبير بناه السلطان قايتباى لشتون الهى والمىء.. احلو البيت في عينه.. راح جاى ميرشط عليه هو والبيت الى جمبه علشان تبقى مساحة البيت الجديد 3400 متر موزعه على 190 اوضه.. وبقي ده البيت الكبير للأسرة واتعرف بإسم بيت الرزاز.

احمد كتخدا الرزاز يبقى الجد الأكبر للدكتور محمد الرزاز وزير المالية الأسبق في حكومة دكتور عاطف صدقي.. دكتور محمد الرزاز هو الى عملنا قانون الضريبة على المبيعات سنة 1992 وقوانين ضريبة الموارث وشوية ضرائب كده خدناها في الوريد من غير ما نحس.

يا دين النبى ..

بقى الرزاز بتاع ضريبة المبيعات يبقى حفيد الرزاز بتاع ضريبة الرز!!!

هو العيلة دى مش فالحه غير في الضرائب!!!

الظريف بقى ان من كام سنة مسك الوزارة في الاردن واحد اسمه عمر الرزاز.. من نفس الاسرة برضه.. كلمت صديق اردنى اهزر معاه ويقول خد بالك يا شقيق.. الرزازه دول مش فالحين الا في جمع الضرائب.. ومعروف طبعا ان الضرائب الاردنية شيء في منتهى البشاعة.. رد عليا صديقي باللهجة الاردنية الثقيلة وقاللى ..

"شوووو يا زلمى.. بنفصح عرض امه.. بيكفى والله بيكفى"

بعد اسبوع بالطبط لقينا الاخبار نازله بضريبة جديدة على شعب الاردن.. الله يكون معاهم.. انا قتلهم والله ان الرزازه دول كده.. بس هما الى مصدقوش ان العرق يمد لسابع جد.

بيت الرزاز مش مجرد حجارة شكلها كويس صوروا فيها مشهد البغل "بحر" بتاع الفيل الأزرق.. حجارة بيت الرزاز بتصرخ وتقولك احترس من جواز
السلطة بالفلوس ..
بس وانت ولا انت هنا.

البرديسي

حب الانسان للفشخرة ملوش مثيل..
ايه الى يخلى اصحاب المقبرة يكتبوا اسم "الامير" عثمان بك البرديسي على الباب بالرغم من سيرته السيئة وبالرغم من انه مات واندفن في منفلوط سنة 1806م؟

الحكاية كلها كتبها الجبرتي..
عثمان بك كان من مماليك مراد بك.. مكانش عنده اى ميزه ولا مهارة الا القسوة في جمع الضرائب.. عثمان كان كاشف بلد اسمها برديس تبع مركز البلبينا في سوهاج.. لما خلس مأموريته ورجع على المحروسة علشان ياخذ الامارة الناس سموه "البرديسي".. نسبة الى برديس.
بعد خروج الفرنسيين من مصر بدأت لعبة الكراسى الموسيقية بين القوى الموجودة على الساحة.. تاريخ محمد على كوم وتاريخه من 1801 الى 1805 كوم تانى خالص.. الباشا كان داهية.. مصر وقتها كان فيها 3 اطراف بتتخاين على الكرسي..

-العثمانيين عاوزين يرجعوا الايام الخوالى..
-المماليك منتظرين رد القفا بتاع 1517م للعثمانيين..
-الانجليز منتظرين الى جوا يخلصوا على بعض علشان يدخلوا ياخدوها على الجاهز.
عثمان بك البرديسي ومحمد بك الالفى كانوا واقعين مع بعض.. الالفى كان مسنود بالانجليز بينما قوات عثمان بك اكبر من قوات محمد على.. محمد على قدر ب 4000 عسكرى ارناؤوطى.. انه ياخذ الحكم من الكل برغبة الشعب ويدي كمية اكثاف غير قانونية مهولة لكل الناس دى.
ازاى؟

بعد ما طير خسرو باشا اقنع محمد على المشايخ انها تجيب الى اوسخ منه "خورشيد باشا" للحكم رغم معرفته بظلمه وقسوته.. بيلبسه في الحيط يعنى.. خورشيد باشا يصدر مين لمهمة جمع الضرائب القذرة؟.. محمد على اقترح عليه عثمان بك البرديسي.. هو اكفأ واحد يقوم بيها وتاريخه في برديس يشهد..

خورشيد باشا مكذبش خبر وخد بنصيحة محمد على..
كده محمد على ضمن ان اتحاد خورشيد باشا مع عثمان بك هيجيب اللعنة للاتنين من الشعب وهيغيظ محمد بك الالفى.. الثلاثة هيقعوا في بعض اكيد لأن النيل وقتها كان شاح ومفیش فلوس.. فكرة لم الضرائب نفسها هتقلب عليهم الناس خصوصا مع غشومية عثمان بك المعروفة.. الناس اتعلمت اخيرا تقول لأ بفضل عمر مكرم.. محمد على ادرك ان القوة الحقيقية في الناس.. علشان كده كانوا هما سلاحه بعد ذكاؤه في قطع رقاب كل الناس دى.

محمد على اقنع البرديسي انه يروح تل العقارب يبني له قصر هناك يقعد فيه هو ورجالته ويبقى حصن آمن ليه.. وجدعنه من محمد على راح مديله شوية عساكر ارناؤوط من بتوعه هديه علشان يراقبوا الابراج ويحموه.. في حقيقة الامر العساكر دى محمد على حاططها حراسة ومراقبة صحيح.. بس على عثمان بك مش ليه.

النيل لسه مستهيل ومفیش فلوس.. خورشيد باشا ييزن على عثمان بك علشان الضرائب رغم ان الناس دفعت سنة مقدم.. عثمان بك قرر يستشير صديقه "الوفى" محمد على.. الصديق الوفى رماله كلمة في وسط الكلام كده عن امكانية حساب ضريبة على البيوت.. ضريبة عقارية يعنى.. وبعدها راح مغير الموضوع علطول.. لقط عثمان بك الطعم من محمد على والفكرة خيشت في نافوخه.. طالما مفیش فلوس بتيجي نحسب عليها ضرائب.. يبقى نلم فلوس على الموجود فعلا.. الى هو البيوت.. يومين وراح منزل مماليكه يقيسوا مساحات البيوت ويحطوا على كل بيت رقم.. الناس مش فاهمه الى بيحصل.. مفیش غير محمد على يسألوه.. محمد على قالهم متقلقوش.. دى ضريبة جديدة.. مبلغ صغير كده عن كل بيت.. او عوا تفتكروا ان في حاجه وحشة.. ابداء.. عثمان بك هياخد الفلوس دى يصبها في مصلحتكوا.. وعموما.. متاخدوش على كلامى.. شوفوا الشيخ السادات رأيهم ايه.

لم الناس بعضهم وطلعوا على الشيخ السادات يشتكوله.. الشيخ أفتاهم بعدم مشروعية الضريبة وطلب منهم العصيان.. اتحركت جموع الناس ومعاهم الحريم من بيت السادات في الحلمية الى مكان ما مماليك عثمان بك شغالين باب الشعرية وهما بيهتفوا "ايش تاخد من تفليسي يا بردسى"..
الحريم صبغت ايديها بالنيلة الزرقاء وخذت الحلل والمغارف وهجمت على رجاله عثمان بك الى مكانوش رجاله خالص وضربوا الحريم.. الفتوات اغضبهم المنظر وقالوا منبقاش رجاله لو اليوم ده عدى.. قاموا على رجاله عثمان بك بالنابيت وهاتك يا ضرب.. الى مات من المماليك مات والى منهم بيعرف يجري كويس هرب على قصر عثمان بك في تل العقارب.

وصلت الاخبار الى محمد على.. قام ابن الابالسة عمل نفسة متفاجيء ونزل الشارع مع الناس يطالب باسقاط الضريبة.. امر محمد على عساكره انهم يروحوا يجيبوا عثمان بك مكتنف.. عثمان بك شاف العسكر والناس جاينين على قصرة بمعاونة ارناؤوط محمد على.. قام اتنكر في هدوم حريمي وخرج من قصره يقول يا فكيك على منفلوط في الصعيد عند محمد بك الألفى عدوه اللدود.. وهناك استغل محمد بك الالفى الموقف وبعثله واحد حطه السم في الاكل علشان يموت عثمان بك البرديسي وحيد مهزوم.. فلوسه اتصادرت ومماليكه اتشتتوا ومفضلش من سيرته السيئة في مصر الا "ايش تاخد من تفليسي يا بردسى".

طيب والقصر الابهة بتاع تل العقارب؟
سنة 1891م تقرر وزارة المعارف في ايام الخديو توفيق نقل مدرسة السيوفية للبنات "الى أسستها جشم افت هانم زوجة الخديو اسماعيل" من شارع الصليبية الى مبنى كبير جدد الخديو اسماعيل في شارع خيرت قصاص شارع المبتديان علطول..
مبنى كان زمان قصر جامع الضرائب الظالم في مصر.. عثمان بك البرديسي.

ويتغير اسم المدرسة الى المدرسة السنية للبنات.. المدرسة الى خرجت منها أول مظاهره اشتركت فيها النساء ضد الانجليز سنة 1919م .

مقبرة آل البرديسى موجودة على بعد خطوات من قبة افندينا توفيق بن اسماعيل.. وانت معدى من جميعها هتسمع الحجارة بتقولك بمنتهى
الوضوح وصوت جاى من زمان ان المتغطى بغير الناس عريان.

قصر عابدين

بس بشكل او بآخر ما زال قصر عابدين هو اهم قصر في مصر كلها..
يمكن علشان شاف كثير.. يمكن علشان المتحف.. يمكن علشان ذكريات العشق الممنوع بين ابو السباع واوجيني.. يمكن علشان القاهرة الكوزموبوليتانية الى كانت الموضة بتنزّل فيها قبل ما تنزل باريس زى ما قال عم زكى الدسوقي.. يمكن علشان عرابي والقفش مع الخديو توفيق.. الله اعلم.. بس هي حاجات كثير هتيجى في دماغك وانت بتلف في القصر مع احساس عميق بالحنين الى ايام انت معشتهاش ولا تعرفها الا من الكتب او الميديا.. حاجات هتخليك تحبه وتكرهه لحد ما تدخل رثتيك عن طريق نخاشيشك ريحة مسك قوية..
الله!!

دى ريحة المقامات اياها ..

ايه ده.. هو في كده في قصر عابدين؟؟

حى عابدين ده حكايته حكاية.. موجود في تعداد محمد على بتاع سنة 1847م. باسم ثمن عابدين.. بيحكى عباس الطرابيلى في احياء القاهرة المحروسة نقلا عن الخطط التوفيقية لعلى باشا مبارك ان حى عابدين في القرن ال 17 كان عبارة عن اماكن مهجورة وبرك مية راكدة زى بركة الفراعين وبركة الفواله وبركة السقاين.. سنة 1631م جه واحد اسمه عابدى بك.. ده كان امير اللواء السلطانى العثمانى في مصر.. استقر في المكان ده وبني قصر وجامع اتسمى على اسمه.. بعد كده لما نابليون دخل مصر عمل في المنطقة كثبان رملية وقلاع عسكرية يضرب منها المحروسة جته ضربه في قلبه.. لما خرج من مصر اصبح المشرف على مسجد عابدى بك هو الشيخ عبد الخالق السادات "شيخ للطريقة الساداتية".

لما مسك محمد على باشا مصر حاول الانجليز يقلوا عقلهم معاه في اوائل ايامه بحملة فريزر سنة 1807م. اهل رشيد الجددان عملوا معاهم الجلاشة.. حكى الجبرنى في عجائب الاثار "احداث سنة 1221هـ" ان محمد على بعث تجريدة بقيادة حسن باشا طاهر واخواته تسند اهل رشيد في حربهم ضد الانجليز.. اخوات حسن باشا دول كانوا عمر بك وعابدين بك زين العابدين.. عابدين بك اشترك بعد كده في حملة الحجاز بتاعة طوسون باشا ابن محمد على.. ولما رجع كلفه محمد على بقيادة حملة دنقلة سنة 1820م. ولما نجح في قمع التمرد وفرض الاستقرار السياسى كافاه محمد على بولاية دنقلة.. قعد عابدين بك سنتين والى على دنقلة وبعدين رجع مصر سنة 1825م. علشان يستقر في المنطقة الى كان اسمها عابدين بالفعل.. بنى هناك قصر كبير يقضى فيه باقى ايامه.. وطبعا القصر بقى اسمه قصر عابدين على اسم صاحبه واسم المنطقة.. مات عابدين بك سنة 1827م وال القصر بالوراثة الى ارملته وابنه كامل باشا عابدين الى كان من اعيان بنى سويف "المقر الاصلى لعائلة عابدين لما جم على مصر من الشام".. كامل باشا كان صديق شخصى للخديو اسماعيل.. ولما قرر الخديو انه يدلع القاهرة وينعشها اشترى القصر القديم من الورثة الى اشترطوا عليه ان القصر يفضل بنفس الاسم.. بدأت اعمال الهدم والبناء سنة 1863م علشان القصر الجديد الى كان ناوى يخليه قصر الحكم.. واذ فجأة والعمال شغالين في الهدد يخططوا في مقام مجهول.. محدش يعرف مين ده ولا عمل ايه ولا كان عايش امتى ولا ايه حكايته.. كل المعروف عنه انه ولى من اولياء الله الصالحين اسمه بدران والناس بتروح عنده تزور وتدعى وتبتارك وباقي القصة دى.

طيب.. نشيل مقامه ورفاته نوديهم مكان تانى زيه زى باقى مقابر المنطقة.. مش ازمة يعنى.. هو هيكون احسن من مين؟؟ ده كان كلام المسيو كوريل روسو كبير المهندسين المعماريين المسئولين عن بناء القصر.. وهنا ظهرت المشكلة.. كل ما العمال تقرب من المقام علشان تهده.. تحصلهم مصيبة شكل.. الى يقع عيان بالحمى من غير سبب.. والى دراعة يقف في شلل مؤقت برضه من غير سبب.. والى كان شجاع فيهم ورفع فاسه علشان يهد المقام جاله صرع مفاجئ وطلع يجرى من الخوف.. الى هي تقريبا كده نفس قصة فيلم عروس النيل بتاع رشدى اباطة ولبنى عبد العزيز. بعد الاحداث الغامضة دى انتشرت اشاعة بين العمال بتقول ان سيدى بدران رافض يتنقل من مكانه.. مش عارفين ليه الحقيقة بس هو كده.. واى حد هيفكر ينقله هتنزل عليه لعنة سيدى بدران.. ولو راجل.. جرب.

الخديو محبش يغوط كثير في السيرة دى.. هو مستعجل ووراه لسه احتفالات هيعملها واوبرا وقصور هيبنها وديون هيهدل مصر بيها.. قرر انهم يضموا المقام لمحيط القصر بس يعملوه مقام يليق بالقصر الخديوى.. قوم يا اخى سبحان الله تفلح عمليات التجديد والترميم.. الولى رفض يتنقل.. انما يتجدد ماشى مفيش مشاكل.

طيب والمسجد الصغير الى بناه عابدى بك امير اللواء السلطانى سنة 1631م؟ رفض يتنقل هو راخر وللا كان معندوش مشاكل؟
الخديو ساب المسجد بمساحته زى ما هي بس جدده طبعا بما يناسب القصر الجديد.. في سنة 1918م قرر السلطان احمد فؤاد الاول انه يجدهه مع المحافظة على طرازه العثمانى زى ما هو وبقي اسمه مسجد الفتح الملكى.. بعد 52 بقى اسمه مسجد الفتح بس.. مسجد عابدى بك سابقا.
بناء قصر عابدين اتكلف 700 الف جنية.. بينما الفرش والموبيليا والحركات كلفوا خزينة الدولة 2 مليون جنية.. بسبب الاسراف الشديد في بناء القصر وسوء الادارة المالية اضطر ابو السباع انه يمد ايده للانجليز ويستلف.. كان اول قرض سنة 1864م ب 5.7 مليون جنية بقيادة اسمية 7% بينما الفائدة الحقيقية كانت 12% على 15 سنة.. ده طبعا قبل خصم عمولات السماسرة.. سمعه استلف 5.7 مليون وصلوا خزنته 4.2 مليون وهيسدهم 6.3 مليون جنية في وقت كانت ايرادات البلد الاساسية من محصول القطن 9 مليون جنية.. الياس الايوى في كتابه تاريخ مصر في عهد الخديو اسماعيل اتكلم في الفصل الثانى "سفر في تاريخ مصر المالى" عن مهازل القروض.. ابو السباع في 16 سنة حكم فيهم مصر خد 14 قرض بقيمة 126 مليون جنية.. الظريف بقى انه لما استلم مصر بعد عمه محمد سعيد باشا كانت كل ديونها 11 مليون جنية.. وكانت اول جملة قالها في خطاب العرش وهو بيلقح بالكلام على ديون عمه هي "ان أساس الإدارة هو النظام والاقتصاد في المالية".
حسيت ان حجارة قصر عابدين بتقول بسخرية لابو السباع "تراك توزع من مال امك."

مصطفى بك دالى

جربت مرة تتكلم مع الحجر.. والحجر يرد عليك؟

انا مش مجنون والله.. انا بتكلم بجد.. والحكاية دى هتثبتلك كلامى..

لو رجلك خدتك لمسجد الامام الشافعى.. يبقى كمل بعد الزيارة خطوتين بس.. خلى المسجد على شمالك وادخل شمال فى شمال مع الشارع.. دقيقتين مشى بالظبط هتلاقى نفسك قصاد "حوش الباشا.."

دى يا سيدى تبقى مقابر الاسرة العلوية..

ابراهيم باشا وطوسون باشا "ولاد محمد على" وشفق نور هانم "ام الخديو توفيق" والوالى عباس حلمى الأول "حفيد محمد على" وأمينة هانم مراته وناس تانية كتير من الاسرة العلوية مدفونين هناك.

لو دخلت المقبرة هتلاقى فى وشك اوضة دفن شفق نور هانم.. عنديها وادخل شمال هتلاقى على يمينك اوضة برونز كبيرة جواها قبر طوسون باشا.. ادخل الاوضة ونظ من الشباك الى فى اخرها علشان تنزل فى الحوش الواسع الى وراها.. على يمينك علطول هتلاقى شاهد قبر كبير على اليمين مميز جدا وسط كل شواهد القبر الى هناك..

خدت بالى ان العمة الموجودة على شاهد القبر مختلفة عن باقى العمم.. ده اكيد حد مهم وعلاقته بالاسرة العلوية مميزة.. امال جه هنا ازاي واشمعنى ده بالذات الى العمة بتاعته مختلفه كده؟

مكتوب على شاهد القبر ان ده مصطفى بك دالى المتوفى يوم 12 مايو 1816م.

مصطفى بك يبقى شقيق امينة هانم زوجة محمد على الأثيرة.. لما عرف مصطفى بك ان جوز اخته بقى والى على مصر.. ساب بلدهم "نصرتلى" وجه على مصر علشان يسترزق.. ماهو مصر زمان كانت الكويت بتاعة العالم.. قبلة الباحثين عن الثروات والنجاح واى حاجه حلوة فى الحياة.. مصطفى بك لما وصل مصر ملقاش محمد على حد افضل منه علشان يمسه قيادة فرقة عسكر اسمها "الدلا".. ومن هنا خد مصطفى بك لقبه.. الدالى.

الدالى بالتركي معناها المجنون.. فرقة العسكر دى كانت زى ال 777 كده.. وحوش بشرية تعمل اى حاجه فى الدنيا.. كانوا دراع محمد على الباطش وكرواجه الى يادب بيه اى حد.. محدش فى مصر كان اذكى ولا اكثر لؤما من محمد على.. علشان الراجل يحكم ايده عليهم ويضمن انهم مبيقوش زى الانكشارية بتوع العثمانيين.. راح ممسك قيادة الفرقة المتوحشة دى لأخو مراته.. وعلشان تتأكد ان قراره كان مناسب تماما.. شوف كده الجبرتى كتب ايه فى وصف مصطفى بك دالى..

"كان موصوف بالاقدام والشجاعة.. جسيما بطينا يأكل التيس المخصى وحده ثم يشرب عليه الزق من الشراب ويتبعه بشاليه او اثنين من اللبن ثم يستلقى نائما مثل العجل العظيم ذو الخوار."

نفهم من كلام الجبرتى ان مصطفى بك كان قوى وضخم الجثة.. بياكل كتير وبيشخر وهو نايم.. من باقى وصف الجبرتى هنعرف انه كان شجاع وجدع ويبقى فى الأزمات ومربى الرعب للعربان والخارجين على قوانين الباشا.. يعنى كان تقريبا الكل فى الكل فى دولة افندينا فى مراحلها الاولى.

علشان كده كانت صدمة كبيرة اوى للباشا لما مات مصطفى بك دالى فى اسكندرية.. عملوله تابوت مخصص لأن التوابيت الموجودة كانت صغيرة عليه.. دهتوه بالزفت علشان جسمه ميعفنش فى الطريق الى القاهرة الى كان بياخد 12 يوم.. ومع ذلك لما وصل القاهرة كان تعفن وريحته بقت فظيعة.. الحانوتيه مقدروش يشيلوه.. راحوا فارشين حصيرة على الارض لفوه بيها ودألجوه جوا الحفرة وردموا عليه ومشبوا وسابوا محمد على لوحده مع احزانه على الراجل.

اخر كلمتين بيوصف بيهم الجبرتى الموقف ده قال فيهم "وليس من يفكر او يعتبر.."

اوبا.. الجبرتى بيحدف صواريخ..

الجبرتى يقصد ان الراجل شديد القوة والمهابة المرعب المخيف ده مات اهو فى الآخر ومع ذلك محدش بيعتبر من الموت ولا بيتقى ربنا..

الكلمتين دول مش ليك ولا ليا.. الكلمتين دول لأفندينا.. محمد على مكانش عاوز مؤرخ اد ما كان عايز مطبلاتي.. الجبرتي كان راجل محايد.. شويه يشكر في الباشا وشوية يديله على دماغه.. محمد على لما زهق منه بعثله عساكر محمد بك الدفتردار جوز بنته نازلي علشان يقتلوا خليل ابنه وهو خارج من صلاة الفجر.. الجبرتي اكتأب واعتزل الكتابة بسبب جبروت محمد على.. راح محمد على مكمل عليه وبعثله نفس العساكر تاني حرقته بينه واغلب ما كتبه.. علشان يضيع علينا اغلب ما كتب المؤرخ الأشهر.. الي مكانش دايمًا على مزاج الباشا.

حسيت وانا واقف قصاص القبر ان ده انسب واحد يقول بصوت قوى جهوري "انا مصطفى بك دالي.. انت مين؟.."

صدقني.. الحجر بيتكلم.. لكن على رأي الجبرتي..

ليس هناك من يفكر او يعتبر.

ماهسوري

وبعد ما شهر البلوك خالص.. نرجع تاني مع حكايات #تاريخ جي

اوعى تفكر ان الاسطورة مجرد خيال نشأ من لا شيء..

الأسطورة – في الغالب - لها اصل.. التأريخ الشعبى ورغبة الناس في نصره الضعيف او الانتقام من الظالم هو الى بيكون باقي القصة الى بتتحكى وتتقل من جيل الى جيل.. الحدث الحقيقي بيكون بعيد كل البعد عن المرويات.. ذاكرة الشعوب تحتفظ بروح الحدث وتهمل دقة الحدث نفسه.. زى قصة السلطان حامد في مصر أو قصة ماهسورى بتاعة الملايو مثلاً..

فاكرين مسلسل كفر دلهاب بتاع شابو يوسف الشريف؟

قصة البنت ربحانة الى اتقتلت ظلم واللعنة الى صابت البلد كلها طول ما القاتل حر طليق..

القصة دى حصلت في ماليزيا.. مع شوية اختلاف بسيط.. لكن روح القصة واحد.. لعنة الظلم الى بتطول الكل ويبدف تمنها الجميع حتى لو مكانوش طرف اصيل فيه.. روح المظلوم الى بتفضل تعكن على الكل لحد ما الظالم وكل من شارك في الظلم بالحياد او السكوت عن الحق ينال عقابه..

القصة كانت في القرن ١٩.. جزيره نائيه في الملايو "ماليزيا حالياً" اسمها لنكاوى.. هناك عاشت بنت جميله اسمها ماهسورى مع جوزها وابنها حياه بسيطه وسط اهل الجزيرة الى عايشين على الصيد والزراعة.. في يوم خرج جوزها في رحله طويله علشان اكل العيش.. وفي غيابه لم تسلم ماهسورى من السنة بنات وستات القرية.. البحث عن سبب غير امرأة من اخرى يشبه البحث عن ابرة في المحيط.. كراهية المرأة للمرأة حقيقة من حقائق الحياة لا تتبدل الا لو كان طرف الصراع الاخر راجل.. ساعتها يبقى انا وبنت عمى الى معرفوش ومعرفهاش ولا عمري شفتها ولا حتى اتولدنا على نفس الكوكب على الظالم المفترى المصطفى ابو حجر.

لسبب ما غير معروف.. كانت في ازمة حمل عند الستات في الوقت ده.. الطب مكانش متطور الى الدرجة الى تقضى على الخرافة.. والخرافة كانت بحيرة مية عذبه في قلب المحيط اعتقدت الستات وقتها ان الغطس فيها يؤدى للحمل.. مش عارف ايه السر هنا.. كان ممكن يبقى الموضوع مفهوم لو الست بتغطس مع جوزها.. نقول اه ممكن.. حاجه كده زى اطالع الصحراء يا سيادة المستشار بتاعة النوم في العسل.. لكن الى قالوه ان الست لازم تغطس لوحدها.. البحيرة دى ما زالت موجودة.. اسمها بحيرة العذراء الحامل.. مراق اتحابلت عليها كثير انى انزل معاها وانا راسى والف سيف لا يعنى يلا.. افرض الواحد نزل البحيرة والاسطورة على حظى الذكر تظبط لأول مره في التاريخ.. يا لهواااااى.. دى تبقى فضيحة.

ماهسورى منزلتش البحيرة ورغم كده خلفت بدرى وحملت تانى.. كونها خلفت فده سبب كافى ان ستات البلد تغل في نفسها.. وكونها خلفت بدرى فده سبب آخر انها تبقى عدوة نص ستات البلد.. وكونها خلفت اساساً من غير الخالة نظيمة بتاعتهم "الى هي البحيرة".. فده خلاها عدوة الكل وراسها مطلوبة على طبق من اى حاجه.. المهم انها تموت .

طالت الالسنه سيرتها بالباطل.. رجع جوزها من السفر لقي سيرة مراته على كل لسان رغم انها خلفت اول مره في وجوده وحملت قبل ما يسافر.. في عصور الجهل مجرد الاتهام كان كفاية ان المسكينة تتهم في عرضها من النطع الى هي متجوزاه.. الست طلبت محاكمة.. وخضعت بالفعل.. ولكن القاضى الشامخ الى كان عاوزه عروسة لابنه طسها حكم اعدام.

لحد هنا.. القصة عاديه والظلم مكرر.. الاسطورة جايالك في الطريق اهو..

الاعدام مكانش بالشنق ولا بالحرق زى ساحرات العصور الوسطى.. ربطوها في نخلة وغرسوا خنجر في راسها وسابوها تنزف وتصرخ لحد الموت.. لما غرسوا الخنجر في دماغها نزفت دم شاهق البياض مش احمر زى دم البشر.. اعتبروا ان ده دليل براءتها.. ماهسورى مصرختش من الالم.. ولكنها لعنت القرية وهي بتموت بأن بناتها مش هيشوفوا حمل ولا انجاب ابدأ لحد يوم الدين.. تحققت اللعنه واصاب العقم سكان الجزيرة لحد ما خلصوا واصبحت بيوتها بيوت اشباح الى ان اعاد الانجليز استغلالها مع بداية عصر الاحتلال وزوال كل الاساطير مع ظهور الكاميرات والتكنولوجيا الى اثبتت ان ثلاث ارباع حكاوى العصور القديمة دى فستك.

الجزيره مفلتت من مهاير محمد.. شوية تجديد على مشاريع سياحية على مطاعم بتقدم احجام عملاقة من الكابوريا والاستاكوزا على تمثال نسر كبير على البحر بدون اى تكليف تقريباً.. علشان تبقى لنكاوى تانى اهم مزار في ماليزيا ..

ومع ذلك ما زال بيت ماهسورى هو المكان الوحيد الى في روح حقيقية وقصص تسمعها من بين الجدران ..

قصة ماهسورى اتقدمت للسينما سنة 1952 في فيلم يحمل نفس الاسم.. القرية كلها تحولت الى مزار سياحى على حسها.. بيوت خشب بتتحكى تاريخ الملايو وعيشتهم وحياتهم في الفتره دى.. بيتها جميل وكبير كل ركن فيه يقول انه يوما ما عاشت هنا اسرة سعيدة في قرية سعيدة خربتها

لعنة الظلم.. ماهسوري كانت مسلمة.. وانا بقرأ الفاتحة قصدا قبرها حسيت ان الخشب زى الحجر.. بيشوف ويبسجل.. ولو طال هينطق ويقول يسقط الظلم فى كل مكان وزمان ..

بيت ماهسوري دليل حى على ان كل مكان بياخد من روح صاحبه ويبسبب اثر للزمن وللعبرة.

اثر اسمه التاريخ.

الحكاية الثانية

حدث فى لنكاوي (ماليزيا)

=====

اوعى تفكر ان الاسطورة مجرد خيال نشأ من لا شيء..

الأسطورة – فى الغالب - لها اصل.. التاريخ الشعبى ورغبة الناس فى نصرة الضعيف او الانتقام من الظالم هو الى بيكون باقى القصة الى بتتحكى وتتقل من جيل الى جيل.. الحدث الحقيقى بيكون بعيد كل البعد عن المرويات.. ذاكرة الشعوب دايمًا تحتفظ بروح الحدث وتهمل دقة الحدث نفسه.. فى أحوال كثير ممكن تلاقي ابطال القصة الحقيقية مجرمين "زى ادهم الشرقاوي او أبو زيد الهلالي او ياسين العبادي او محمد منصور خط الصعيد مثلا".. او فى أحوال ثانية ممكن تلاقي المروية ضخمت اوى فى دور البطل الى هو أصلاً معملش واحد على الف من الى انت بتسمعه ده.. زى قصة السلطان حامد فى مصر او قصة ماهسوري بتاعة الملايو..

فاكرين قصة البنت ربحانة الى اتقتلت ظلم واللعنة الى صابت البلد كلها طول ما القاتل حر طليق فى مسلسل كفر دلهاب بتاع شابو يوسف الشريف؟

اهى دى واحدة من ضمن الأساطير الى لسه حيه لحد النهارده..

القصة دى حصلت فى ماليزيا.. مع شوية اختلاف بسيط.. لكن روح القصة واحد.. لعنة الظلم الى بتطول الكل وبيدفع تمنها الجميع حتى لو مكانوش طرف اصيل فيه.. روح المظلوم الى بتفضل تعكن على الكل لحد ما الظالم وكل من شارك فى الظلم بالحياد او السكوت عن الحق ينال عقابه..

القصة كانت فى القرن ١٩.. جزيره نائية فى الملايو "ماليزيا حاليا" اسمها لنكاوى.. هناك عاشت بنت جميلة اسمها ماهسوري مع جوزها وابنها حياه بسيطه وسط اهل الجزيرة الى عايشين على الصيد والزراعة.. فى يوم خرج جوزها فى رحله طويله علشان اكل العيش.. وفى غيابه لم تسلم ماهسوري من السنة بنات وستات القرية.. البحث عن سبب غير امرأة من امرأة اخرى يشبه البحث عن ابرة فى المحيط.. كراهية المرأة للمرأة حقيقة من حقائق الحياة لا تتبدل الا لو كان طرف الصراع الاخر راجل..

لسبب ما غير معروف.. كانت فى ازمة حمل عند الستات فى القبة دى فى الوقت ده.. الطب مكانش متطور الى الدرجة الى تقضى على الخرافة.. والخرافة كانت بحيرة مية عذبه فى قلب المحيط اعتقدت الستات وقتها ان الغطس فيها يؤدى للحمل.. مش عارف ايه السر هنا.. كان ممكن يبقى الموضوع مفهوم لو الست بتغطس مع جوزها.. نقول اه ممكن.. حاجه كده زى اطلع الصحراء يا سيادة المستشار بتاعة النوم فى العسل.. لكن الى قالوه ان الست لازم تغطس لوحدها.. البحيرة دى ما زالت موجودة.. اسمها بحيرة العذراء الحامل.. مراتى اتحايلت عليها كثير انى انزل معاها وانا راسى والف سيف لا يعنى يلا.. افرض الواحد نزل البحيرة والاسطورة ظبطت لأول مره فى التاريخ..

يا لهوااااى.. دى تبقى فضيحة.

ماهسوري منزلتس البحيرة ورغم كده خلفت بدرى وحملت تانى.. كونها خلفت فده سبب كافى ان ستات البلد تغل فى نفسها.. وكونها خلفت بدرى فده سبب آخر انها تبقى عدوة نص ستات البلد.. وكونها خلفت اساسا من غير الخالة نظيمة بتاعتهم "الى هى البحيرة".. فده خلاها عدوة الكل ومطلوب رأسها على طبق من اى حاجه المهم انها تموت.

طالت الالسنه سيرتها بالباطل.. رجع جوزها من السفر لقي سيرة مراته على كل لسان رغم انها خلفت فى وجوده وحملت قبل ما يسافر.. فى عصور الجهل مجرد الاتهام كان كفاية ان المسكينة تتهم فى عرضها من النطع الى هى متجوزاه.. الست طلبت محاكمة.. وخضعت بالفعل.. ولكن القاضى الشامخ الى كان عاوزها عروسة لابنه طسها حكم اعدام.

لحد هنا.. القصة عاديه والظلم مكرر.. الاسطورة جايلك فى الطريق اهو..

الاعدام مكانش بالشندق ولا بالحرق زى ساحرات العصور الوسطى.. ربطوها فى نخلة وغرسوا خنجر فى راسها وسابوها تنزف وتصرخ لحد الموت.. لما غرسوا الخنجر فى دماغها نزفت دم شاهق البياض مش احمر زى دم البشر.. اعتبروا ان ده دليل براءتها.. ماهسورى مصرختش من الالم.. ولكنها لعنت القرية وهى بتموت بأن بناتها مش هيشوفوا حمل ولا انجاب ابدًا لحد يوم الدين.. تحققت اللعنة واصاب العقم سكان الجزيرة لحد ما خلصوا واصبحت بيوتها بيوت اشباح الى ان اعاد الانجليز استغلالها مع بداية عصر الاحتلال وزوال كل الاساطير مع ظهور الكاميرات والتكنولوجيا الى اثبتت ان ثلاث ارباع حكاوى العصور القديمة دى فستك.

الجزيرة مفلتت من مهاير محمد.. شوية تجديد على مشاريع سياحية على مطاعم بتقدم احجام عملاقة من الكابوريا والاستاكوزا على تمثال نسر كبير على البحر بدون اى تكاليف تقريبا.. علشان تبقى لنكاوى تانى اهم مزار فى ماليزيا.. ومع ذلك ما زال بيت ماهسورى هو المكان الوحيد الى فى روح حقيقية وقصص تسمعه من بين الجدران..

قصة ماهسورى اتقدمت للسنيما سنة 1952 فى فيلم يحمل نفس الاسم.. القرية كلها تحولت الى مزار سياحي على حسها.. بيوت خشب بتحكى تاريخ الملايو وعيشتهم وحياتهم فى الفترة دى.. بيتها جميل وكبير كل ركن فيه بيقول انه يوما ما عاشت هنا اسرة سعيدة فى قرية سعيدة خربت لعنة الظلم.. ماهسورى كانت مسلمة.. وانا بقرأ الفاتحة قصاص قبرها حسيت ان الخشب زى الحجر.. بيشوف ويبسجل.. ولو طال هينطق ويقول يسقط الظلم فى كل مكان وزمان..

بيت ماهسورى فى لنكاوى دليل حي على ان كل مكان بياخد من روح صاحبه ويبسبب اثر للزمن وللعبرة.

اثر اسمه التاريخ.











المعزة المباركة

متلاقيش بين مسلمين العالم حد حب آل البيت زى المصريين ايدا .. رغم انه حب فى بعض الاوقات يودى فى داهية نتيجة الممارسات الخاطئة والجهل عند البعض.. لكن يفضل عنوان العلاقة بين المصريين وآل البيت هو الحب الصافي الخالى من اى مصلحة.. حتى لو اخطأ المحبين التعبير عن حبهم او تقديس المقام الخالى فى اغلب الاحوال من الاجساد الشريفة.. نسأل الله لهم العفو والمغفرة وان حب آل البيت يكون شفيح عن الخطأ فى التعبير عن المحبة.. ونحاول نعلمهم بالحسن ان حب آل البيت يكون باتباع سنتهم مش تقديس اجسادهم.

مفيش حد من آل البيت حبه المصريين زى السيدة نفيسة.. مش علشان هى بنت حفيد حفيد الحبيب عليه الصلاة والسلام ولا علشان كانت بحر من العلم استفاد منه الامام الشافعى ونقل عنها الامام احمد بن حنبل رحمة الله عليهم جميعا.. المصريين حبوها لأنها عاشت فى ذكرتهم ست جدعة ب 100 راجل.

احمد بن طولون مكانش وحش.. بس بيقول المؤرخين انه فى اول ايامه كانت ايده ثقيله على الناس حبتين.. الناس غلبت معاه.. لا مشايخ تنفع ولا قضاة تشفع.. لا قائد يقف قصاده ولا خليفة قادر عليه.. ملقاش المصريين ملجأ الا السيدة نفيسة.. اتجمعوا عند بيتها زى ما حكى القرماني فى "أخبار الدول وآثار الأول فى التاريخ" واشتكوا لها جبروت ابن طولون.. فقامت السيدة نفيسة كتبت ورقة ووقفت فى طريقه وهو معدى.. ابن طولون اول ما شافها نزل عن فرسه وعينه فى الارض احتراماً ليها.. خد منها الورقة لقهاها كاتبالة الكلام ده..

"ملكتم فأسرتم وقدرتم فقهرتم وخولتم فعسفتم وردت اليكم الارزاق فقطعتم.. هذا وقد علمتم ان سهام الاسحار نافذة لا سيما من قلوب اوجعتموها واجسادا عريتموها.. اعملوا ما شئتم فإننا صابرون وجوروا فإننا مستجبرون واطلموا فإننا الى الله متظلمون.. وسيعلم الذين ظلموا اى منقلب ينقلبون" .. وبيكمل القرماني ويقول "فعدل لوقتته".

معنديش اى مشكلة مع القصة دى الا ان السيدة نفيسة ماتت سنة 208 هـ بينما احمد ابن طولون اتولد سنة 220 هـ. يعنى بعد وفاة السيدة نفيسة ب 12 سنة.. يبقى ازاي وقفت فى طريقه وهو ماشى حسب القصة؟

قصة مختلقة.. صدمة كبيرة اه مؤرخ بوزن القرماني يقع فى الغلطة دى.. عذره الوحيد انه مكانش معاصر.. بس عموماً لو سقطنا الشخصيات وفهمنا روح القصة هنشوف بوضوح ان السيدة نفيسة كانت شجاعة فى الحق ونصرة الضعيف.. وده الى سجله التأريخ الشعبى.. التأريخ الشعبى دايماً يحمل الكثير من العاطفة والقليل جداً من الحقيقة.. تأريخ تفهم المقصود منه ولا يعتمد عليه ايدا للتوثيق.. زى سيرة السلطان بيبرس مثلاً او سيرة على الزبيق او السيرة الهلالية.. 90% منها هيد.. بس هيد بيعكس مشاعر الناس تجاه صاحب السيرة.. وانت تفهم الى تفهمه بقى.

السيدة نفيسة كان لها كرامات والله اعلم.. كثر النصايب باسم الاولياء والمستغنين لحب الناس لآل البيت غم علينا الامر فعلاً ومبقيناش عارفين نميز الطيب من الهيد ..

عندك قصة المعزة المبروكة مثلاً..

حكى الجبرتي ان جماعة من المسلمين كانوا اسرى فى بلاد الافرنج سنة 1173هـ.. "1760م" فى حبسهم نذر الاسرى ذبح معزة كانت معاهم لله عند مقام السيدة نفيسة لو ربنا فرجها عليهم.. حارس السجن انزعج من دوشتهم فدخل شاط فيهم وخذ منهم المعزة علشان يدبجها.. الحارس شاف فى منامه رؤيا مرعبة فقام من النوم مفزوع واطلق الاسرى وردلهم المعزة واداهم فلوس لزوم الطريق.. رجع الاسرى على مصر ومعاهم المعزة وباتوا فى حضن مقام السيدة نفيسة علشان يوفوا النذر.. صحبوا الصبح على صوت المعزة واقفة فوق مأذنة الجامع بتنصح الناس.. اصحاب المعزة عرفوا انها معزة مباركة وتراجعوا عن فكرة دبجها.. لقط منهم الخيط خادم المقام "كان اسمه عبد اللطيف" .. راح واخذ المعزة على حجره ومصدرها للناس وبدأ وجود فى الحكاوى عنها.. مره يقول انه سمع صوت السيدة نفيسة من القبر بتوصيه عليها.. ومره يقول انها بتجيب العرسان وتبحمل النسوان.. ورص بقى تحت الهرى ده كل الخرافات الى سمعنا عنها قبل اختراع الكاميرات والكهرباء ده.

الناس سمعت بقصة المعزة وبقت تيجى تزورها من كل مكان.. ادرك عبد اللطيف انه وقع على كثر.. فبدأ يقول للناس انها مش بتاكل الا قلب اللوز والفزوق ومش بتشرب الا مية الورد المكررة بالسكر.. الناس جابت الاكل للمعزة بالقناطير والستات بقت تهاديه بالمجوهرات والذهب وافخر انواع المطرقات والحرائر.. عبد اللطيف كان هايش..

وصل خبر المعزة للامير عبد الرحمن كتخدا "صاحب السبيل الرائع فى وسط شارع المعز حالياً" .. وده كان راجل ميعرفش ابوه وملوش فى الهيد.. قام عبد الرحمن كتخدا دعا عبد اللطيف ومعزته لبيتته علشان يشم ريحة البركة هو كمان.. ركب عبد اللطيف بغلته وخذ الطريق لبيت عبد الرحمن كتخدا وسط الطبول والاعلام وناس بالهيل ماشيه حواليه تزفه هو والمعزة.. وصل بيت عبد الرحمن كتخدا الى استأذنه ياخذ المعزة لجناح الحريم علشان ربنا يهديهم وتحل عليهم البركة هما كان "او ياخذهم ببركة المعزة" .. دخلت المعزة البيت وانهالت عليها سكاكين الجزار الى كان الامير موصيه عليها وصاية خصوصى.. شوية واتمدت السفرة ونزلت اطباق الفتة قصاد خادم المقام الى تعامل مع الفتة بمنتهى القسوة زى ما انت بتعامل معاها بالظبط.. الامير عبد الرحمن كان بياكله بايداه ويلج عليه بالزيادة فى الاكل.. عبد اللطيف عمال يلُغ ويستحسن الطبخ وكرم الضيافة.. بعد ما خلصوا الاكل وشربوا القهوة استأذن عبد اللطيف انه يمشى وطلب المعزة من الأمير.. فالامير قاله المعزة فى بطنك يا نصاب.. وامر بضربه علقه محترمة وتجريسه.. وانه زى ما جاله بزفه والمعزة على حجره.. يخرج من عنده متجرس وجلد المعزة على راسه بدل العمة علشان يبقى عبرة لكل نصاب.

عبد الرحمن كتخدا كان راجل جدع.. ولا ادل على مكانته العاليه من انه اندفن جوا الجامع الازهر.. شرف لم يناله اى حاكم مصرى قبله ولا بعده.

زيارة مقامات الاولياء المفروض انها لا تختلف عن زيارة اى قبر متوفى حسب ما علمنا سيدنا النبي.. طلب المغفرة والدعاء للاموات بالرحمة وخلاص على كده.. لا مسح حجارة ولا بوس اعتاب.. ساكن القبر مهما كان تاريخه فهو الان ميت لا يملك لنفسه ولا لأى حد اى شىء.. وانت بتقرأ الفاتحة قصاد مقام ستنا ابقى خد بالك انها اشتهرت باسم نفيسة العلوم مش نفيسة المبروكة.. خد بالك وافكر ان اول امر الهى للبشر على لسان حبيبة كان اقراً.. مش امسح العتب ولا خد البركة.

فتنة الصابون

لو وقفت عند باب زويلة تقرأ الفاتحة للسلطان طومان باي.. متبقاش تمشى علطول لما تخلص.. استنى سيكا كده..

شايف البيت اللي على الشمال ده؟

ده يبقى بيت نفيسة البيضاء..

نجيب توفيق في كتابه "نفيسة المرادية" قال انهم جابوها من القوقاز عيلة صغيرة متعرفش حاجة.. رموها وسط حريم شيخ البلد "على بك الكبير".. من اللقب الى اطلاقه عليها المصريين تقدر تتخيل انها كانت جميلة.. بلاش اقول نجيب توفيق قال عن جمالها ايه لأحسن مراتي تقرأ الكلام ده وانا كبرت على نوم الكنية او السلم.. نفيسة كانت ذكية وشاطرة.. قدرت تلف على صاحب الدار لحد ما اتجوزها وبقت اقرب زوجاته الى نفسه.. احنا غلاية والله.. الستات بتعمل فينا كل حاجة واحنا واقفين نتفرج.

على بك الكبير حلم انه يستقل بحكم مصر عن السلطان العثماني.. بس مين اشطر من العثمانيين في المؤامرات.. زى ما ضحك عليهم مرة وخلع بمصر منهم.. ضحكوا عليه مرة وقلبوا عليه دراعة اليمين محمد بك أبو الذهب بمساعدة اثنين من أسوأ المماليك الى عدت على مصر.. مراد بك وإبراهيم بك..

مراد بك كان ظاهرة صوتية وجعجاع على الفاضلي.. قال عنه الجبرتي "كان يغلب على طبع مراد الخوف والجبن مع التهور والطيش والتورط في الإقدام مع عدم الشجاعة.. وكان من أعظم الأسباب في خراب الأقاليم المصرية".. اشترك مراد بك مع محمد بك أبو الذهب في الانقلاب على سيدهم على بك الكبير وكانت نفيسة هي المكافأة.. مات على بك.. ومات أبو الذهب وراحت نفيسة على بيت مراد بك.. وهناك ادركت ان الرجل ده لا يتاع حكم ولا الناس بتحبه.. علشان كده امننت نفسها واشتغلت في التجارة.. المحلات اللي انت شايفها دي كانت اكبر وكالة سكر في مصر كلها.. ومنتها خدت المنطقة اسمها الى اقتبسه نجيب محفوظ لواحدة من اشهر رواياته.. السكرية.

نفيسة كانت ست طيبة وايديتها في بق الجعان.. عملت سبيل ومدرسه للايتام في نفس المكان.. الحى كله بيذكرها بالخير ومحبينها كتروا لحد ما سموها "أم المماليك".. وبيت ام المماليك كان مفتوح لكل زائر.. حكاوى مصر واسرارها كانت بتلف على السنة النسوان زوجات الأكابر في بيت نفيسة قصاد كل من هب ودب مع فناجين القهوة الصباحية.. نفيسة مخدتش بالها ان من ضمن ضيوفها كانت زوجة القنصل الفرنسي شارل مجالون.. النسوان تحكى ومرات القنصل تنقل الحكاوى لجوزها.. وجوزها بيعت على فرنسا.. بطن مصر انكشف للفرنسيين بسبب كرم ام المماليك الزائد فقرر ساري عسكر بونايرته ان مصر جاهزة للاحتلال فقام جايب جيشه وجه بتعشى عندنا.

خسر مراد بك قصاد نابليون وطلع يجرى على الصعيد وهو بيقول يا فكيك.. الشعب رفض حكم الفرنسيين وكمل المقاومة مع عمر مكرم وحجاج الخضرى ومصطفى البشتيلى.. القزم الفرنسي كان دموى مجنون قتل ربع سكان المحروسة بالقنير.. مات مراد بك هريان طريد موته تليق بندالته.. نفيسة كانت لسه مرغوبة كست.. اتجوزت إسماعيل بك المحتسب العام في مصر.. الراجل ملحقش يخلف منها عيل يشيل اسمه.. مات هو كمان وسابلها اكوام فلوس طمع فيها الأمير ذو الفقار امير الجيش.. نفيسة كانت مطمع من كل النواحي.. لسة عود رغم انها كسرت الخمسين.. عندها فلوس مثلته رغم ان نابليون مسابش حد في مصر الا لما سرقة.

المدقق في علاقة نفيسة بالمصريين والفرنسيين هيلاق حاجات غريبة.. نفيسة كانت بتتبرع بفلوس لمشايخ الازهر علشان يحاربوا الفرنسيين.. وفي نفس الوقت فاتحه بيتها مستشفى تعالج فيها عسكر نابليون الى فتوات مصر بهدلوهم.. لبيل تخبي الفدائيين.. بينما الصبح تقبل من قنصل فرنسا ساعة الماظ هدية.

بعد موت الأمير ذو الفقار نفسها اتسدت عن الجواز وقالت كفايه رجالة لحد كده.. خرجوا الفرنسيين من مصر قفاهم يقمر عيش وجه من بعدهم الالباني الذئب أبو عينين زرق وقلب زى الحجر.. شلة الحكم الجديدة كان فيها واحد قصير بس يحير اسمه محمد لاظ اوغلى.. الرافي بيحكى اد ايه الراجل ده كان بيكره المماليك بسبب صابونة خدها من مملوكية رفضت تتجوزه وفضلت عليه عسكرى مملوك صعلوك.. بعد ما دبر لاظ اوغلى العزومة الاخيرة للمماليك في القلعة.. بدأ يتسلى على فلوس الى فاضل منهم واحد ورا التاني.. نفيسة كانت هدف مثالى.. فضل لاظ اوغلى وراها لحد ما خلاها على الحديدية بعد ما كان عندها ذهب يوزن الصاغة بالي فيها 400 خادم في بيت مفتوح و200 مركب بيحروا في النيل شالين فلوسها وتجارها.. صحيت نفيسة في يوم وهى مش لاقية تمن اكها.. ومع ذلك محمد على مرحمش شيخوختها وهو بيقبلها في آخر ما تملك.

قضت نفيسة اخر ايامها في فقر بس نفسها كانت عزيزة.. مطلبتش مساعدات من حد وماتت في هدوء سنة 1816م بعد ما شافت نص تاريخ مصر الحديث وهو بينكتب.. اندفنت جمب على بك الكبير في مقابر الامام الشافعى.. محمد على أخذ بيتها وسكن فيه واحد من رجالته.. سبيل نفيسة الى تحت بيتها كان شاهد على افتراء عسكر افندينا وهما محتكرين تجارة الصابون ويبضربوا الناس بالعصيان علشان يدفعوا المعلوم قبل ما افندينا ياخذ كل انواع التجارة في مصر لحسابه.

زى ما الدنيا كانت قاسية على البيت كانت قاسية اكر على الوكالة.. سكرية نفيسة اخدوها فاطمه وسلمى علشان يبيبعوا فيها اى كلام رخيص فاسد الجودة والذوق.. زمان كانت مشربيات البيت بتتفتح مع الشروق علشان تدخل الشمس وتوزع روايح القرنفل والرياحان مع نظرات الدلال ودلع الجوارى قصاد غزل الشباب.. دلوقتي المحلات بتفتح بعد الظهر على مهرجانات مقززة واصوات منكرة خارجة من وشوش عابسة متعرفش قيمة المكان الى قلبوه مزبله للأسف.

لا الشارع بقى هو الشارع ولا السكان هما السكان ولا مصر بقت هي مصر.. اخر مره سرحت غصب عنى قصاد السبيل وانا بقرأ كلمات الترحيب المكتوبة عليه وهى بتقول "يا وارد الماء الزلال الصافي.. اشرب هنيئا صحة وعوافي".. سمعت صوت نفيسة خارج من بين حجارة البيت وهى بتشكرنى على الزيارة وبتقولى اتفضل اشرب معانا جلاب بمية الورد.. ومتنساش تقرألى الفاتحة.. وسبحان من له الدوام .

كل يوم حكاية من دى لحد ما تعملولى بلوك.. شرفوني بالمتابعة لو هاويين تاريخ.. كل حاجة بكتبها هتلاقوها على

بئر العظام

تحس ان الفاطميين كانوا قاعدين على نار منتظرين كافور الاخشيدي يموت علشان يدخلوا مصر .. كافور كان لسانه ثقيل حبتين ورجليه معوجة وشكله يوحى بالغباء.. الا انه كان رجل صالح ومتدين ومستقيم.. مش زى ما وصفه الشاعر المطبلاقي مساح الجوخ.. المتنبي.

كافور مات من هنا والفاطميين دخلوا من هنا.. اول حاجه عملها جوهر الصقلي "الحلواني" في مصر كانت بناء قصر فخم يليق بالخليفة المعز الى جاي من المغرب معاه الف جمل محملين سبايك ذهب و10 جمال تانيين عليهم رفات اجداده الى قرر يدفنهم في مصر في جوار ستنا نفيسة العلوم حفيده حفيد سيدنا النبي عليه الصلاة والسلام .

جوهري في دماغه وصية سيده لما قاله "لتزلن خرائب بن طولون ولتنبين فوقها مدينة تقهر الدنيا" .. ماهو العباسيين لما دخلوا مصر ثاني في اواخر ايام دولة ابن طولون الى كانت بتلعب بالفلوس لعب.. جابوا عاليها واطيها.. مفضلش منها الا المسجد.. كانت خرائب فعلا.. جوهر وهو بيفتح في الخرائب دي علشان يرى أساسات قصر الخليفة خبط في دير قديم مهمل كان مبني حوالين بير غويط.. البير ده يبقى بير العظام.. او بير العظمة زى ما كان المصريين بيسموه.

المسيحيين يقولوا ان البير ده مدفون فيه عظام تلاميذ السيد المسيح عليه السلام.. تلاميذ القديس بطرس وشهداء تانيين من عصر الاضطهاد الروماني.. طبعي ان المكان يبقى مقدس بعظام الشهداء.. علشان كده اتعمل حواليه دير كامل كان نصيبه الهدم لما جوهر حب يبني قصر الخلافة. طيب والعظم الى كن في الدير ودوه فين؟

جوهري مكانش مفترى.. علشان يطمان المسيحيين ويبشرهم بعصر الحريات.. بنالهم دير كبير في شرق القاهرة.. منطقة بحري وهوها جاف ومعزولة تماما.. سموه دير الخندق.. وتم نقل كل محتويات دير العظام الى دير الخندق.. المنصور قلاوون لما اتسلطن على مصر سنة 678هـ. هدم دير الخندق وبني مكانه كنيسة كبار..

واحد شمال موقع دير الخندق.. دارت بيها الأيام وبقي اسمها دير الملاك البحري الموجود حاليا في حدائق القبة. والثانية اتبنت مكان الدير الأصلي.. تحديدا في قراقة الأقباط القديمة حسب ما قال على باشا مبارك في الخطط التوفيقية.. القراقة دي كانت موجودة في شارع الملكة نازلي من ناحية الدمرداش ..

قبل ما تلبس هدمك وتزل على شارع الملكة نازلي علشان تشوف الدير استثنائي شوية.. شارع الملكة نازلي معادش موجود.. بقي اسمه شارع رمسيس.. وقراقة الاقباط القديمة حاليا هي الكاتدرائية المرقسية الموجود في العباسية.. جنب المعتقل المشهور باسم كلية طب عين شمس.. ياااه.. شفت الرحلة؟

عظام شهداء المسيحية الى كانت موجودة في بير العظام الى كان موجود في شارع المعز.. حاليا تحت ارض الكاتدرائية المرقسية جنب مدفن عميد العائلة البطرسية في مصر.. بطرس نيروز غالى عدو الشعب الى اتقتل سنة 1910م. مدفون في قبر تحفة فنية بكل المقاييس.. مبني على الطراز الإيطالي وممنوع عنه الزيارة.. كلمت صديقه مسيحية ابوها من كبار الكهنة علشان تبقى واسطة معايا وادخل اصور.. بس للأسف الرهبان طردوها قبلي.. عملت قتيل هناك علشان ادخل.. بس حجم كف امين الشرطة الى واقف حراسة على الباب فكرني بحجم كفوف العساكر الرومان الى كانت بتعذب المسيحيين في عصور الاضطهاد.. فمحببتش اعيد الذكرى الاليمة واكتفيت بكوباية عصير مانجا من عند القبصي وربنا على الرومان المفترين.

المهم.. خلينا في القائد جوهر..

جوهري لما هدم دير العظام بني مكانه السور الغربي للقصر .. في زاوية التقاء السور الغربي بالسور البحري.. بني زاوية للصلاة بقي اسمها مسجد القائد جوهر.. راحت أيام الفاطميين وحت أيام الايوبيين الى مشيوا على تاريخ الفاطميين في مصر بأستيكة.. واحد يه*ودي اسمه موسى بن عمران اشترى حنة أرض من الأراضى الى فضلت بعد ما اتهدم قصر الحكم الفاطمي.. حنة أرض جنب مسجد جوهر علطول وبني عليها معبد يه*ودي سموه معبد موسى بن عمران.

الظاهر بيبرس مكانش على وفاق مع يه*ودي زى الايوبيين.. من ضمن الحاجات الى اخدها منهم كان معبد موسى بن عمران.. كان في هبده منتشرة وقتها بتقول ان في حاج مصري وقع منه طاسة مكتوب عليها اسمه في بير زمزم "في مكة" وظهرت ثاني يوم في معبد موسى.. قوم الظاهر بيبرس هدم المعبد وضم ارضه لمسجد القائد جوهر لأجل الكرامة دي.

تروح الأيام وتيجي السنين والناس داخله خارجة على مسجد القائد جوهر.. اذ فجأة يلاقوه زلطة جوا المسجد مكتوب عليها "هذا معبد موسى بن عمران".. طبعيا يه*ودي معدوش المعجزة دي بلوشي.. عملوا هوليلة كبيرة ومعجزات وحواديت حوالين الحجر ده.. قدسوه وبقوا يعطروه بالزعفران.. وبقي اسم المسجد.. مسجد معبد موسى بن عمران.. والمنطقة كلها بقي اسمها الركن المُخَلَّق.. الركن المعطر يعني .

دوام الحال من المحال.. راح مسجد معبد موسى بن عمران وراح الركن المخلوق وراح قصر الحكم وراحوا الفاطميين وراحوا المماليك.. كله راح ومعادش موجود.. بس الورد لما بيدبل بتفضل ريحته فيه.. وانت داخل الميضأ بتاعة مسجد الأقمر أبقي بص على البيت رقم 11 في حارة التمبكشية ..

هنا كان مسجد معبد موسى بن عمران الى هو اتبني فوق السور الغربي للقاهرة الى اتبني فوق دير العظام الى اتبني فوق بير العظام بتاع شهداء المسيحية.. زى ما حقق تاريخ المكان المقرري في الخطط واين تغري في النجوم الزاهرة.

بص على الباب المقفول وافتكرك انك واقف قصاص اول حجر اتبني في القاهرة.. لأن قبل الفاطميين مكانش اسمها القاهرة.. فكر بينك وبين نفسك كده هما سموها القاهرة علشان النجم القاهر وللا علشان المعز قال انه عايزها تقهر الزمن؟

اسأل حجارة المكان هتقولك ان عمر حجارة المخزن ده من عمر القاهرة بالظبط..

1052 سنة..

كل سنة وهى طيبة..

الحكاية الثانية

بئر العظام

=====

بوست طويل شوية.. لكن اوعدكوا انه هيعجبكوا

مش لازم السياحة تكون بره مصر على فكره..

مممكن تنزل من المترو في محطة العتبة.. ومن هناك تاخذ اى مواصلة رايحه باب الفتوح.. ومن باب الفتوح تدخل شارع المعز.. امشى 450 متر وبعدين اقف وبص على ايدك الشمال.

شايف المسجد ده؟؟

ده ببقى مسجد الأقمر.. بناه الوزير الفاطمي المأمون البطائحي زى ما امره سيده الخليفة الأمر بأحكام الله.. مسجد مميز بواجهته الهندسية وحجارته البيضاء الى في لون القمر "شفت الاسم جه منين؟".. ومميز كمان علشان الميضأة " مكان الضوء " بتاعته.. الى كانت موجود مكان المبنى رقم 11 في حارة التمبكشيه المجاورة للمسجد علطول.

اهو الميضأة دى حدوته لوحدها.

بيحكى المقرئ في الخطط ان القائد جوهر الصقلي لما دخل مصر.. قرر يبني قصر كبير مميز يصلح للخليفة المعز الى كان جاى من المغرب ومعه الف جمل محمله بأطنان من الذهب بالإضافة الى رفات اجداده علشان يدفنهم – تكريما لهم - في القاهرة.. حاضرة الدنيا وقتها.. قصر الحكم الى بناه جوهر كان المفروض يبقى من عجائب الدنيا القديمة.. واحد من ابوابه كان وزنه 500 كيلو من الذهب الخالص.. ما بالك بباقي القصر؟

بعدين هنبقى نحكي حكاية القصر والباب بالتفصيل.. خلينا دلوقتي مع جوهر الى محتار يبدأ بناء القصر منين.

يوم 6 يوليو سنة 969م عمنا جوهر اختار حارة التمبكشيه علشان تبقى اول الحفر والبناء.. وهو بيفتح علشان يعمل أساس القصر.. خبط في دير قديم اوى كان معمول حوالين بئر.. يبدو ان مع الزمن والوقت الدير خرب وأهمل ومخدش بقي عارف ايه حكاية البئر ده.. يمكن علشان كده جوهر وهو بيفتح مخدش باله من مكان الدير الا لما خبط في البئر..

البئر ده يبقى اسمه بئر العظام.. او بئر العظمة زى ما كان المصريين بيسموه.

عارف البئر ده جواه ايه؟

المسيحيين بيقلوا ان البئر ده مدفون فيه عظام حوارى المسيح عليه السلام.. تلاميذ القديس بطرس وشهداء تانيين من عصر الاضطهاد الروماني.. طبعي جدا ان المكان يبقى مقدس بعظام الشهداء.. علشان كده اتعمل حواليه دير كامل كان نصيبة الهدم لما جوهر حب يبني قصر الخلافة..

طيب والعظم الى كان في الدير.. راح فين؟

جوهر محبش يخبط في المسيحيين.. قام بنالهم دير كبير في شرق القاهرة في منطقة بحري وهو اها جاف ومعزولة تماما.. سموه دير الخندق.. ونقل كل محتويات دير العظام الى دير الخندق.

طيب دير الخندق حصلله ايه؟

المنصور سيف الدين قلاوون لما اتسلطن على مصر سنة 678هـ. هدم دير الخندق وبني مكانه كنيسة كبار..

واحد منهم كانت شمال موقع دير الخندق.. دارت بيها الأيام وبقي اسمها دير الملاك البحري الموجود حاليا في حدائق القبة.. والثانية اتبنت مكان الدير الأصلي.. تحديدا مكان قرافة الأقباط اللى كانت موجودة في شارع الملكة نازلي من ناحية الدمرداش.. شارع الملكة نازلي ده اللى نعرفه دلوقتى باسم شارع رمسيس..

طيب.. الكنيسة الثانية اللى اتبنت مكان دير الخندق في شارع الملكة نازلي بقي اسمها ايه دلوقتى؟

الكاتدرائية المرقسية في العباسية.. جمب طب عين شمس علطول..

الله!!!

يعنى عظام شهداء المسيحية اللى كانت موجودة في بير العظام اللى كان موجود في شارع المعز.. حاليا موجودة في الكاتدرائية المرقسية في العباسية؟

ايوه.. وموجود في الكاتدرائية كمان مدفن الوزير بطرس نبروز غالى.. عميد العائلة البطرسيه في مصر.. المتوفى اغتيالاً سنة 1910م. مدفون في قبر يعتبر تحفه فنية بكل المقاييس.. ولكن ده موضوع تانى.. خيلنا دلوقتى في شارع المعز..

القائد جوهر لما هدم دير العظام بنى مكانه السور الغربى لقصر الخلافة الفاطمية.. وفي زاوية التقاء السور الغربى بالسور البحري.. بنى زاوية للصلاة.

وبعدين؟؟

تمر الأيام وتروح دولة الفاطميين وتقوم مكانها دولة الايوبيين اللى اليهود كانوا من أصحاب الحظوة في أيامها.. وييجى واحد يهودي اسمه موسى بن عمران يشتري قطعة أرض من الأراضى اللى فضلت بعد ما اتهدم قصر الحكم الفاطمي.. حته أرض صغيرة جمب المسجد اللى بناه جوهر علطول.. وعمل فيها معبد يهودي سماه معبد موسى بن عمران.

ها؟؟؟

راحت أيام الايوبيين وجت أيام المماليك.. الظاهر بيبرس كان كل ما يتزنى في فلوس.. يلم من المسيحيين واليهود أولا.. من ضمن الحاجات اللى الظاهر بيبرس استولى عليها من اليهود.. كان معبد موسى بن عمران.. الحكاوي بتقول ان في سنة من السنين حاج مصري وقعت منه طاسه مكتوب عليها اسمه في بئر زمزم.. وظهرت تانى يوم في مكان معبد موسى بن عمران في شارع المعز.. الله اكبر.. مصر بلد الكرامات اللى بتحصل للمسلمين والمسيحيين واليهود على حد سواء.

تروح الأيام والسنين والناس داخله خارجة على مسجد القائد جوهر.. اذ فجأة يلاقوه زلطة جوا المسجد مكتوب عليها "هذا معبد موسى بن عمران".. طبعاً اليهود معدوش المعجزة دى بلوشي.. راحوا عاملين هاله كبيره ومعجزات وحواديت حوالين الحجر ده.. قدسوه وبقوا يعطروه بالزعفران.. وبقي اسم المسجد.. مسجد معبد موسى بن عمران.. والمنطقة كلها بقي اسمها الركن المخلق.. من تخليق الحجر "تعطيره يعني" بالزعفران.

طبعاً المكان ده كله اتهدم ومعادش موجود دلوقتى..

لو حبيت تصلى في مسجد الأقمر.. لازم هتتوضي الأول.. وانت داخل الميضاه بتاعة المسجد أبقي بص قصادها علطول على المبنى رقم 11 في حارة التمبكشيه.. حالياً هو مخزن.. المخزن ده اتبنى فوق مسجد معبد موسى بن عمران اللى هو اتبنى فوق معبد موسى بن عمران اللى هو اتبنى فوق السور الغربى للقاهرة اللى هو اتبنى فوق بير العظام بتاع شهداء المسيحية.. وافكر وقتها انك واقف في مكان عمره من عمر القاهرة بالظبط..

1055 سنة..

وتقدر تراجع الحكاية كلها في النجوم الزاهرة لابن تغرى بردى.. المجلد الرابع.. صفحة 35.







ذكر بناء جوهر القائد القاهرة وحاراتها

قال القاضي محي الدين بن عبد الظاهر في كتابه الروضة^(٢) [الهبية^(٣)] الزاهرة ،

١٠ في الخطة المعزية القاهرة^(٤)؛ قال : « آخِطَ جوهر القصر وحقّر أساسه في أول ليلة نزوله القاهرة ، وأدخل فيه دَيْرَ العظام ، وهو المكان المعروف الآن بالركن المخلّق^(٥) ، قبالة حوض جامع الأقمر ، قريب من بئر العظام ، والمصريون يسمونها بئر العظمة ، ويزعمون أن طاسة وقعت من شخص في بئر زمزم وعليها اسمه ، فطلعت من هذه البئر . ونقل جوهر القائد العظام^(٥) التي كانت في الدير المذكور والرم إلى دير

- ١٥ (١) زيادة عن شذرات الذهب في حوادث سنة إحدى وأربعمائة ، ومعجم باقوت في الكلام على المصطلحات . (٢) ريدان : هو أبو الفضل ريدان الصفاري صاحب المظلة . (٣) الزيادة عن المقرئ (ج ١ ص ٣٦٠) وكشف الظنون والانتصار لواسطة عقد الأمصار لأبن دقاق . (٤) الركن المخلّق ، يطلق هذا الاسم على الزاوية التي كان يتلاقى فيها الحائط البحري للقصر الكبير بالحائط الغربي له . وهذا الركن موضعه اليوم الزاوية البحرية الغربية للزل رقم ١١ بشوارع التيكشية تجاه دورة مياه الجامع الأقمر وبأسفل هذا المنزل مسجد قديم يعرف بمسجد موسى .
- ٢٠ (٥) في الأصل : « ونقل ... بئر العظام » .

الصاري إبراهيم

رحلة صعود المؤيد شيخ للحكم مكانتش سهلة ابدا ..

الراجل خاض صراعات دموية مرعبة علشان كرسى السلطنة..

محدث يعرف اصله منين ولا حتى اسمه ايه.. سموه المحمودى نسبة الى النخاس محمود اليازى الى جابه مصر وهو عنده 12 سنة.. كان وسيم وذكى.. تميز في الفروسية الى الدرجة الى خلت السلطان برقوق الاب يخليه رئيس الحرس السلطاني.. وفي نفس السنة يعينه في منصب امير الحج المسئول عن تأمين قوافل الحجاج ضد هجمات الاعراب.. المحمودى نجح في المهمة الى الدرجة الى خلت السلطان يعينه نائب له في حلب وهو عنده 30 سنة بس.

المحمودى كان واحد من اللى دفعوا تمن انقلاب يلبغا الناصرى "امير حلب" على برقوق باعتباره واحد من كبار رجال الدولة.. مش معنى انه فلت من القتل انه كان سعيد الحظ.. لما رموه في سجن "خزانة شمائل" كان بيتمنى الموت كل يوم لأن شمائل ده كان مقبرة حقيقية.. زنازين السجن كانت حفر غويطة بيترى فيها المسجون متسلسل من ايديه ورجليه في الحيطه في وضع يجبره على الوقوف.. ومع مغيب الشمس كانوا ييرخوا السلاسل علشان السجنين ينام وسط برك الصرف الصحي اللى بيفضوها في الحفرة.

12 شهر قضاهم المحمودى في السجن بيدعى ربنا كل يوم بالفرج.. ندر لله انه لو ازمته فرجت هيهده السجن ده ويبنى مكانة مسجد تتحاكى عنه الناس.. بس هو يخرج .
تروح الايام وتيجى الايام.. يهرب سيف الدين برقوق من سجنه في الكرك ويرجع للعرش من تانى ومعه المحمودى.. المحمودى كمل في خدمة السلطان الى الناس حبه.. يموت سيف الدين برقوق ويمسك مكانه ابنه فرج "صاحب اوسكار أوسخ سلطان".. يندبح فرج بسبب افعاله السوء بمنتهى الرومانسية في قلعة دمشق وهو عريان ملط في احضان جواريه.. يمسك الحكم بعده الخليفة العباسى "المستعين بالله ابو الفضل" لمدة شهرين.. منظر كده لحد ما الامراء الكبار يخلصوا على بعض ويستقروا على واحد يقعد على الكرسى.. المحمودى قدر يدى كتف للجميع وينفرد بالسلطة سنة 1412م.. اجتمع الامراء في القلعة يحلفوله يمين الولاء.. قاضى القضاة حب يجود يومها فقال "بعزلك العباسى انت مؤيد من الله ويكتب لك النصر".. ومن يومها بقى اسمه المؤيد ابو النصر شيخ المحمودى.

افتكر المؤيد ان عليه ندر لازم يوفيه.. هدم سجن شمائل وبني مكانه مسجد كبير.. مش مهم ان الخزينة مفيهاش فلوس.. بيوت الامراء فيها فلوس ورخام كفاية.. لما تدخل مسجد المؤيد شيخ النهارده هتجس ان ذوقه فاسد.. كل حاجه فيه حلوه بس لوحدها.. مفيش التناسق المعتاد بتاع الفن المملوكى.. تضارب اراء المؤرخين بوضحك مين كان مستفيد ومين كان متضرر من بناء المسجد ده ..

عندك مثلا المقريزى قال عن المسجد في خططه:

"هو الجامع لمحاسن البنيان الشاهد بفخامة اركانه.. ان منشئة سيد ملوك الزمان.. يحتقر النظر له عند مشاهدته عرش بلقيس واىوان كسري"
بينما ابن اياس قال:

"كان والى القاهرة يهجم على الناس في بيوتهم ومعه المرخمون فيقلع رخام الناس طوعا او كرها.. وتم بناء المسجد بعد اربع سنوات عانى فيها المصريين الولايات وسخروا من المؤيد ومسجده فأسموه المسجد الحرام ورفضوا الصلاة فيه"
تيمور لنك كان طايح في الشام وقتها.. خروج المؤيد في حملة علشان يأدبه سبب ازمة كبيرة في العيش في مصر.. علشان كده رجع وبعث مكانه ابنه ابراهيم الملقب بالصاري..

ابراهيم كان شاب عشرينى وسيم الملامح.. حسن السلوك ومحبيب من كل الناس.. مقاتل قوى ذكى.. وفوق من ده كله متجوز بنت السلطان فرج بن برقوق ..

اختصارا.. كان الابن وولى العهد الى يتمناه اى سلطان او أب في الدنيا.

إبراهيم رجع من حملة الشام معه طابور من الأسري وغنائم وفلوس بالهبل هتنتعش خزينة الدولة.. الناس كانت فرحانه بابراهيم الى رجعلهم ايام الانتصارات.. يوم رجوعه الناس كانت واقفه على الصفين يهتفوا عاش الصاري وسط الغجر وراقصى التنورة والعابهم المثيرة .. التكريرات شغالة من المآذن والذبابح في الشوارع بلا نهاية.. هذا يوم من أيام سعد السلطنة المصرية القليلة جدا.

في القلعة وقف السلطان يتفرج.. مين اسعد منه وهو شايف ابنه كده رغم حداثة سنة.. المنظر ده معجيش شلة الاوساخ اللى بتتللم حوالين اى صاحب سلطة.. واحد منهم بخ في ودن السلطان ان ابنه بيخطط للانقلاب عليه.. مش مهم.. معتقدش يعنى السلطان اهبل علشان يصدق الكلام ده ..

وللايه؟

للاسف يا فندم.. وللايه.

الوشاية اوغرت قلب الاب ضد ابنه.. السلطان دعا ابنه في يوم للقلعة علشان يحتفل بيه ودس له بايده السم في الاكل.. وقع الشاب على الارض يتمرغ والسم بيفرترك مصاربه.. الرغاوى البيضاء والقيء خارجين من بقه مع صوت خوار مرعب.. ابليس كان واقف مذهول من قسوة الأب.. خرجت روح الولد والاب واقف زى الصنم يتفرج.. ازاي يا ربي الايد الى شالته رضيع تكون هي الايد الى سممته بلا سبب لما كبر!!!

بيحكى ابن اياس ان عذاب الضمير خلى المؤيد شيخ كالميت الحى.. للأسف فاق بعد فوات الاوان.. قرر يدفنه في مدخل مسجده الكبير علشان الداخل والخارج يترحم عليه.. يوم الدفن كان متشال على محفه خشب معتل الصحة.. اجتمعت الالاف تودع الامير الشاب بمحبه حقيقه.. الامام اقتبس رثاء النبي لابنه وهو بيقول "وانا بفراقك يا ابراهيم لمحزونون".. الكلام جه على جرح السلطان بسبب تشابه الاسماء.. دخل بعدها في نوبة بكاء عنيفة ادت الى شلل تام.. فضل في هذيان المرض وعذاب الضمير لحد ما مات بعد ابنه ب 7 شهور بالظبط علشان يندفن في مسجده.. جمب ابنه.. الى هو قتله بايده..

كل مره ازور المسجد الاق نفسى بقرأ الفاتحة للواد وابوه لأ.. كل مره بسمع صوت الحجارة بتردد صوت الولد بصوت يقطع القلب وهو بيقول ..

قتلتني يا ابويا.. ولا يهملك.. انا فداك يا ابويا.
ودموعي تنزل.

حجاج الخضري

يا ترى الجبرتي كان عارف انه بيدبحنا بسكينة تلمه وهو بيكتب الجملة دي ..
"ولم يؤخذ في هذه بجرم فعله يوجب شنقه.. بل قتل مظلوماً لحقد سابق وزجراً لغيره."
هو ايه الحكاية؟؟

بعد ربنا سبحانه وتعالى يعود الفضل في هزيمة عسكر بونابرتة الى المصريين وحدهم.. لا عثمانيين ولا مماليك ولا بطيخ.. مشايخ الازهر والفتوات والشباب بذلوا كل غالى ونفيس علشان يطردوا نابليون.. فرقة الارناؤوط الى بعثهم السلطان سليم الثالث جم عندنا يصيفوا مش يحاربوا.. محدش فيهم رعى طوبة وقت ما كان كبير وبلبار ورينية ولانيس وبيسير ودومارتن طايحين في المحروسة واهلها دبح وقتل وتقطيع.
المهم انهم غاروا..

الى يفرسك يجد هو رد فعل العوام حسب ما ذكر الجبرتي في كتابه مظهر التقديس بزوال دولة الفرنسيين خرج الناس للشارع تحتفل.. النسوان ترزغط والرجال تقول "نصر الله السلطان.."
السلطان!!

لا اله الا الله..

لو أحط نفسي مكان عمر مكرم.. هأخذ شومة وانزل ادور فيهم الضرب كلهم..

بقي بعد ده كله.. السلطان!!

سلطان مين ولا مؤاخذه؟؟

السلطان وقتها كان مجرد رمز بلا اى قيمة فعلية.. افتقاد المصريين لحاكم حقيقى يتلموا حواليه هو الى خلاهم يهتفوا "نصر الله السلطان".. سنين القهر الطويلة اريك عقول ومنطق المصريين.. عمر مكرم كان فاهم ان الشعب لسه مش جاهز يحكم نفسه بنفسه.. لسه البلد فيها مراكز قوى بتتخاف على الكرسي ولسه مفيش الشخص الى يقدر المصريين كلهم يتلموا حواليه.

بعد خروج الفرنسيين رجعت سيرة العثمانيين الخايبة للظهور.. والى ضعيف يتعزل.. بعده والى عبيط العسكر يقوموا عليه.. وبعدين كبير الارناؤوط يمسك ودراعة اليمين يقتله.. 4 سنين من القلق برعاية محمد على الى كان بيفرش لنفسه فرشة معلمين خصوصاً لما رفض منصب والى وزق مكانه خورشيد باشا.

محمد على كان عارف ان خورشيد باشا ظالم وغى وهيستفز الناس فالناس تقوم عليه ويخلص هو منه للأبد.. والى حسبه محمد على لقاه.. الشارع بيغلي بسبب ضرائب خورشيد باشا وهو مصمم بتحدى الناس.. طفح الكيل بالناس يوم 13 مايو 1805م لما هجم عساكر فرقة الدلاة "المجانين" على أهالي مصر القديمة ودوروا فيهم الضرب والسرقة وانتهاك الحرمات.. هيجوا على الناس ذكريات أيام الفرنسيين.. غضبت الناس وخرجوا للشارع يهتفوا "يا رب يا متجلي.. أهلك العثماني".. خورشيد باشا مصمم يمشى سكة العناد لحد آخرها باستخدام القوة الغاشمة ..
وهنا ظهر حجاج الخضرى..

عمر مكرم كان الزعيم الرسمى للثورة.. نقيب الأشراف.. جدد وشجاع وتاريخه يشهد من أيام على بك الكبير.. حجاج الخضرى كان دراعه اليمين..
عمر مكرم يتفاوض ويشحن الناس ويقف لعسكر خورشيد باشا.. وحجاج الخضرى يشتري سلاح وينظم الصفوف وينط على العساكر بليل او من حيث لا يتوقعوا الهجوم..

عمر مكرم كان المخ وحجاج الخضرى كان العضلات..

حجاج لا درس عسكرية ولا انتظم في جيش ولا عمره شال سلاح.. ده حياالله كان بيعا خيار وطماطم في السوق ولما اترقى بقى كبير طايفة الخضرية.. بس الحكاية ملهاش علاقة بالمهنة.. دى جينات في الدم اسمها الرجولة.. حجاج الخضرى مش بس كان بيورد سلاح للفتوات.. ده لما سمع ان خورشيد باشا طلب معونة من اوجاق جماليان وان في ستين جمل اتحركوا علشان يسعفوه.. حجاج لم رجالته واتحرك في التو واللحظة علشان يقطع الطريق على الفرقة.. قتل منهم الى قدر عليه وشتت الباقي هربان من غير سلاح.

محمد على كان يقدر يحتوى كل ده بس هو كان بيوفر مجهوده.. بدل ما يطأش مع حجاج ضمه لفرقة الارناؤوط بتاعته وعمله ريس على رجالته.. بين يوم وليله اتحول حجاج من مجنونة يا قوطه الى صول ب 3 شرائط.

انكسر خورشيد باشا قصاد المصريين.. بعث السلطان فرمان يقول امرنا وامرنا مطاع بتولية محمد على.. وزى العريس في الخطوبة محمد على لبس الكل العمة وهو بيوعدهم بالعدل والحسن والحكم المشترك و و و.

شهر والتانى والباشا بيكبر.. سنة والثانية ومصر بتكبر ليه هو مش للمصريين.. الباشا اول ما طلعه سنان عض بيهم ايد عمر مكرم الى زقته لحد ما قعد على الكرسي.. الكلام ده معجبش المصرى الاصيل.. حجاج الخضرى خد بعضه وانضم الى منافس محمد على في الحكم.. محمد بك الألفى.

أخص يا حجاج.. محمد بك الألفى!!

كلب الانجليز!!!

حجاج مكانش يعرف ان الالفى كده.. لما شاف خيانتة سابه ورجع تانى للمحروسة.. حجاج مش خاين ولا في مشكلة شخصية بينه وبين محمد على.. حجاج مش تبع اى تيار.. حجاج عاوزها نظيفة لاهلها.. حجاج لما نزل الشارع كان عاوز يسقط نظام خورشيد باشا كله.. مش بيدل واحد ظالم بواحد اظلم.. حجاج مكانش نكسجى ولا ببشم كوله ولا عايزها فوزى ولا عند اجنده من اى نوع..

حجاج الخضرى كان مصرى وبس..

عمر مكرم والمشايخ اتوسطوا لحجاج علشان الباشا يصفح عنه ويسمحله يرجع القاهرة.. على عكس المتوقع غفر افندينا لحجاج خطيئته في التعاون مع الألفى وسمحله يرجع القاهرة علشان يعيش ويشغل من تانى.. مش بس كده.. ده كمان عمله حرس شرف يروح وييجي معاه منين ما يروح.. مش كرامة لحجاج ادا ما هو رقابة ومراقبة.. مفيش حد وقتها كان اصبع من محمد على.

وعلشان محمد على ذئب ومعدوش وزن للحياة زق عليه المحتسب بتاعة "مصطفى الكاشف كرد".. اتقبض على حجاج الخصري يوم 15 رمضان سنة 1232هـ واتسحب على المشنقة من غير اى تهمة ولا جريمة.. او هى جريمة قديمة الكل نسيها الا ابن الابالسة أبو عيون زرق زى ما قال الجبرقى.

فى الجمالية.. على ناصية حارة المبيضة من ناحية باب النصر هتلاقى سبيل قديم اوى اسمه سبيل اوده باشى.. عند السبيل ده بالظبط اتعلق حجاج الخصري من رقبته فى رمضان بعد السحور.. سابوه متعلق 24 ساعة عبرة لمن يعتبر.. حجارة السبيل لسه فاكرة البطل الشجاع ضخم الجثة موفور القوة كريم الاخلاق الى كانت جريمته الفظيعة انه حلم يشوف بلده بيحكمها اهلها.. ودفع التمن عمره.

جواهر اللالا

عارف لما تبقى الظروف كلها بتجبرك انك تبقى وغد دنيء فتقوم سايب ده كله وتقرر تعيش نظيف اليد عفيف الاخلاق حسن السير والسلوك؟ اهي دى باختصار سيرة صاحب المسجد ده..

هو مسجد محندق في ميدان الرميلى.. قلب القاهرة ومعقل كل الاحداث العظيمة.. الشاهد الحى على عظمة المماليك ودمويتهم وكهن النسوان ونفستهم.. الشاهد الى ذرف الدموع من قسوة أفندينا وهو بيدبح بلطجية عصره علشان يعمل دولة عظيمة خابت من ولاده بعد كده. مسجد الأمير جواهر اللالا ..

قبل ما الاسم يقلب في دماغك على صوت الأسطى عمارة بتاع درب شكما الى صيته جايب من القلعة لحد سويقة اللالا في اوبريت الليلة الكبيرة وتفتكر ان سويقة اللالا لها اى صلة بالمسجد او صاحبة.. احب اقولك لا.. سويقة اللالا خدت اسمها من الست صفية اللالا.. هي كانت لالا برضه بس في عصر تانى غير عصر صاحب المسجد.. كمان سويقة اللالا في السيدة زينب مش هنا خالص.. "لالا" بالفارسي معناها مربي.. يقال انها اصل كلمة "دادة" الى تطورت حالياً وأصبحت "نانى".

بيحكى ابن تغرى في النجوم الزاهرة ان جواهر كان عبد حبشى اشتراه الأمير عمر بن بهادر في مكة واهداه الى جوز اخته الأمير احمد بن جلابن.. ومن هنا اصبح اسمه جواهر الجلاباني على اسم سيده.. ولما مات الأمير احمد دخل جواهر في ممالك السلطان الاشرف سيف الدين برسباي .. برسباي لما لقي اخلاقه نظيفة عينه خازندار المحروسة.. وزير المالية يعنى.. قبل جواهر الوظيفة دى كانت بتتقسم على 3 افراد في نفس الوقت "واحد للملابس والثاني للمجوهرات والثالث للفلوس" علشان الثلاثة يراقبوا بعض ومحدث فيهم يسرق.. الى كان بيحصل ان الثلاثة بيتفقوا مع بعض ويسرقوا البلد بينما السلطان مشغول بتأمين نفسه من محاولات الاغتيال اليومية.

جواهر كان شديد.. الموظف الى يغيب من غير سبب يتخصمه يومين.. الموظف الى يشتغل في الأوقاف مشغولش حاجه غيرها.. اى حد هيقدم السي في بتاعه عند جواهر لازم يبقى عارف ان فلوسه هتبقى عرضه للمساءلة في اى وقت.. في الوقت الى الامراء فيه كانوا بيتنافسوا على تكديس الأموال.. هو كان ببسابق الزمن علشان يكسب حسنات.. اشتهر جواهر بالأمانة والنظام والتدين.. كان يقرأ القرآن بالقراءات السبعة.. وسيم وريحته طيبه ورحيم بالفقراء.. كثير كان بيتوسط للناس عند السلطان.. وكثير كان ببصرف فلوسه "القليلة" على اوقاف خصصها لمساعدة فقراء مكة.. ولما الدنيا هانت في نظره قرر يعمل دار للأيتام.. دور في الأراضي يمين وشمال ملقاش الاحته ارض 178 متر في قلب القاهرة.. اشتراها وبني عليها المسجد ده وهو الى كان قادر ياخذ اتخنها عزبه وللا اقطاع في اى مكان في مصر.

جواهر كان عامل مصروف يومى للايتام في الدار من فلوسه.. والى يبلغ منهم مبلغ الرجال يخرجهم من المسجد ويكلفه بتعليم ايتام جدد كنوع من أنواع رد الجميل.. كان شديد في تربية العيال والحفاظ عليهم.. فهم ان العيال امانه من ربنا واحسن في حفظها للدرجة الى خلت الأشرف برسباي شخصيا يثق فيه ويسلمه ابنه علشان يربيه بأخلاقه.. ومن يومها اصبح جواهر.. لالا.. مربي أبناء السلاطين يعنى.. خيلنا من وصف الجامع وحلاوته.. مش هتنبهر بالوصف اد ما هتنبهر برؤيته.. خيلنا نركز مع صاحب المكان الى كان شاهد على اكبر مرجيحه حصلت في تاريخ مصر.. حاجه كده لو اتعملت في فيلم هندي.. تسقط.

بعد السلطان المؤيد شيخ ما قتل بأيده الى عايزه قطعها ابنه إبراهيم "الى كان اصلح واحد يمسك الحكم بعده".. مفضلش من أولاده للعرش الا ابنه الرضيع شهاب الدين احمد.. المؤيد وهو بيموت وصى اقوى امرأه – سيف الدين ططر- على ابنه ومراة .. ططر عمل ايه؟؟

بدل ما يدخل في قلق وانقلابات وخيانة امانة وكده.. ططر لطف على العرش من بعيد.. اتجوز "سعادات" ارملة المؤيد وام السلطان الرضيع.. الراحل اتجوز الست الصبح ونصب نفسه سلطان على مصر بليل وراح مطلق الولية ورماتها في الشارع هي وابنها تانى يوم علطول.. وقعد ططر في الحكم 95 يوم بعدهم سلم نمر..

طيب مين يمسك بعده؟

ابنه محمد.. الى كان عنده 11 سنة.. كان طبيعى ان الظاهر ططر قبل ما يموت يوصى اقوى الامراء على ابنه ومراة زى ما كان هو نفسه وصى على ابن ومراة المؤيد شيخ.

طيب مين كان الوصى؟؟

الأمير سيف الدين برسباي..

وزى ما ططر قلب ابن المؤيد شيخ من الحكم.. برسباي قلب محمد ابن ططر من الحكم وقعد مكانه .. مكانش في حد بعد برسباي افضل من ابنه يوسف.. شاب عنده 14 سنة حافظ للقرآن وتربية الجنتل جواهر اللالا.. وعلشان قلب برسباي يطمئن.. وصى اقوى الامراء – سيف الدين جقمق – على ابنه من بعده.. يخلي باله منه يعنى ويساعده في أمور الحكم وكده يعنى.. وكان المتوقع.. سيف الدين جقمق استكثر الكرسي على يوسف ابن برسباي فراح جاي مشقلبه وقعد هو مكانه.. مين بقى معجبوش الكلام بتاع جقمق ده؟

جواهر اللالا.. راجل حنبلى وعازيز الأمور تمشى شرعية.. جقمق كان خلقه ضيق حبتين فقبض على جواهر ورماه في الحبس وأمر بتعذيبه علشان يطلع فلوسه المستخبية.. جواهر يحلف انه محيلتوش غير مرتبه.. وجقمق مش مصدق.. ولا حتى مصدق ان التقلصات الى على وش جواهر دى سببها القولون العصبي.. ويشاء السميع العليم ان جواهر اللالا يصيبه الصرع وهو في السجن ويموت في الستين من عمره بتأثير نوبة تشنج قوية مفهمش أمنا الشرطة بتوع جقمق انها مرض حقيقى مش تمثيل.

مات الراحل الجنتل الى قال عنه ابن تغرى انه "كان عفيفاً ديناً عاقلاً سيوساً مدبراً فاضلاً" .. مات وسابلنا تحفه معمارية وذكري طيبة تجبرك على الترحم عليه والنظر الى حياته بنظرة حاملة على أمل ان ربنا يرزقنا لالا تانى الأيام دى.

خلصت حكاية الجنتل جواهر اللالا.. بس اعذرني.. مش قادر امسك نفسى من غير ما اكمل باقى حكاية المرجيحة..

الظاهر جقمق وهو بيموت ساب الحكم لابنه عثمان الى كان عيل صغير ووصى عليه اقوى الأمراء – سيف الدين اينال- الى صبر 43 يوم بحالهم قبل ما يقلب عثمان من على الكرسي ويبقى هو السلطان..

سيف الدين اينال كان صايع.. حط ابنه احمد مكانه على العرش وهو لسه عايش.. ابنه كان عنده 38 سنة يعنى مش محتاج وصى.. هو بس رقي الأمير سيف الدين حُشقدم وخلاه اتابك العسكر علشان يطمئن على ابنه مش اكرر.. اه.. ماهو الى مربى قرد عارف لعبه. مش سهل اينال علفكره..

بس يا سيدي.. خلصت حكاية المرجيح.....

انت بتبصلي كده ليه؟؟

اوعى تفتكر ان حُشقدم قلب ابن اينال من على الكرسي وقعد مكانه وبعدها بلباي المجنون قلب حُشقدم وقعد مكانه وبعدها تمرُبغا الرومى قلب بلباي وقعد مكانه وبعدها قايتباى قلب تمرِبغا وقعد مكانه..

أرجوووك.. اوعى تكون فهمت صح..

زى ما ططر عمل.. اتعمل فيه..

زى ما برسباي عمل.. اتعمل فيه..

زى ما جقمق عمل.. اتعمل فيه..

زى ما اينال عمل.. اتعمل فيه..

زى ما حُشقدم عمل.. اتعمل فيه..

زى ما بلباي عمل.. اتعمل فيه..

زى ما تمرِبغا عمل.. اتعمل فيه..

دايرة النحاس دى مكسرهاش الا تاج راس الكل.. الأشرف سيف الدين قايتباى.. رغم انها برضه حصلت مع ابنه.. بس كرامة لعيونه وايامه الذهبية.. نعتبرها انكسرت.

كأن حجارة المسجد قطع مجوهرات مترصصه جمب بعض فى صينية بقلادة بدیعة عايزه تحكيك بصوت عالى عن الجمعية الى دايره من زمان يا..

الجمعية الى اسمها مصر.

على الكسيح

شوف يا حاج..

مش هتلاقى اتنين يختلفوا على الناصر محمد بن قلاوون أبدا.. ده كان واحد من اعظم الناس الى قعدت على عرش مصر عبر كل العصور.. حاجه كده زى تحتشمس الثالث ورمسيس التاني وقايتباى.. الناس الى حكمت فترة طويلة وبنت عمرت وخلت مصر ترد الروح.. الناصر محمد حارب وانتصر واسس وبني وحكم بالعدل وكسب حب الناس والمؤرخين واحترام وهيبة عند الاعداء بس للأسف خاب خيبة السنين فى عيالة.. 8 من عيالة قعدوا على الكرسي بعده.. 6 منهم اندبحوا زى الخرفان قبل ما يتموا 20 سنة.. المؤسف فى الموضوع ان بعضهم دبح بعضهم.. كذب الى قال ان سكينه الاخ مبتعورش لانها طلعت بتدبح وتقتل بمنتهى القسوة.

سنة 1345م. الامراء الكبار قاموا على الكامل سيف الدين شعبان "خامس واحد من ولاد الناصر الى قعدوا على العرش".. خلعه ورموه فى السجن وحطوا مكانه المظفر سيف الدين حاجي الى كان وقتها عمره 15 سنة.. حاجي اتولد فى موسم الحج فسماه ابوہ "حاجي".. تيمنا بالرحلة المباركة. المظفر حاجي مكانش يتخير عن اخواته.. عيل مراهق ساب البلد تضرب تقلب وانصرف تماما للجواري والهلس والحاجات الى نفسنا فيها دى.. وقف التاريخ كثير عند علاقته بالجارية حالكة السواد "اتفاق".. يكفيننا نعرف مؤقتا ان اتفاق كانت لابسه يوم القبض عليها فستان تمنه 100 الف دينار ذهب.

وكان المسخرة مع الجوارى مكانتش كفاية فقرر حاجي انه يغيب الامراء زياده ويربيلهم حمام.. بنى غية حمام كبيرة فى قلب القلعة كان بيقيض فيها يومه كله.. وصل جنونه فى تربية الحمام الى انه امر المؤذنين فى المساجد المحيطة بالقلعة انهم يوطوا صوتهم وقت الأذان والصلاة علشان الحمام بيتخض من الصوت العالي.. شكل الحمام كان ملحد وللا ايه.. الله اعلم.

مع سكوت الامراء حاجي زود فى العريضة وقرر يبقى شبح.. لم شضلية البلد والمقاطيع وشمامين الكله وقعدهم معاه فى القلعة علشان يبقوا صحابه وشلته الى بياكل ويسهر معاهم ويفتوه فى أمور الدولة وهما بيصوبله كؤوس منقوع البراطيش.. كان الأمراء بيشوفوه من صباحية ربنا فى حوش القلعة واقف باللباس أبو دكة بيحط مع واحد من الصيغ الى مالين القصر.. كل ده والأمراء ساكتين طالما مقربش منهم ولا من فلوسهم.. مبقاش فى القلعة كلها مكان لرجل علم او دين.. كله ساكت على مضض.. بس لما وصلت الامور لحد على الكسيح.. كده لا بقى.. خراب يا دنيا خراب. على الكسيح كان مضحكاتي السلطان.. مسخ مشوه شكله غريب وطريقة كلامه اغرب.. وظيفته اضحاك السلطان بالنكت والالش والسخرية من كل شىء وعلى كل شىء.. قال عنه المقرئى فى السلوك انه كان شنيع المظهر له حديه فى ظهره وحديه فى صدره كسيحا لا يقوى على القيام وانما يُخمل على ظهر غلامه.

السلطان حاجي كان عنده اتنين امراء كبار.. الأمير سيف الدين الجيبيغا "دراعه اليمين" والأمير طنبرق "دراعه الشمال".. متعرفش الأمير الجيبيغا وقع على الكسيح ده فىن بالضبط.. المهم انه اشتراه وعرضه على السلطان.. السلطان عجبته فكرة المسخ المضحكاتي دى فقربه منه وجوزه واحده من اجمل جواريه.. برضا السلطان زهزت الدنيا مع على الكسيح.. فلوس وممز وجواري وحاجه آخر حلاوة.

تمر الأيام وعلى الكسيح مكانته بتزيد عند السلطان لحد ما صحينا فيوم لقينا على الكسيح اصبح أهم شخصيه فى البلد كلها.. كلمه منه ترقى أمير وكلمه تنفى أمير تانى.. غزل لجارية يخليها تملك فدادين ملهاش آخر.. ونكته على جاريه تانيه تخليها تنطرد من القلعة.. الأمراء واقفه قصاد بيته طواير علشان يذكرها بالخير عند سلطان البلاد.. حاجه اخر كمال الشاذلى.. هو فى فى الظاهر مضحكاتي.. بس فى الخفاء كان عصفورة بتنقل دبة النملة للسلطان.. العالم كلها شايفاه مسخ عبيط بينما هو كان مستغفلهم كلهم.. يقعد وسط الجموع يضحكهم وتانى يوم ينقل كلام السكارى للسلطان.. شخص زى ده فى عصر زى ده بالنسبة الى سلطان زى ده.. يعتبر ثروة.

فى يوم من ايام الدرمة عليت دماغ السلطان وأمر لكل جارية ب 100 الف دينار ذهب.. سهره واحده فضت خزينة البلد.. عاشت مصر بعدها فترة قحط وجوع وغلاء شديدة وخرج الوضع عن السيطرة.. ساعتها كان لازم الامراء الكبار – الجيبيغا وطنبرق – يتصرفوا قبل ما الولعة تقوم وتاخذهم فى السكة.. الامراء حاولوا مع السلطان بالحسنى فالسلطان اتفرز وراح دابح حمامتين من حمامه الغالى زى ما حكي ابن تغرى فى النجوم الزاهرة وقالهم "والله لأكون دابحكم كلكم زى ما دبحت الحمام ده".. مشى من المجلس قرفان وراح على شلة الانس.. بدأ يفضفض ويقول ان العيشة أصبحت لا نطاق فى ظل وجود الجيبيغا وطنبرق وانه ناوى يدبجهم ويخلص منهم.

مين قاعد بقى بيسمع الحوارات دى؟

على الكسيح..

على الكسيح مفوتش الفرصة وطلع جرى على سيده الأصلى الأمير الجيبيغا.. قاله الحق يا سيدى.. السلطان ناوى يدبجك انت وسيدى طنبرق.. الاتنين فاض بيهم الكيل.. راحوا متفقين مع باقى الأمراء وطلعوا على قبة النصر مطرح ما السلطان كان بيعبرد.. حاجي خدته الجلاله واصر انه يواجه الامراء الغاضبين على ظهر حصانه.. وطبعاً حصل المتوقع.. مماليكه باعوه ومفضلش حواليه الا 20 واحد اندبحوا قبله وفضل هو يترجى الأمراء انهم يمهلهو ساعه علشان يصلى.. الامراء رفضوا وقالوله "فكيف استعجلت على قتل الناس.. ولو صبرت عليهم صبرنا عليك".

اندبح المظفر حاجي زى حمامه الى كان بيربطه بسلاسل ذهب.. انفض مولد التحطيط وانصرف الالاضيش الى كانوا ملمومين حواليه.. مسك بعده اخوه الطيب صاحب هرم مصر الرابع الى رفع راسنا قصاد اوباما.. الناصر بدر الدين ابو المعالى.. الى نعرفه احنا باسم السلطان حسن.

طب وعلى الكسيح راح فىن بعد القلق ده؟

استخى عند سيده الأمير الجيبيغا.. حاكم الناصر حسن لما مسك حط جامد اوى على حاشية المظفر حاجي.. فضل على الكسيح غطسان كام شهر.. بس ريحته طلعت لما الأمير عبد العزيز العجمي "واحد من ضحايا أيام السلطان حاجي" عرف مكانه وطلع علطول على الوزير منجك اليوسفى وقاله الحق.. الكسيح مستخى عند الجيبيغا.. منجك اليوسفى راخر كان من ضحايا وشايات وأسافين على الكسيح.. دلوقتى لفت الأيام وجه وقت الانتقام.

تفتكروا عمل فيه ايه منجك بعد ما رماه فى السجن؟

شغل معايا الخيال..

منجك كان ببديل عليه العبيد فى الضرب بالمقارع.. المملوك من دول يفضل يضرب فيه لحد ما يتعب فيقوم يستلم الوردية منه مملوك تانى لسه فريش ويكمل ضرب.. بعد ما الكسيح عضمه اتكسر بدأوا يخلعوا فى سنانه وضروسه واحد واحد على الصاحي فى وقت مكانش فيه بنج.. لما كان يغمى عليه من كتر الألم كانوا بيكبوا عليه ميه علشان يفوق ويكملوا خلع.. ولما سناناه خلصت رموه فى مية مغلية وسلخوا فروة راسه وبعدين سلخوا جلده كله.. سابوه يتسلق ويتسلخ لحد ما مات من كتر وقوة صراخ الألم.. كل ده ومنجك واقف يضحك عليه فى شماتة ويفكره بأيام وساخته مع المظفر حاجى..

بحب اوى التكميبة الخشب بتاعة قبر قلاوون.. كل ما اكلمها تحكيلى حكاية شكل.. لما سألتها عن على الكسيح قالتلى انه مات فى ابريل 1348م. بعد موت المظفر حاجى ب 6 شهور بالظبط.. حكلى الحكاية الحزينة وهى بتقولى خد بالك يا ابن المستقبل.. كل الى طبل وصقف ورقص للظالم لازم الدنيا هتلف عليه وهيحاسب على المشاريب زيه زى الى قتل وسرق وظلم بالظبط.

شاهين الخلوتي

جربت مره تدور على الحكاوى المستخبية ورا كل مزار سياحى بتعدى عليه وانت مسافر؟

عمرك تخيلت ان تحت ارض ايا صوفيا فى اسطنبول مثلا فى عالم تانى خالص من الانفاق والدهاليز والممرات والمخابىء السرية.. عالم شغال عليه فريق بحثى كامل بيطلعوا منه كل يوم اكتشافات واساطير وحكايات ملهاش اخر؟

عمر المسجد اللى فى الصورة ده لفت نظرك طيب؟

هتشوفه وانت على الاوتوستراد.. هيبقى على يمينك وانت رايح مدينة نصر.. هتلاقيه فوق قمة الجبل.. هتحس انه متحفز علشان يقع على دماغ المساكين ساكنى المقابر فى الاباجية.

مش كل المماليك اللى جم مصر كانوا اطفال اتربوا فى مدارس السلاطين العسكرية.. فى اواخر عصر المماليك لجأ السلاطين الى استجلاب ممالك شباب جاهزين للحرب علطول.. المماليك دول كان اسمهم "الجلبان".

شاهين المحمدى المولود فى تبريز "ايران" كان من الجلبان دول.. وصل مصر فى عصر السلطان قايتباى.. كان حليوه.. طول بعرض.. بيعرف يحارب ومستقيم الاخلاق.. حفظ القرآن وكان دائم الحضور فى مجالس العلماء علشان كده قربه السلطان منه بسرعة.. بس شاهين مكانش حابب العيشه دى.. كان دايما شارد واميل الى العزله والهدوء.. صراع الفلوس والسلطة ده مكانش على مزاجه.. علشان كده طلب من السلطان انه يعفيه من الحياة دى ويسيبه يعتكف لوحده.. قايتباى بالرغم من كرشه الواسع مقدرش يرفضه طلب.. قضى شاهين فترة فى العباسية تحت ايدى الشيخ الدمرداش وبعدها راح على المقابر فى جبل المقطم.. عمل لنفسه خلوه واعتزل الحياة هناك لمدة 30 سنة.

لو رحت المكان ده دلوقتى هيرهبك كم السكون والموت اللى هناك.. ما بالك بنفس المكان من 600 سنة؟

شاهين مات سنة 1496م الى بنى المسجد ده فوق قبره هو ابنه جمال الدين سنة 1538م فى ايام الوالى العثمانى داوود باشا الخصى.

بحب اروح هناك علطول.. جنب المسجد ده فى مسجد سلطان العاشقين عمر بن الفارض وقبة الاميرة جميلة فاضل بنت الخديو اسماعيل ومسجد الشيخة لولو وقبة الاسباط وخلوة السيدة نفيسة.. طق فى دماغى مره اطلع المسجد فوق بالرغم من ان مطلع المسجد انهيار بالفعل.. طلبت المساعدة من الشخص اللى عايش فى قبة الاميرة جميلة فاضل.. بعث يجيبلى سلم طويل من السيدة عائشة.. واحنا فى انتظار السلم حكاى حكاية غريبة اوى حصلت فى رمضان سنة 1989.

ايامها كان عنده 10 سنين.. بعد التراويح بليل سمعوا صوت حريمى طالع من المسجد.. صوت بيغنى اغانى صوفية فى حب الله ورسوله.. لما طلعا المسجد يشوفوا فى ايه.. ملقوش حد.

خد بالك ..

المنطقة دى مقابر.. بليل.. فى رمضان بعد التراويح.. مسجد مهجور تماما..

تانى يوم اتكرر نفس الموضوع.. صوت حريمى جميل.. يطلعوا فوق.. ميلاقوش حد.. كده مفيهاش بقى.. ده اكيد عفريت.

الناس بلغت الشرطة.. الشرطة وصلت بدرى شوية.. وفى المعاد اليومى اقتحموا المسجد.. وتنح كل الحاضرين لما شافوا صاحبة الصوت.. والصراحة كان معاهم حق..

عارف مين صاحبة الصوت اللى كانت بتغنى لوحدها وسط كل هذا الكم من الموت والسكون والعزله؟؟

حبيبة الجماهير.. المدير العام.. الوحيدة اللى لما قالت "حسنى" الناس حبت الاسم ده مخصص علشانها..

الراحلة شادية..

بعد ما شاديه اعتزلت التمثيل كانت بتروح هناك وتقعدها تغنى لوحدها.. وسط رهبة الموت كان السكون بيردد صدى كلمات العشق الالهى الخارجة بصوت كأنه رنين الف جرس ملائكى ..

شادية سابت الدنيا وهى فى عز مجدها واختارت العزله..

شاهين ساب الدنيا وهو في عز مجده واختار العزله..

والاثنين اختاروا نفس المكان..

وكأن المكان اكتب عليه يكون معزل عن صخب الحياة من ايام المملوك شاهين الى ادمن العزله والخلوة بعيد عن كل حاجه حتى اصبح اسمه شاهين الخلوتي.

اوعى تفتكر ان الحجر عبارة عن شوية رسومات والوان ونقوش وشكل تشوفه ويعجبك فتقول الله.. جميل.

جوا الحجر في روح.. روح ببتكلم وتحكي الف حكاية مرت عليها وهي واقفة ضد الزمن..

روح ببتكلم.. بس انت الى مش عارف تفهمها.

لاوكون

في مثل أوروبى مشهور بيقول .. "Beware of Greeks Bearing Gifts" او احترس من الاغريق الذين يحملون الهدايا.. الى مقراش القصة في الادب اليونانى اكيد شاف فيلم تروى بتاع براد بيت.. والى مقراش القصة ومشافش الفيلم اكيد سمع عن حصان طرواده الى بقى بيستخدم كمثال على الخديعة.. في دنيا الكمبيوتر مثلا بنستخدم مصطلح "Trojan" للإشارة الى نوع من الفيروسات بيتسلل للجهاز بتاعك في صورة شرعية كأنه برنامج عادى زى اى برنامج انت بتستخدمه ولكن في داخله كود قاتل.

القصة معروفة.. حرب طروادة قامت بسبب زوجة مينلاوس حاكم اسبرطة.. الحكاية كلها موجودة في الالياذة والاوديسا.. في الالياذة بيحكى هوميروس تفاصيل زيادة عن نبوءة العرافة كاساندرا لبريام ملك طروادة بخصوص ابنة باريس الى هيزيوس ملكه ويتركز على احداث السنة التاسعة من الحرب.. وهى السنة الى انتقم فيها اخيل من هكتور علشان قتل ابن عمه .. بينما في الاوديسا الكلام اكثر عن اوديسيوس ملك ايثيكا الى كان واحد من قادة جيوش الاغريق في حربهم ضد الطرواديين لاستعادة المزة الى علقها باريس من مينلاوس.. في فيلم عمله "Armand Assante" سنة 1997 اسمه .. "The Odyssey" بيحكى حكاية رحلة توهان اوديسيوس في الارض بعد ما لعنه بوسيدون بسبب انكاره فضله في منح النصر لطروادة.. فيلم جميل برضه ويستاهل يتشاف لكنه اقل شهرة من تروى.. قلة عقل من الجميع.. لا مينلاوس كان ناقص مزز ولا باريس كان جدد ولا البت تستاهل ولا اوديسيوس كان مفروض يسبب مراته وابنه الرضيع علشان حرب زى دى.

حرب طروادة مش اكثر من اسطورة تعامل البعض معاها على انها حقيقة حصلت في التاريخ.. بعض المؤرخين فسروا هجوم محمد الفاتح على القسطنطينية سنة 1453م. على انه انتقام لطروادة "الموجودة في تركيا" من الاغريق.. تاريخيا مدينة طروادة اتهدت واتبنت 10 مرات.. احداث الحرب المشهورة حصلت في ايام مدينة طروادة السابعة.. في اثار فعلا لقوها في تركيا سنة 1870م عن مدينة طروادة.. بس مفيش اى اثر خالص بيتكلم عن الحرب دى الا كتابات هوميروس وفيرجيل بعد كده.. ما زال البحث مستمر عن بقايا طروادة بالقمر الصناعي.. مش علشان التاريخ طبعاً.. انما كنوز طروادة حسب وصف هوميروس حاجة تستاهل التعب.

لما الاغريق سابوا الحصان الخشب قصاد اسوار طروادة نشط الجاسوس الاغريقى سينون علشان يقنع بريام ملك طروادة ان الحصان ده هدية سلام واستسلام من الاغريق.. كل الناس كانت فرحانة بانتهاء الحرب الا اثنين بس..
الراهب لاوكون ومراته العرافة كاساندرا..

لاوكون كان راهب في معبد ابولو.. هو الوحيد الى خد باله من خدعة الاغريق.. اسم لاوكون باليونانى يعنى "الذى يفهم الشعب".. لما كان لاوكون واقف يصرخ محذرا الملك من هدايا الاغريق فجأة بعته بوسيدون - اله البحر في الميثولوجيا الاغريقية- ثعابين تاكله هو واولاده.. واعتبر الطرواديين ان الحادث ده عقاب الهى من بوسيدون للراهب لاوكون على انكاره هدايا السلام.. وقرروا سحب الحصان الى داخل البلد.. وحصل الى حصل.. طيب ليه الناس مصدقتش لاوكون؟

هل علشان كان راهب المفروض يعيش اعزب بينما هو تحدى الجميع واتجوز العرافة كاساندرا؟
هل علشان ابولو - اله الشمس - كان بيحب كاساندرا وهى صدته.. فمئحتها موهبة نفاذ البصيرة ولكنه عاقبها بانه محدش يصدقها؟
مفيش سبب منطقي الاجهل العقل الجمعى.. وكأن هوميروس من زمان بيحذرن من خطورة اتفاق العامة على شىء خطأ.. هى في الاخر اسطورة وكل واحد حر يفهم بعدها الفلسفى زى ما يحب.. بالمناسبة.. تمثال الحصان الخشب الى ظهر في الفيلم موجود حاليا في مدينة تركية اسمها جناق قلعة "او جناكل بالنطق اللاتينى".. صناع الفيلم سابوه هدية لتركيا الى صوروا فيها اغلب المشاهد بتاعة المية الزرقاء التحفة دى.
التمثال الاصلى للراهب لاوكون واولاده اكتشفه مايكل انجلو في مزرعة عنب قرب روما سنة 1506م. واشتره البابا يوليوس الثانى من مالك الارض.. حاليا هو معروض في متحف الفاتيكان.. في اكثر من نسخة في المتاحف الكبيرة حول العالم زى متحف اوفيتزى في فلورنس "الموجود ورايا في الصورة" ومتحف اللوفر في فرنسا والمتحف البريطانى.. الفارق بين التمثال الاصلى والتقليد ان الاذرع اليمنى للكهنة لاوكون واولاده مكسورة في التمثال الاصلى.. كانوا كملوها في ترميم عملوه للتمثال قبل كده لكن شالوه سنة 1980 باعتبار انه اثر لازم يفضل بحالته الى اكتشفوه عليها.. كمان التمثال الاصلى دراع لاوكون فيه متنية على اخرها.. بينما في التقليد يظهر الذراع كامل مفرد وكأن لاوكون يقاوم الافعى.

سنة 859م كان هستين ملك الفايكنج ملعلع في اوربا وطايح في انجلترا وفرنسا واسبانيا وايطاليا.. الفايكنج حاصروا مدينة ايطالية قديمة اسمها "لونا" على اساس انها روما.. ولأنها كانت حصينة بزيادة معرفش الفايكنج يدخلوها بالقوة فادعى هستين انه عايز يقابل الكهنة علشان يتنصر ويتوب على ايديهم.. الكهنة صدقوه وسمحوه بالدخول.. بعد كام يوم ادعى الفايكنج ان هستين مات وطلبوا من الكهنة انهم ينفذوا وصيته بدفنه في ارض لونا في مقابل الحصول على جزء كبير من ثروته.. قبل الكهنة العرض ودخل الموكب يحمل نعش هستين المفتوح.. ولما بدأ القداس قام هستين "الميت" من نعشه وطاح في الكهنة بسيفه ومعاه رجالته الى كانوا شايلين النعش.. ادرك الكهنة متأخر اوى ان نعش هستين لم يكن الا صورة اخرى من صور حصان طروادة الشهير.. بس كانت البلد ضاعت خلاص.

تمثال الكاهن لاوكون مش فاضله الا انه ينطق في شهادة على براعة الفنان الايطالى.. لو نطق التمثال هيقول ان التاريخ مليون دروس وعبر بس للاسف محدش يقرأ.. الايام دى لو لقيت مراتك راجعة من بره شايلاك هدية.. افكر طرواده عطلول وافكر انك مش هتكون انصح من بريام الملك.. افكر المثل دائما..

Beware of Greeks Bearing Gifts

رينا يسترها علينا.

الحكاية الثانية

في الساحة الخارجية لمتاحف الفاتيكان لقيت التمثال ده..

فعلطول افكرت المثل الأوروبى المشهور..

"Beware of Greeks Bearing Gifts"

او حسب الترجمة.. احترس من الاغريق الذين يحملون الهدايا..

الى مقرأش القصة في الادب اليوناني اكيد عيط على براد بيت لما لبس السهم في كعبه في اخر الفيلم.. والى مقرأش القصة ومشافش الفيلم اكيد سمع عن فيروسات "Trojan Horse" بتاعة الكمبيوتر.. كلمة طروادة نفسها بقت بتستخدم كمثال على الخديعة.. والفضل كله للأغريق..

القصة معروفة.. حرب طروادة الى قامت بسبب زوجة حاكم اسبرطة.. الحكاية كلها موجودة في الالياذة والأوديسا.. في الالياذة بيحكي هوميروس تفاصيل زيادة عن نبوءة العرافة كساندرا لبريام ملك طروادة بخصوص باريس ابنه الى هيزيغ ملكه.. هوميروس ركز على احداث السنة التاسعة من الحرب.. وهى السنة الى انتقم فيها اخيل من هكتور علشان قتل ابن عمه.. بينما في الأوديسا الكلام أكثر عن اوديسيوس ملك ايثيكا الى كان واحد من قادة جيوش الاغريق في حربهم ضد الطرواديين لاستعادة المزة الى علقها اورلاندو بلوم من مينلاوس.. في فيلم عمله "Armand Assante" سنة 1997 اسمه "The Odyssey" بيحكي رحلة توهان اوديسيوس في الارض بعد ما لعنه بوسيدون بسبب انكاره فضله في منح النصر لطروادة.. فيلم جميل برضه ويستاهل يتشاف لكنه اقل شهره من تروى.. قلة عقل من الجميع الحقيقة.. لا مينلاوس كان ناقص مزز ولا باريس كان جلع ولا البت الصايغه الى سابت جوزها علشان راجل تانى تستاهل ولا اوديسيوس كان مفروض يسبب مراته وابنه الرضيع علشان حرب زى دى وكان سهل اوى ان هكتور يطرد اخوه من البيت ولا ان البلد تتدمر.

حرب طروادة اسطورة تعامل البعض معاها على انها حقيقة حصلت في التاريخ لدرجة ان بعض المؤرخين فسروا هجوم السلطان محمد الفاتح على القسطنطينية سنة 1453م. على انه انتقام لطروادة "الموجودة في تركيا حاليا" من الاغريق.. تاريخيا مدينة طروادة اتهدت واتبننت 10 مرات.. احداث الحرب المشهورة حصلت في ايام مدينة طروادة السابعة.. في اثار فعلا لقوها في تركيا سنة 1870م عن مدينة طروادة.. بس مفيش اى اثر خالص بيتكلم عن الحرب دى الاكتابات هوميروس والشاعر الروماني فيرجيل بعد كده.. ما زال البحث مستمر عن بقايا طروادة بالقمر الصناعي.. مش علشان التاريخ طبعاً.. انما كنوز طروادة حسب وصف هوميروس حاجه تستاهل التعب.

ايه علاقة طروادة طيب بالصور دى بالفاتيكان؟؟

هقولك..

لما الاغريق سابوا الحصان الخشب قصاد اسوار طروادة نشط الجاسوس الإغريقي سينون علشان يقنع بريام ملك طروادة ان الحصان ده هدية سلام واستسلام من الاغريق.. كل الناس كانت فرحانة بانتهاء الحرب الاتنين بس..

الراهب لاوكون ومراته العرافة كساندرا..

لاوكون كان راهب في معبد ابولو.. هو الوحيد الى خد باله من خدعة الاغريق.. اسم لاوكون باليوناني يعنى "الذى يفهم الشعب".. لما كان لاوكون واقف يصرخ "Timeo Danaos et dona ferentes" علشان يحذر الملك بريام من هدايا الاغريق فجأة بعتله بوسيدون – اله البحر في الميثولوجيا الاغريقية- ثعاين تاكله هو واولاده.. واعتبر الطرواديين ان الحادث ده عقاب الهى من بوسيدون للراهب لاوكون على انكاره هدايا السلام.. وقرروا سحب الحصان الى داخل البلد.. وحصل الى حصل.

طيب ليه الناس مصدقتش لاوكون؟

هل علشان كان راهب المفروض يعيش اعزب لكنه تحدى الجميع واتجوز العرافة كساندرا؟؟

هل علشان ابولو – اله الشمس – كان حاطط عينه علي كساندرا ولما نفضتله واتجوزت لاوكون.. انتقم منها بأنه منحها موهبة نفاذ البصيرة وعاقبها بأنه محدش يصدقها؟

مفيش سبب منطقي الا جهل العقل الجمعي.. وكأن هوميروس من زمان بيحذرنا من خطورة اتفاق العامة الجهلاء.. هى في الاخر اسطورة وكل واحد حر يفهم بعدها الفلسفي زى ما يحب.. بشكل شخصي اؤمن بأن كل أسطورة لها اصل حقيقي والتأريخ الشعبي بيعمل معاها الواجب في التضخيم والتوهيل.

تمثال الحصان الخشب الى ظهر في فيلم تروى موجود حالياً في مدينة تركية اسمها چناق قلعة "او جنكلي بالنطق اللاتيني الحالي".. صناع الفيلم سابوه هدية لتركيا الى صوروا فيها اغلب المشاهد بتاعة المية الزرقاء التحفة دى.

التمثال الأصلي للراهب لاوكون واولاده اكتشفه مايكل انجلو في مزرعة عنب قرب روما سنة 1506م. حاليا هو معروض في متحف الفاتيكان.. في أكثر من نسخة في المتاحف الكبيرة حول العالم زي متحف اوفيتزي في فلورنس ومتحف اللوفر في فرنسا والمتحف البريطاني.. الفارق بين التمثال الأصلي والتقليد ان الذراع اليمنى للكهنة لاوكون واولاده مكسورة في التمثال الأصلي.. كمان التمثال الأصلي ذراع لاوكون فيه متنيه على اخرها.. بينما في التقليد يظهر الذراع كامل مفرد وكأن لاوكون يقاوم الافعى.

لو خدت لفه سريعة في احداث سنة 859م في أوروبا هتلاقي حكاية مشابهه اوى حصلت مع هيستين ملك الفايكينج اثناء اقتحامه مدينة لونا الإيطالية.. الى هو محدش بيتعلم من التاريخ ابدا.

تمثال الكهنة لاوكون مش فاضله الا انه ينطق علشان يقول ان الفنان الإيطالي ابرع اهل الأرض في التعامل مع الرخام.. حجارة التمثال بتقولك ان التاريخ مليان دروس وعبر بس للأسف محدش بيتعلم.. وجود تمثال زي ده بياكد فكرة جهل وامية أوروبا في العصور الوسطى.. أدى التوثيق بتاعهم اهو.. تماثيل ولوحات مش كتب.

طيب انت تتعلم ايه من القصة دي؟؟

لو لقيت مراتك بتقولك خد ورك الفرخة ده من ايدي.. افكر علطول طروادة والى حصل فيها.. افكر انك مش هتكون انصح من بريام الملك.. وزى ما الحصان كان في فرسان.. ممكن ورك الفرخة يكون مسموم.. ارفض ورك الفرخة بكل إصرار وانت بتقول..

Beware of Greeks Bearing Gifts





تمثال الكاهن لاوكون - الفاتيكان







تمثال حصان طروادة "شارع احمد باشا قيصري - چناق قلعة"

الأمير مصطفى

تعديل

مصادر ما ذكر في كلامي هو كتاب الدولة العليا العثمانية لمحمد فريد بك صفحة 246 وكتاب الدولة العثمانية عوامل النهضة واسباب السقوط للدكتور على محمد الصلابي صفحة 276.. ودول أكثر اثنين في التاريخ دافعوا عن الدولة العثمانية.. وفي ثاني مصادر عثمانية حديثه وقديمة.. التي يحب.. يبعث على الخاص وأنا تحت امره. عذرا.. مش هقدر ارد على كل الناس لان الفيس بوك حظر قدرتي على التعليقات في الجروب.

شعور قوى من رغبة عارمة في بكاء حار هتجتاح نفسك وانت واقف في المكان ده رغم ان ساكن القبر مش قريبك ولا بينك وبينه صلة.. ويمكن دى تكون اول مره تسمع فيها اسمه .. النظرة السريعة تقول ان ده قبر واحد كان ذو شأن يوما ما.. وخليتي اقولك.. انه مات مقتول..

القتيل.. الامير شاهزاده مصطفى.. ولى عهد السلطنة العثمانية في اقوى ايامها. القاتل.. السلطان سليمان الأول "القانوني" اقوى سلاطين بنى عثمان على الاطلاق. بالرغم من كونه اقوى رجل في العالم وقتها.. الا انه بكل سفالة ووضاعة.. قتل ابنه.. بعد ما شعره شاب وانهكته الحروب والمسئوليات والدولة كبرت والحدود وسعت وشملت العرب والعجم والأفلاق والجريج والاناضول على امتداد 6 مليون كيلومتر مربع.. بعد ما بقى رجل بره ورجل جوا.. بعد ما رياه وكبره على انه الوريث وولى العهد.. ايده ورجله اليمين والشمال.. قام قتله..

غضب عني ضربت اخماس في اسداس وأنا بقراً الفاتحة قصاص قبر الأمير مصطفى في المقابر المرادية في بورصا "تركيا".. في حكم المبتدأ أنا أب.. تخيلت نفسى عايش عمري كله بجهز لأبني.. أبنيه وارييه واعلمه.. عايش بجهزه ليوم هتنتطفى فيه شمعتى للأبد وشمعته هو تنور بيتى من بعدى.. هل هقدر فيوم انى اطفيها بأيدي؟؟ قطع ايدي الف مره لو يوم حتى فكرت.. الواد غلط؟؟

وايه يعنى.. ما يغلط.. ايه المشكلة.. ماهو الى هيتعك فيها.. انا خلاص ماشى وسايهاه.. وبعدين هو انا يعنى الى ملاك!! طمع في الحكم مكاني؟؟ ما يطعم.. هيجرى ايه لو الواد استعجل شويه.. ما انا كده كده سايبه كل حاجه.. ده لو سلمنا ان كلام الأفاعى صحيح وان الولد رتب علشان ينقلب على ابوه.. ما بالك بقي لو الولد مظلوم وكان بيرتب علشان يرفع راية ابوه فوق العصيانين؟؟ بقى ابنك جايبلك هدية في علبة مقفولة.. تقوم انت تضربه بالنار وتقتله علشان خايف ان العلبة يكون فيها قنبلة. سمعت عن عذاب الضمير؟

سنة 1522م. إبراهيم باشا الفرنجي بقى الصدر الأعظم.. كان راجل بحق وحقيق وصديق عمر السلطان.. سليمان القانوني بدأ اول مراحل جنون العظمة باعدام صاحبه ووزيره إبراهيم باشا سنة 1536م. سليمان باشا الخادم كان سياسى داهيه.. قدر يحافظ على رقبته سليمه وهو صدر أعظم بعد إبراهيم باشا في وجود حرباء في القصر اسمها روكسلانا "زوجة السلطان" بتحرجم علشان تسيطر على كل شيء في وجود سلطان قوى يظن انه ظل الله في الأرض.

حياة القصور زبالة اوى.. مؤامرات ونسوان فاضية مفيش وراها غير اللت والعجن.. خصيان عماله تنقل الاخبار.. اكل مسموم ونوم قلقان مضطرب.. كل حاكم ببيجي برجالته ومفيش استقرار لأى حد.. حاجه تقصف العمر بجد. تسألنى بقى ازاي واحد كرواتي زى رستم باشا قدر يترقى من سايس خيول الى عسكري إنكشاري ثم الى بكربك سنجق وبعدين يسب حياة العسكرية دى كلها ويتعين في القصر ويترقى فيه الى درجة جوز بنت السلطان "مهرماه" من مراته الأثيرة روكسلانا.. اقولك معرفش.. بس هو الجواز قسمة ونصيب.

الأكيد ان رستم باشا كان ذئب شديد الذكاء.. والأكيد كمان انه اتفق مع حماته على ترتيب فخ محترم لولى العهد الأمير مصطفى علشان يألشوه ويحطوا مكانه اخوه سليم الثاني "ابنها" الى كان مقضيها هلس وعربده في الشمال فوق بعيد عن عيون ابوه ومسئوليات الحكم. بس ازاي هنحط سليم الثاني ابو سمعة زى الزفت مكان مصطفى ابو سمعه زى البرلنت.. مصطفى كان مقاتل شجاع وقائد عسكري ناجح.. رجل علم ودين.. متجوز ومستقيم ولا له في الشرب ولا المسخرة.. وفوق كل ده.. محبوب من الناس واهل العلم والجيش والانكشارية.. وحط تحت الانكشارية دى الف خط.

الى نصبوله الخية طلوعوا إشاعه قذره انه اتفق مع الصفويين "الشيعية" ضد ابوه.. تشيع الاناضول كان ببيع العثمانيين.. السلطان اتجنن لدرجة انه صدق كل الادلة المزيفة الى قدموها له عن ابنه.. صدق ان ال 30 ألف عسكري الى ابنه مجهزهم لحرب الصفويين هياخداهم ويحاربه بيهم وهو سلطان عنده بدل الجيش 10 جيوش اقل جيش فيهم أكثر من 30 ألف. السلطان صدق الكذب لدرجة انه امر العساكر بقتل ابنه بعد محاكمة هزليه عمر التاريخ ما هينساها ابد..

العساكر ملهاش الا الطاعة.. نفذوا امر الاب وخنقوا الأمير بخيط حرير.. الوسيلة المفضلة لقتل النبلاء في زمن العثمانيين.. مش بعيد كمان يكونوا خنقوه ونفذوا الحكم قصاد ابوه.

يا ربي..

بقي الايد الى ربت.. هي الأيد الى تخنق!!!

بيحكى ابن اياس ان المؤيد شيخ "في مصر" بعد ما قتل ابنه الصارمى إبراهيم فضل يعانى من عذاب الضمير واشتد عليه المرض علشان يموت بعد ابنه الى هو قتله بأيده بشهور قليلة.. وكالعادة.. القتل كان حسن السمعة مستقيم الأخلاق ومقاتل فذ شجاع.. بينما صاحب الوشاية كان قذر ونمام وخباص.. وكالعادة خسرت السلطنة مشروع حاكم كويس علشان تدخل في دوامة تنتهى بحاكم زى الزفت.

بقي علشان الكرسي.. يقتل ابنه!!

حقيقى.. صفقة خاسره.

على بك الكبير

ايه كمية الخيانات والصراعات دى كلها!!

الراجل ده لو مكانش مات فى الحرب.. اكيد كان هيموت بالسكتة.. معجزة انه قدر يعيش 45 سنة بحالهم فى الجو ده.

الغالب من أقوال المؤرخين انه اتولد سنة 1728م. فى بلد اسمها اماسيا "فى تركيا حاليا" بإسم يوسف داود لأب قسيس ارثوذكسي.. كان عنده 11 سنة لما خطفه قطاع الطرق وباعوه فى إسطنبول لنحاس اسمه كرد احمد الى باعه فى اسكندرية لاتنين اخوات يه**ود كانوا مسئولين عن الجمارك اسمهم اسحق ويوسف.. الاخوين حسوا ان الولد ده مكانه مش فى التجارة فنزلوا بيه على المحروسة علشان يهادوا بيه شيخ البلد وقتها.. إبراهيم بك كتخدا.. وكان سن يوسف وقتها 15 سنة.

فى بيت ابراهيم كتخدا اعتنق يوسف الاسلام وبقي اسمه على.. حفظ القرآن وتعلم القراءة والكتابة وخضع لتربية عسكرية صارمة.. لما بلغ 18 سنة اعتقه ابراهيم كتخدا ومنحه الامارة.. فى رحلة من رحلات الحج كان على مع استاذ ابراهيم كتخدا وطلع عليهم 30 لص من قطاع الطرق.. قدر على انه يغلبهم كلهم.. قتل منهم الى قتله والباقي هربوا.. من يومها سماه استاذ ابراهيم "جن على".. الواد العفريت يعنى الى محدش يقدر عليه.

لما مات ابراهيم كتخدا حط على بك عينة على منصب استاذ ابراهيم.. المنصب كان بيتخانق عليه 3 بيوت كلهم اقوى من على بك.. بيت الجلفية "رضوان بك الجلفى" وبيت القازدغلية "عبد الرحمن كتخدا القازدغلى صاحب السبيل الرائع فى منتصف شارع المعز حاليا" والمماليك الابراهيمية.. الى هما ممالك ابراهيم بك كتخدا نفسه زى عثمان بك الجرجاوى وحسين بك كشكش وخليل بك الدفتردار والجماعة دول.

على بك سابهم كلهم يطحنوا فى بعض ووقف يتفرج من بعيد لحد ما خلصوا على بعض ومبقاش قصادهم الا هو علشان يبقى شيخ البلد.. فى يوم تنويجه حاولوا بدبحوله القطعة ويفكروه بمين وقف جمبه علشان يبقى شيخ البلد.. على بك قصف جبهتهم وهو بيرد ويقول "انا لا اتقلد الامارة الا بسيفى لا بمعونة من احد."

وخذ عندك بقى المرجيحة الى حصلت فى مصر بعد توليه المنصب.. خيانات واتفاقات ومعااهدات وفرمانات بالنفى الى دمياط ورشيد والصعيد والحجاز والشام.. معجزة بكل ما تحمله كلمة العجين من دقيق بين على بك وصالح بك القاسمى وحسين بك كشكش وخليل بك الدفتردار ومن بعدهم الشيخ همام بن يوسف عظيم الصعيد الى اجمع كل اطراف الصراع والمؤرخين على احترامه ومحبته لأنه كان قماشه تانية خالص منسوجة من الاخلاق الحميدة والشهامة والمروءة غير كل المماليك الى بتاكل فى بعض دى.

لو فتحنا فى الكلام عن خناقة على بك مع المماليك على المنصب مش هنخلص.. الى حابب يعرف القصة انصحة بشدة بالمسلسل القديم "الحب فى عصر الجفاف" بتاع عبد الله غيث وتيسير فهمى واحمد ماهر.. المسلسل ده رغم ضعف الانتاج الا ان دقته التاريخية هائلة.. مفيش تفصيلية فى المسلسل من اوله الى اخره مش موجوده فى تاريخ الجبرى.. المراجع التاريخى للمسلسل كان دكتور عبد الرحيم عبد الرحمن عبد الرحيم أستاذ التاريخ العثماني فى كلية الدراسات الإنسانية "جامعة الأزهر".. على عكس المسلسل بتاع يحيى الفخرانى الى فيه هيد كثير.. لو عملنا ميكس وخذنا امكانيات مسلسل يحيى الفخرانى مع دقة مسلسل عبد الله غيث هيبقى كأننا رجعنا لورا 250 سنة وعشنا معاهم كل الاحداث بالظبط.

على بك الكبير مسك المنصب فى فترة مظلمة من تاريخ مصر.. القاهرة واسطنبول كانوا توأم.. القاهرة كانت قوية لما كانت اسطنبول قوية ولما الزمن دار على طوب كابى سراى اصبحت القلعة فى مهب الريح.. على بك كان واحد من الناس الى عدت على مصر وهى فى مهب الريح.. ساب شوية طراوة.. ومشى.

فى اثناء الصراع على السلطة على بك الكبير حاصر طنطا علشان يصطاد خليل بك الدفتردار الى كان مستجير بمقام السيد البدوى.. لما وقع خليل بك حب على بك انه يصالح اهل طنطا ويكسبهم فى صفه فبنى الضريح الكبير بتاع السيد البدوى الموجود حاليا وبنى حواليه قبة ومآذن ومسجد كبير.. المسجد ده رमे المملك فؤاد ومن بعده السادات.. لكن يظل البناء الحالى بتاع على بك الكبير.

على بك بنى سبيل مية فخم قصاد السيد البدوى.. السبيل ده حاليا موجود فى مدخل طنطا الجنوبي.. عمل كمان سوق كبير حوالين مسجد السيد البدوى كانوا زمان بيسموه سوق الغورية نسبة الى التجار الى بتيجى كل سنة مع المولد من منطقة الغورية فى القاهرة.. السوق ده ما زال موجود لحد النهارده ومشهور بحب العزيز وحلويات المولد والمشبك ولعب الاطفال.. اقل تاجر فى السوق ده مليونير بالمناسبة.

من كتابات الجبرتي تقدر تلمس حب الناس لعلى بك وتوحدهم حواليه رغم الضرائب.. المشهور عن على بك انه كان عاوز يستقل بمصر.. وده مش صحيح.. الجبرتي سجل انه كان دايم بيتحرك بفرمانات السلطان وحريص على اظهار الطاعة والولاء لسلطان المسلمين في اسطنبول.. حتى لما ضرب العملة بأسمة في مصر.. كانت ناحية منها عليها طغراء السلطان والناحية الثانية عليها اسمه هو.. على بك كان هدفه انه يحكم مصر "منفرداً" كأنها سلطنة مستقلة ولكن بإسم السلطان العثماني علشان تتساوى الرؤوس.. وده الى معجبش السلطان مصطفي الثالث.

الملفت في القصة دي هو الدراما في موت ابو الذهب "دراع على بك اليمين وجوز بنته" بالاضافة الى مدفن على بك الكبير نفسه..

السلطان وعد محمد بك ابو الذهب بمنصب والى لو قدر يقتل على بك.. ابو الذهب انقلب على استاذة في ابريل سنة 1773م. واستفرد هو بالسلطة.. سنة 1775م اتحرك ابو الذهب على فلسطين علشان يحارب ظاهر العمر حليف على بك.. في طريقه الى عكا هدم ابو الذهب دير النبي ايليا وقلعة دير حنا.. بيقول المؤرخ يوسف الدبس في كتابة الموجز في تاريخ سوريا "المجلد السابع" انه اسرف في القتل لدرجة انه بنى من رؤوس قتلاه صوامع.. وهو راجع في الطريق جتله حمى من نوع غريب كانت بتخليه يهذى ويصيح من النوم مفزوع بيصرخ "ردوا عني هذا الشيخ المفترس".. قصده على ظاهر العمر.. مات ابو الذهب في نفس السنة واندفن في مسجده الفخم الى بناه قصاد الازهر علشان يضرب بيه الازهر وشيوخه الى اعترضوا على خيانتة لعلى بك .. فرحت الناس بموته وقالوا فيه شعر..

لما دنا كل المنى *** والهـم عن قلبى ذهب

والسعد اقبل ظاهرا *** ارخت موت ابو الذهب

على بك الكبير مخلفش صبيان.. ابو الذهب كان المرشح رقم (1) علشان يورث حكم مصر كسلطنة مستقلة بس ابو الذهب فضل انه يبقى والى تابع لسلطنة تانية.. قوم يموت بعد 18 شهر بالظبط من خيانتة.. وهو عنده 41 سنة بس.. لا لحق السلطنة ولا لحق الولاية.. سبحان الله.

على بك الكبير اندفن في حوش استاذة ابراهيم بك كتخدا في الامام الشافعي.. جوز بنت ابراهيم كتخدا كان اسمه اسماعيل بك.. ده الى سلم رقبة على بك لابو الذهب.. لما مات اسماعيل بك دفنوه في الحوش بتاع حماه ابراهيم كتخدا.. جمب على بك الكبير علطول!!

مراد بك كان من مماليك ابو الذهب.. يقال ان هو الى ضرب على بك الكبير بالغدادة يوم معركة الصالحية.. لما مات على بك اتجوز مراد بك ارملته نفيسة البيضاء.. نفيسة البيضاء اندفنت في حوش ابراهيم كتخدا.. جمب مدفن على بك برضه!!

جرى ايه يا ناس.. هو من قلة الاماكن!!!

بقي تدفنوا الراجل جمب الى خانه والى اتجوزت الى ضربه بالرصاص!! ده انتو لو قاصدين تفرسوا الراجل بعد ما مات مش هتعملوا فيه كل ده!!!

تحت تراب حوش ابراهيم كتخدا قصة خيانة قضت على حلم شعب غلبان عاش يحلم بالحرية.. ولما هلت بشايرها.. قتلوها رضية.. تحس ان الحجارة في الحوش بتهتف زى حجاج الخضرى في المسلسل ..

محروسة يا مصر..



بوابة قلاوون

هذه بوابة مدرسة السلطان الناصر محمد بن قلاوون بشارع المُعز وأنت تسير في شارع المُعز ستجد على يسارك هذه البوابة والتي لم تكن في الأساس مصممة لهذه المدرسة بل كانت في الأصل بوابة إحدى الكنائس في مدينة عكا بفلسطين ولا أقصد الأبواب الخشبية فقط ولكن أقصد هذه البوابة الرُخامية بأكملها بالأعمدة الرخامية هي الأخرى وهذا يتضح جليًا لطراز البوابة الذي لا ينتمي إلى طراز العمارة الإسلامية ولا نراه في العمارة الإسلامية سوى في هذه المدرسة فقط والبوابة مُضممة على الطراز القوطي

عندما قام سلطان مصر والشام السلطان الأشرف خليل بن قلاوون بفتح "عكا" آخر معاقل الصليبيين في بلاد الشام في العام ١٢٩١ م أمر بنزع هذه البوابة من إحدى الكنائس الموجودة هناك وقام بالمرء بها إلى القاهرة وظلَّت عنده حتى قُتِلَ وبعد تولي أخيه الناصر محمد بن قلاوون الحُكم من بعده ثم خلع من فترة ولايته الأولى تولى السلطان العادل زين الدين كتبغا مقاليد الحُكم وبدأ في إنشاء هذه المدرسة في البداية وقام بتركيب هذه البوابة ليستقر بها المقام في هذا المكان وبعد أن عاد الناصر محمد بن قلاوون إلى الحُكم مرة أخرى قام بشراء هذه المدرسة واستكمال بنائها لتصبح هذه البوابة بوابة مدرسة الناصر محمد بن قلاوون

مكتوب في النص التأسيسي للمدرسة المنقوش أعلى هذه البوابة المبنية على الطراز القوطي والتي ربما يُقارب أو يتجاوز عُمرها الألف عام "بسم الله الرحمن الرحيم أمر بإنشاء هذه القُبَّة الشريفة والمدرسة المباركة السلطان الأجل الملك الناصر ناصر الدنيا والدين محمد بن السلطان الملك المنصور سيف الدين قلاوون الصالحى قدس الله روحه ونور ضريحه وذلك في شهور سنة ثمان وتسعين وستمئة"



الأشرف خليل

ليه ممكن تحترار في سيرة سلطان زى الأشرف خليل بن قلاوون؟؟؟؟!!!!

ما هو يا كان كويس ونقول الله يرحمه.. يا كان ابن تيت ونقول الله يلعنه..

سهله اهي..

لا لا.. متحسبش كده يا صاحبي..

بين الصفرة والمية في 99 درجة وبين الأبيض والأسود في درجات رمادي بالهبل..

خلينا نكون محددين في كلامنا ونقول ان السيرة الذاتية العسكرية للأشرف خليل حازه مفتخرة جدا.. الغلطة اللي عملها صلاح الدين لما سمح للصليبيين يخرجوا بأمان من بيت المقدس بعد حطين صلحها الأشرف خليل بعد 104 سنة لما طردهم من الشام تماما وفتح عكا سنة 1291م. لو الأشرف خليل معملش في حياته الا انه استرد عكا من الصليبيين.. فده يكفيه علشان يتحط اسمه مع عظماء العسكريين الإسلاميين في التاريخ.. لكنه رغم قصر مدة حكمه.. عمل حاجات تانية كتير عظيمة جدا.. زى تحرير ساحل الشام وفتح قلعة الروم في أرمينيا الصغرى.. وكان بيستعد لتحرير ارض العراق من المغول.. لولا انه مات بدري اوى.. قبل ما يكمل 30 سنة.

طيب.. السيرة الشخصية ايه بقى؟

زفت.. هباب.. قطران ونيله.. حازه تكسف وتخليك تدفن راسك في الرمل من السلطان وعمايله.. لو ده ابنك.. كنت هتتبرأ منه ومن افعاله المهلبة امام الله وامام الناس.. تحس ان المؤرخين عاوزين يكتبوا حازه ومش قادرين احتراماً لتاريخه العسكري.. شمس الدين الذهبي مثلاً في تاريخ الإسلام قال عنه..

"وكان منهمكا على الملذات لا يعبأ بالتحرز على نفسه لفرط شجاعته، وما أحسبه بلغ ثلاثين سنة. ولعل الله عز وجل قد عفا عنه وأوجب له الجنة على كثرة ما فرط في جنب الله"

شفت ازاي؟؟

حاول خليل اكثر من مره انه ياخذ من ابوه مرسوم بولايته للعهد في حياة أبوه علشان يتفادى بحور الدم الى بتحصل كل ما يموت سلطان من غير ولي عهد.. كل مره يوسط القاضي فتح الدين بن عبد الظاهر وكل مره كان ابوه يرفض.. ولما زهق قلاوون استدعي القاضي فتح الدين وقاله "يا فتح الدين.. انا ما أولي خليلاً على المسلمين.."

بس قلاوون عيان وبيموت.. مفيش وقت للمناهدة ولا المغامرة بمنصب فاضي زى ده في وجود عشراء الامراء الأقوياء.. علشان كده اتصرف القاضي فتح الدين بذكاء وختم مرسوم تولية خليل بختم تانى غير ختم السلطان لعل التزوير ده يعدي على الامراء في ظل حالة الحزن العميق المسيطرة على الكل بسبب موت قلاوون الكبير المحبوب.. وفعلاً نجحت الحيلة واتسلطن خليل واتلقب بالأشرف.. صال وجال وهاج وماج وعمل في العسكرية والحرب كل ما يحلم بيه انسان.. لواءات وجنرالات دلوقتي محققوش 1 على 10 من اللي عمله الأشرف خليل ومع ذلك واخدين تمجيد وتقديس لو عرفه خليل كان ضرب نفسه بالقنبر حزنا وقهرا..

ولكن النفس البشرية ضعيفة جدا..

الانتصارات المهولة سببت للأشرف خليل حالة من النرجسية وجنون العظمة.. بقى شايف نفسه.. The one and the only.. بقي يسخر من الامراء الكبار أصحاب السلاح ويعاملهم معاملة الأراجوزات.. يسجنهم ويعذبهم وبعدين يطلقهم وينعم عليهم وبعدين يرجع يسجنهم تانى ويصادر فلوسهم.. يؤمر بخنق واحد زى حسام الدين لاجين لحد ما وشه يزرق وروحه تقرب تطلع.. وبعدين يؤمر بالعفو عنه في تصرف غير مفهوم ابدًا.. وكل ما امير يكلمه.. يزقق ويقول "انت دارس الكلام الى انت بتقوله ده"

مقاش خليل عارف مين حبيبه من عدوه لدرجة انه امر بسجن راجل مخلص زى حسام الدين طرنطاي "الى رفض يتسلطن بداله من شدة اخلاصه لأبوه" ويروح يرقى بداله واحد معروف عنه الغدر زى بدر الدين بيدرا.. وبعد ما يحط بيدرا في نيابة السلطنة.. يحط قصاده واحد بيكرهه اسمه ابن السلعوس علشان يضايقه ويقرفه.. متعرفش هو كان عايز ايه من مين بالظبط.. شوية مع بيدرا وشوية مع ابن السلعوس..

وشوية يستفز الكل لما سلم ابن السلعوس قيادة حملات أرمينيا العسكرية وهو أصلا راجل مدني.. كسب عداوة العسكري القوي علم الدين
سنجر الشجاعى بعد ما كسب عداوة السياسي الداهية بيدرا..

كده الدائرة كملت ومبقاش فاضل الا الاكشن.

اتفق المؤرخين ان يوم الاثنين 12 محرم سنة 693 هـ كان آخر يوم في حياة الأشرف خليل..

يقول ابن ايبك الدوادار في كنز الدرر وجامع الغرر انه كان يوم عاشوراء.. صبحي السلطان مزاجه مش تمام.. فنادى على أمير شكار (*) شهاب الدين احمد بن الأشل وامره يجهز طلعة صيد تظبط المزاج السلطاني.. وعلى ما العدة تجهز.. راح السلطان عمل حجابة علشان يفوق.. بعدها طلع السلطان بدون حراسه على بلد اسمها "تروجه" في البحيرة.. مكانش واخذ باله ان بدر الدين بيدرا ممشى وراه واحد يراقبه.. فجأة لقي السلطان نفسه وجها لوجه قصاد بدر الدين بيدرا وحسام الدين لاجين وسيف الدين بهادر.. بدأ بيدرا الضرب بضربه خايبه جت في كف السلطان.. حسام الدين لاجين قاله "يا بيدرا من يريد ملك مصر والشام تكون هذه ضربته" وراح رازع السلطان ضربة سيف على كتفه وقعته على الأرض سايح في دمه.. قوم بعدها جه دور الأمير سيف الدين بهادر "رأس النوبة".. وده راجل فنان.. دخل سيفه في مؤخرة الاشرف خليل وطلعه من زوره في تصرف يكشف عن غل رهيب وكأن السلطان كان كسر عينه بحاجه شديدة الحساسية.. بعد كده انهال الامراء على السلطان بالسيف لحد ما مات.. سابوه عريان مكشوف العورة في الخلاء لمدة يومين.. بالصدفة اكتشف الجثة والى تروجه الأمير عز الدين ايدمر العجمي.. خده غسله وكفنه واحتفظ بيه عنده في دار الولاية لحد ما جه الأمير سعد الدين كوجبا من القاهرة واستلم الجثمان ودفنه في القبة اللى بناها خليل لنفسه في شارع الخليفة في القاهرة.. على بعد امتار قليلة من قبة السلطنة شجر الدر.

رايح فين؟؟ لسه الدراما مخلصتش..

بعد موت السلطان بيوم قبضوا على سيف الدين بهادر وقطعوا راسه ورموا جثته في فرن من افران الجير الحي.. اما بيدرا فأمر الناصر محمد "اخو خليل" انهم يقطعوا راسه ويلفوا بيها القاهرة علشان يشوفها اكبر عدد من الناس.. اما باقى الامراء فخذوهم على القلعة.. قطعوا أيديهم ورجليهم وعلقوهم بالمسامير "احياء" على عمدان خشب قصاد أبواب القلعة.. علشان الكل يعرف ايه جزاء اللى يهزر مع ولاد قلاوون.

المقريزي بيحكى إنهم بعد ما قتلوا بيدرا لقوا في جيبه ورقه مكتوب فيها "ما يقول الفقهاء في رجل يشرب الخمر في شهر رمضان ويفسق بالمردان ولا يصلي.. فهل على قاتله ذنب او لا؟" ثم إجابة السؤال.. "يقتل ولا اثم على قاتله.."

يعنى بيدرا كان مرتب كل حاجه اهو..


طيب فين السلطان من كل ده!!!!


الغرور عمى عينه وللا كان مشغول بالسيكو سيكو مع الأطفال والامراء؟


ربنا يحفظنا.

سؤال يحتاج الى بحث..

(*) امير شكار كانت مهنة من مهن القصر في العصر المملوكي.. ايه هي المهنة دى؟







قلعة الجبل

يا اخي قلعة الجبل دى مكان مربع اقسام بالله..

مجرد ما بشوفها ركي بتخبط في بعض لما بفتكر قليل من كثير حصل فيها علشان الحكم..

خليني أقولك ان مذبحه المماليك قد تكون من اقل احداث القلعة دموية ودراما.. جدران القلعة واسوارها شهدت بلاوي في العصور الغابرة..
لو الحجارة بتتكم كانت رقعت بالصوت الحياني وقالت ينعل أبو الحكم على أبو اللى بدعه..

لو في يوم من الأيام قررت تتمشى حوالين قلعة الجبل.. ابقى أوصل لحد مصطبة المحمل.. واقف عندها شوية..

المكان ده بناه الخديو اسماعيل سنة 1864م. علشان يخرج منه جمل المحمل.. ده التعبير الشعبي لبعثة الحج المصرية.. كسوة الكعبة كانت بتتعمل في دار الكسوة في الخرنفش وبعدين تتبعت على المصطبة علشان يستقبلها الخديو بنفسه ومعه اكابر البلد في عرض عسكري مهيب ينتهى بخروج القافلة مع امير الحج قاصدين بيت الله الحرام.. اول القافلة جمل اسمه حمدان شایل هودج كبير يحتوى على كسوة الكعبة الشريفة.. طول الطريق كان امير الحج بيوزع فضة وذبائح على الناس.. علشان كده الناس كانت بتقول "زفة" المحمل لأنه كان موسم خير على الكل.

تعرف مين اول ملك مصري قرر يكسو الكعبة؟؟

الست عصمة الدين ام خليل.. شجر الدر..

من عند المصطبة دى خرجت مع قافلة الحج بالكسوة لأول مره.. وعند المصطبة دى اترمت جثة هامة من فوق اسوار القلعة..

شجر الدر قعدت في الحكم 80 يوم.. محدش كان معترض على ولايتها الا الخليفة العباسي المستعصم بالله.. بدهاء المرأة الفطري فهمت انها مش اده فقررت تتجوز علشان تسكتة.. ومن ورا جوزها تبقى تحكم وتتحكم زى ما هي عايزه..

في مين عرسان جاهزين عندهم شقق في التجمع ومستعدين يمشوا على القايمه؟

الاتابك فارس الدين اقطاعي بن عبد الله الجمदार الصالحي.. قائد الجيوش المنتصر.. الى هو محمود المليجي..

الأمير عز الدين ايبك التركماني الصالحي النجمي.. جاشنكير القلعة.. الى هو عماد حمدي..

الجاشنكير هو الراحل المسؤول عن تذوق اكل السلطان علشان يتأكد انه مش مسموم.. شغلانة تقطع الخلف الله الوكيل..

لو انتى مكانها وعايه الحكم.. تتجوزي مين في دول؟؟

طبعا ايبك.. رجل خمسيني اشقر الشعر أزرق العيون.. راجل نواغم خالص وملوش في ليلة الحرب والسياسة.. مالها هي ومال رجل الجيش اللواء الخشن اقطاعي الى اول كلمه قالها وهو بيخطبها انه هيرجعها الحرملك تانى..

واتجوزت شجر الدر ايبك بعد ما وعدا الف وعد انه هيبكون مقطف.. من ايديها دى لأيديها دى.. هي الأمر الناهي وهو هيبقي منظر بس..

وعلشان الخطة تكمل والحكم يستقر.. اتفق الاتنين على قتل اقطاعي بعد ما استفحل خطره عليهم وبدأ يهددهم فعلا بحصاره للقلعة وجوازه من اميرة ايوبية.. وكلفوا قطز بالمهمة القذرة دى.

7 سنين الا 33 يوم ايبك قاعد على العرش منظر وشجر الدر هي الى بتحكم.. كل الاختام السلطانية تحمل اسمها وكل المراسلات مذيله بتوقيعها.. ايبك ملوش في القلعة الا مكان نومه.. حتى الدولاب بتاع الهدوم يا اخي خدته كله ومسابتلوش فيه ولا رف حسبي الله في الستات كلهم.

بس الحقيقة ان ايبك كان اخبث بكثير اوى من تفكير شجر الدر..

ايبك قعد 7 سنين يراقب ويتعلم الشغلانة.. مستحيل تتحول من سفرجى الى سلطان في يوم وليلة.. ولما شاف ايبك ان الوقت مناسب.. خطب بنت الأمير بدر الدين لؤلؤ أمير الموصل وبعث لشجر الدر انه كفاهه عليها كده.. على المطبخ ياللا يا ست الكل.

حاولت شجر الدر انها تقلب عليه الترابيزة.. بعثت للناصر يوسف "اخر ملوك بنى أيوب في دمشق" تقوله انها هتتجوزه بعد ما تخلص من ايبك.. لكنها للمرة الثانية اختارت الراجل الغلط.. الناصر يوسف مردش عليها أصلاً.. مش ثقل ودلال.. انما هو أساساً كان بيخاف من خياله لدرجة انه بعث لهولاكو يقوله تعالى مصر وانا خدامك يا سيد المعلمين..

ادركت شجر الدر انها لازم تتصرف لوحدها.. علشان كده جابت واحد من مماليكها اسمه محسن الجوجري واتفقت معاه على خطة قتل ايبك..

برسالة تفيض انكسار وحنية ودلع قدرت شجر الدر انها تقنع ايبك انه يجيلها القلعة في الليل.. ايبك العبيط صدق وراح القلعة وهو بيحلم بليلة نووية بعيد عن البومه ام على مراته.. دخل ايبك الحمام علشان يستعد.. لقي في وشه محسن الجوجري ومعاه 4 ممالك زى البغال منهم مملوك اسمه سنجر صوابعه زى الفولاذ.

حكى المقرئ في السلوك ان الممالك هجمت على ايبك وفتحوا رجله على الآخر بعدها هجم عليه سنجر بصوابعه الفولاذية ومسكه من اعز ما يملك الرجل.. من شدة الألم ايبك كان بيخبط راسه في الأرض وهو بيستعطف شجر الدر انها ترجمه.. مشاعرها اتحركت كأنثى.. بس الممالك عارفين كويس انه لو عاش.. هينفخهم.

ومات ايبك..

محدث صدق رواية شجر الدر لما قالت انه مات وهو نايم.. الأمير علم الدين سنجر "كبير ممالك ايبك" قبض على الخدم ونزل فيهم ضرب لحد ما اعترفوا باللي حصل.. بعدها حبس شجر الدر في البرج الأحمر في القلعة وقبض على الممالك الى قتلت ايبك وصلبهم على أبواب القلعة وعلى باب زويلة.. بعدها بعث لأم على زوجة ايبك الأولى علشان تيجي القلعة وابنها يتسلم الحكم.. ابنها كان عنده 15 سنة ومكانش اهيل على فكره.. اتسلطن ابن ايبك وبقي اسمه المنصور نور الدين على.. الى بالمناسبة حكم مصر سنتين و8 شهور.

طيب.. الضراير بقى عملوا ايه في بعض؟؟

ام على قررت تنتقم من شجر الدر علشان قتلت جوزها.. بعد 22 يوم من تولى المنصور على السلطة امرت جواربها انهم يقتلوا شجر الدر ضرباً بالقباقيب من تحت لفوق.. من عند ركبها لحد راسها.. علشان الألم يبقى أطول مدة ممكنة.. بعد كده رموها من فوق اسوار القلعة جثة هامة.. فضلت شجر الدر مرميه في الشارع 3 أيام يعتدى الحرافيش على جسمها الجميل لحد ما جه اهل الخير تعرفوا عليها ودفنوها في قبتها في شارع الخليفة.

يا ولاد ال***

حد يعمل كده في تحية كاريوكا!!!!

لو لسه واقف عند مصطبة المحمل.. هتلاقى قصادك جامع مآذنته مكسورة.. ده جامع بناه الوالي العثماني الحاج محمد عزت باشا مكان مقام قديم اتعمل في نفس المكان الى لقوا فيه جثة السلطانة عارية..

مقام فاطمه شجر الدر..

ولا دايم الا وجه الله.

(*) سؤال يحتاج الى بحث..

فين نلاقى الهيكل العظمي المتحفظ لآخر جمل محمل "حمدان" في مصر؟



جامع الحاج محمد عزت باشا



مصطبة المحمل



1

وكانت شجر الدر قد بعثت نصرًا العزيزي بهدية إلى الملك الناصر يوسف، وأعلمته أنها قد عازمت على قتل المعز، والتزوج به وتمليك مصر. فخشى الملك الناصر يوسف أن يكون هذا خديعة، فلم يجيبها بشيء.

وبعث بدر الدين لؤلؤ صاحب الموصل يحذر الملك المعز من شجر الدر وأنها باطنت الملك الناصر يوسف، فتباعد ما بينهما، وعزم على إنزالها من القلعة إلى دار الوزارة. وكانت شجر الدر قد استبدت بأمور المملكة ولا تطلعه عليها، وتمنعه من الاجتماع بأم ابنه وألزمته بطلاقها، ولم تطلعه على ذخائر الملك الصالح.

فأقام الملك المعز بمناظر اللوق أياما، حتى بعثت شجر الدر من حلف عليه. فطلع القلعة وقد أعدت له شجر الدر خمسة ليقتلوه: منهم محسن الجوجرى، وخادم يعرف بنصر العزيزي، ومملوك يسمى سنجر. فلما كان يوم الثلاثاء رابع عشرى شهر ربيع الأول، ركب الملك المعز من الميدان بأرض اللوق، وصعد إلى قلعة الجبل آخر النهار. ودخل إلى الحمام ليلا، فأغلق عليه الباب محسن الجوجرى، وغلّام كان عنده شديد القوة ومعهما جماعة. وقتلوه بأن أخذوه بعضهم بأنثيه وبخناق، فاستغاث المعز بشجرة الدر فقالت أتركوه، فأغلظ لها محسن الجوجرى في القول، وقال لها: «متى تركناه لا يبقى علينا ولا عليك»، ثم قتلوه.

2

فأراد ممالك المعز قتل شجر الدر، فحماها الصالحية، ونقلت إلى البرج الأحمر^(١) بالقلعة ثم لما أقيم ابن المعز في السلطنة، حُملت شجر الدر إلى أمه في يوم الجمعة سابع عشرية فضرِبها الجوارى بالقباقيب إلى أن ماتت في يوم السبت. وألقوها من سور القلعة إلى الخندق، وليس عليها سراويل وقميص، فبيت في الخندق أياما، وأخذ بعض أراذل العامة تكته سراويلها. ثم دفنت بعد أيام - وقد نتنت، وحملت في قفة - بتربتها قريب الشهد النفيسى. وكانت من قوة نفسها، لما علمت أنها قد أحيط بها، أتلقت شيئا كثيرا من الجواهر والآلى، كسرتة في الهاون.

وصُلب محسن الجوجرى على باب القلعة، ووُسِّط^(٢) تحت القلعة أربعون طواشيا وصلبوا من القلعة إلى باب زويلة. وقبض على الصاحب بهاء الدين بن حنا؛ لكونه وزير شجر الدر، وأخذ خطة بستين ألف دينار.